

23,385/B/2

Obt 499 April 1874 $\frac{6}{4}$

Det.
M. N. S.

DE
CURANDIS HOMINUM MORBIS

E P I T O M E

PRAELECTIONIBUS ACADEMICIS DICATA

AUCTORE

JOANNE PETRO FRANK

SAC. CAES. ET R. AP. MAJEST. A CONS.
MAGISTATUS POLITICI ET OECONOM.
MEDIOLAN., FACULTATIS MEDICAE AC
NOSOCOMIORUM PER INSUBRIAM AUSTR.
PRAESIDE, CONGREGATIONIS XENODO-
CHII PAPIEN. AD S. MATH. MEMBR. THE-
RAPIAE SPEC. ET CLINICES IN TICINEN.
ACADEMIA PROFESSORE P. ET O. ACAD-
MIAR. REG. SCIENTIAR. GOETTING. MAN-
TUANAE, ET ELECT. MOGUNT. TUM SO-
CIET. PATRIOT. MEDIOL. ET MEDIC HEL-
VET. SODALI.

LIBER V.

DE PROFLUVIIS.

PARS I.



MANNHEMII MDCCXCIV.

Apud C. F. Schwan et C. G. Goetz, Bibliop. Aul.



DE
CURANDIS PROFLUVIIS.
LIBER V. PARS I.





CLASSIS QUINTA.

PROFLUVIA.

GENERALIA DE PROFLUVIIS.



§. 463. Sub statu valetudinis perfectae hu- Integritas Corp.
mores, in *animalem jam materiam subacti*,
alii, per *circulum vitalem abrepti*, in vasis sui
generis, aut singulas ad partes decurrunt;
aut ab istis, vel continuato itinere, vel re-
sorpti, communem ad fontem revehuntur;
alii, ad certos naturae fines exhalati, *secreti*,
mox proprios in usus colliguntur; mox, ob
continuas necessitates, sine quavis interrup-
ptione, per opportunos canales, praefixa in
loca distillant; mox, artificio mirabili, qui
tardius effluerent, celiores ad motus coacti,
cum impetu prosiliunt; alii, vel inutiles ac
superflui; vel ob noxas, quas, diutius deten-
ti, acriores, inferrent, a sanis separari, —
hic, vaporis sub forma, athmosphaerae con-
tinuo restitui, — illinc, communes in al-
veos guttatim deponi, et ab istis, vel, a

mole excitatis, periodice *excernt*; vel insolita liquoris acrimonia stimulatis, sine noxa *expelli*, observantur.

Sed et illam, quae necdum penitus in animale naturam conversa est, ac tubo alimentari includitur, *semidigestam materiam*, ut corpori nutrimento esse queat, tum ventriculo, tum intestinis certo temporis intervallo detineri, ac resorbentium vasorum actioni exponi oportet; atque in ipsis humorum ciborumque recrementis e corpore eliminandis natura nequidquam festinat; sed partem istorum, incognitos oeconomiae animalis ad usus, sine *putredinis* formidine, sibi ipsi reservat, et custodes, ne citius, et indecore aufugerent, canalium excernentium ad ostia constituit.

Profluvii
definitio.

§. 464. Quotiescunque vero, aut *solidorum continentium*, aut decurrentis, quiescentis contenti in his ipsis *fluidi*, aut utrorumque ex vitio, vel citius, uberius, quam par est, vel loco ac tempore non aequis, quae diutius, aut semper ex liquidis retineri oportuisset, amittuntur; toties et statum morbosum, quem *profluvium* vocamus, adesse dicamus. Quas scholae *incontinentias* dixerunt, — a *profluviiis* hae aliter non differunt, quam,

quod in illis, materia, ad leges naturae, in cavo visceris collecta, ac certum per tempus, peculiaris *vi organi*, et *voluntatis* imperio, retinenda, nolentibus aufugiat; in istis humor aut morbose secretus, aut suis e vasis profusus, vel tempore, vel loco, vel copia insolitis excedat. Ad *Classem* constituendam, vix interest, num *febris* aliqua hunc statum, — an vero nulla, comitetur; an solidorum vel *impulsu*, vel *cessione*, humores aufugiant: cum illud ipsum, quod impellit, aut relaxat, tam varium, — nec minus, quam febris, aut apyrexia, a *profluvio* distinctum est; quin igitur hanc classem aegritudinum subtiliores quam par est Nosologi, morborum clencho, qui nusquam istorum indolem et causas, sub naturalis defectu systematis, satis exprimit, excludant. Nos plures hinc morbos, licet indole atque causis, quae innumeras ejusdem rei sectiones exigent, diversos, ob hoc unum, quod fluida, sanitatis praeter leges, perduntur, *profluviorum* sub titulo conjunctim describemus; sed in generum specierumque divisione, eorundem origines, affinitates, discrepantias, ut alibi jam fecimus, sollicite adnotabimus.

Diversitas.

§. 465. Hoc in opere praestando, diversa liquidorum, quae suis ex alveis, naturae praeter leges, aut *placide distillant*, aut *jugiter effluunt*, aut *cum impetu praecipitant*, natura, dicendorum nobis ordinem suggeret: ut primum, *de serosi*, — mox *de mucosi*, — ac demum *de cruenti liquoris morbo*so profluvio, aut simplici, aut aliis tum liquidis tum solidis alimentorum reliquiis *remisto*, disseramus. Mox ut *primaria* hi fluxus affectio, — mox aliorum ut morborum *symptoma* aut *signum*, vel ut longinquae irritationis *consensualis effectus*, — atque nunc *aucto*, nunc *imminuto* sub *Vitalis potentiae tenore*, incedunt; sed frequenter, nunc maximarum aegritudinum, nunc *criticam* ipsius salutis, scaturiginem uberrimam, constituunt. Interim non *totius* ubique vitio, sed, non raro exemplo, *ex locali*, et ad partem, ex qua humor propullulut, restricta affectione, profluvia, — nunc *acutarum* sub periculo aegritudinum, nunc *chronici ac habitualis* fere morbi sub specie, — nunc quovis *sine ordine*, nunc aequali sub *periodo*, — ac interdum *epidemicæ constitutionis* sub imperio manifesto, vel *interne*, vel *exterius*, oriuntur; atque *febrem* nunc quamvis, continuam, intermitten-

tem, nunc vero *nullam*, aut modo *secundariam*, agnoscunt.

§. 466. Sub tam densis doctrinae de vero rerum ortu tenebris, tantarum causas aegritudinum indicare, perardui laboris argumentum est. Hac interim vel in ipso vasorum aut *universo*, aut *speciali systemate*, — aut in *morbosa*, ab istius statu vitioso plerumque pendente, *fluidorum natura*, — aut *in utrisque simul*, quaerendae sunt; et ex illis, quae (§. 8. 92. 125. 274. 276. 392.) de solidorum vel *aucta*, vel *imminuta* in fluida actione, ac istorum de vitiis monuimus, quin hic singula repetamus, non difficulter eruuntur. Vel enim vis motrix humorum a stimulo quocunque, universali, speciali, ultra modum excitata, nunc *in toto*, nunc *in partibus*, resistantiam vasorum propriam, ac aetati, sexui, temperamento competentem, *excedit*, ac liquida a vinculis, quibus a natura coercentur, liberando, ea ipsa *cum impetu data porta expellit*; — vel ipsi, per quos haec ruunt, aut servantur, canales, ob causas multiplices, internas, externas, *languescunt*, a fluidis obruuntur, dilatantur, ac per oscula extrema, vel per ampliata, naturalia parietum, interstitia, vel

Causae
gener.

Solidorum
factio
aucta.

Imminuta.

Tenuitas
humorum?

Totius cul-
pa.

per novas, violentas scissuras, haec ipsa transmittunt, ac nunc in cava vicina, interne nunc exterius *inermes profundunt*; — vel forsitan *glutine liquidorum animalium naturali*, per causas in hoc ipsum agentes, per contagia, miasmata, venena, vel acria ingesta, aliisque *soluto*, aut, nutrientis materiae diuturno defectu, per haemorrhagias praegressas, *subtracto*, haec ipsa, vel minori submotu, vel febris sub impetu, aut laterales per pores, aut vasculorum per oras aufugiunt; vel demum ratione non satis intellecta, tum solida, tum fluida, a statu sanitatis quamplurimum aberrant, ac reciprocum imperium, et mutuas affinitates, *transfusionis* sic dictae exemplo, deponunt. In ipso interim solidorum vasorumque contextu, ac vitalitatis principio, vel stimulo quocunque agitat, vel a materia fibris nervisque infensa, vel mechanica ratione, infractis, obtusis, depressis, abolitis, potissimae profluviorum quaerendae sunt origines. Singularis ac haereditaria, aut congenita solidorum, vel pectoris, vel colli *structura* non paucas, easque integras, familias, quin labes humorum contribuere videatur, ac sub vivendi ratione meliori,

ad pulmonum cerebrique profluvia, disponit, ac inopinantes praecipitat. Vel sola jam hominis *aetas* diversa, profluviis ex parte corporis nunc ista, nunc illa, magis favet; ac foeminei sicut sexus post alia evolvere perficique solent organa: ita fluxus morborum ex istis, — alii, vix prius, quam pubertatis ab epocha, — alii, sat raro, nisi partus experto jam ab opere, solidorum certe nervorumque imperio, contingunt. Systematis vasorum libertas ad humorum distributionem requiritur aequalem; et si, alimentis pro universa machinae compage a stomacho robusto huic systemati fideliter transmissis, et hoc in alveo in sanguinem conversis, pars ramorum conspicua, aut membri majoris amputatione ablata, aut *repentina* compressione, aut vi spasmodorum, occlusa, contracta, eruentum admittere torrentem recuset: hic ipse non raro, vicordis, non simul intercepta, secretiones quasunque alibi augere, aut certam visceribus violentiam inferre, ac morbosa generare, profluvia observatur. Insignis sine dubio *nervorum* in vasa, quae sensu licet vix magno instructa videantur, non descripto satis in anatomicis modo, tam copiosi tamen cin-

Nervorum
actio.

gunt, et tam sollicite, varii varique, amplectuntur, pervadunt, potestas est. Quas non animi violentum pathema hoc in flumine cruento procellas mox provocat! et quantas, apud hominem fere solum, in praecordiis vasorum injurias hae turbae nervosae producant! Vel mitior verecundia candidissimum juvenilis innocentiae vultum copioso jam sanguine inundat; sub gaudio non minus, quam sub moerore, ac sub rara cum infelicibus misericordia, mox abundans per genas ruit lacryma; a terrore, liquida mox alvus, — et sub hysterico insultu pallidissimae urinae copia insignis, deponuntur; a cibi desiderati vel odore, vel memoria, salivae fontes aperiuntur; a medicinae, palato molestae, vel rei cavisvis ingratae aspectu, tum stomachus, tum intestina cavacuantur in aliis: quae, si in sanis adeo hominibus contingant; quam saepe in morbis a nervorum auctoritate profluvia pendere queant, non difficulter eruitur. Vel ipsam phlogosin, localis nervorum praecedat irritatio, et sub ista tam affluxus humorum increscit, quam secretio augetur, immutatur, et ex vasis effectis liquida in cellularem, aut cava vicina ex-

primuntur; aut seri, mucipuriformis, aut sanguinis sinceri per trachaeam, urethram; vaginam, anum, inducitur profluvium. Ex vitio contrario, ex uteri a foetu repentine liberati debilitate, atonia, abundans puerperae ex sinu cruor praecipitat: quem sola frigidae aspersio, genitalibus externis applicatio, nervosae certe actionis auxilio, coercet.

Hinc rarius, ac scholae quondam asse-
rebant, profluvia ex fluidorum tenuitate Plethora,
scaturiunt; ac si forte talis occurrat: solidorum sine labe vix oritur, et istorum magis culpa humores vasa deserunt in morbis. *Plethorae universalis*, nisi, ut vocant pathologi *ad vasa*, in sanis vis unquam occurrit exemplum; sed, quod illorum, qui plenitudinis hac specie laborare dicuntur, proclivitatem in fluxus sanguineos ac inflammationes inducit, major cordis irritabilitas, ac totius ad stimulos cum impetu subeundos promptitudo est. Si, quem suscipiunt, ac in sanguinem convertunt, succum nutritium, vasa continere, vel auctis secretionibus disperdere non queunt; debilitatis in illis hoc signum est: quae saepius in localem, quam in universi systematis vasorum

affectionem terminatur. *Venarum* illa fere morbus est: quae scilicet vasa, prae arteriis, sicut ad crura, ad anum, funiculum spermaticum, quin ad plexum choroideum, in varices et in saccos nodosos dilatantur: ita, sub difficili, et cum obstaculis luctante cruoris incessu, circa glandulas infarctas, tuberculorum ad basin, ad ulcera cancrosa, et ad viscera laxiora, ob sanguinem collectum turgere, aut istum, data causa, frequentius periodice, eructare observantur.

Causae secundariae.

Quaecunque hinc, *primo*, tum cordis, tum vasorum actionem per stimulum admotum intendunt: ac res omnes, quas *febris inflammatoria*, et *inflammationis localis* ut causas adduximus (§§. 118. 125.); sub canalium resistantia ab earum impulsibus superata, ut in ipsa inflammatione vasa integra, laterales per poros, jam faciunt (§. 126.), profluvia quaecunque excitare valebunt. Quae vero, *secundo*, vasorum contextum aut debilitant, aut laedunt, aut nervorum in eundem imperium vel imminuunt, stupefaciunt, suspendunt; vel ob morbosam sensibilitatem (ab ea, quae ad veras inflammationes praedisponit, sollicite distinguendam), ad motus spasmodicos, et circulo hu-

morum per partes aequali adversos, vasculosum systema perducunt, — in genere, quae aut *inflammationes* non veras, secundarias, locales, *crysipelaceas*, vel sine ulla, vel saltem inflammatoria sine febre, vel cum illa, quam *nervosam* appellavimus (§. 50 — 90.), incedentes, accendunt, — aut universalem, localem in vasorum systemate atoniam progenerant, ac vitalem potentiam in eodem, aut vicinocontactu, aut per consensum infrangunt (§§. 92. 130. 274. 288. 317. 392.), — ea singula profluviorum ut causae considerari merentur.

Sunt vero causae, imprimis externae, quae peculiarem, et vix non, ut vocant, *specificam* actionem, solius *stimuli* ratione vix satis explicandam, in partes corporis diversas exercent. Sic morbillorum, scarlatinae, variolarum, syphilidis, contagia, — sic causa, catarrhos, tussimque ferinam epidemice producens, in faucium, et narium, et bronchiorum imprimis membranam pituitosam rapiuntur; sic mercurius quacunque sub forma, cautela, porrectus, salivales mox glandulas prae parte quacunque, extimulat, — cantharides, asparagus, terepithina, quin solum jam rhabarbarum, vel

Actio specifica.

sine stimulo in partes alias manifesto, in viarum urinalium superficiem, actionem potiore manifestant, etc. Vel sola de ob-scoenis cogitatio, jam sanguinem genitalibus abundantem transmittit, et fertilis liquoris secretionem, excretionem accelerat; a papillarum ad mammas suctione, lo-chiorum augetur excretio; solusque moeror animi, copiosas mox lacrymas profundit: quae singula non ob aliam rationem hic adducimus argumenta; quam ut actiones naturales, morbosas, non ubique tam a stimuli intensitate majori, aut minori, quam saepe a singulari ejusdem in partem vel istam, vel illam effectum, et a legibus sensibilitatis in quovis organo diversis ac propriis pendere demonstramus.

Prognosis.

§. 467. Varia profluviorum, pro humoris, qui disperditur, nobilitate, quantitate, pro celeri, vel magis lenta istius jactura, pro aetatis, temperamenti, sexus, ac morbi ratione, pro causarum, per quas oriuntur, natura, et pro symptomatum junctorum diversitate, est prognosis. Profluvia serosa, nisi major, aut repentina, vel in longum protracta sit excretio, cum damno minori ab aegrotantibus feruntur. Ubi *mucus*, aut *lym-*

lymphæ, vel cum istis, vel sola, copiose, aut in longum secedunt: majus est nutrientis principii dispendium, ac debilitas, quam ex seri excreti portione aequali, vel et longe superiori, major insequitur. Praeterea, quas partes hoc a blando liquore obduci, lubricari, laxari, et a mutua concretione praeservari, — quarumque nervos a nimia nuditate, siccitate, asperitate defendi oportuisset: hae, mucosa hac veste spolitate, in contrarios affectus labuntur. Huc celerior *chymi* ex ventriculo, et *chyli* per intestina ejectio, aut lymphæ ex laeso hujus laticis nutrientis canaliculo diuturna profusio, imprimis spectant, quæ si multum protrahantur; eventum corpori funestum, tabemque aut hydropem praedicunt. A *lactis* uberiori, aut longiori, quam par est, ex mammis profusione, mulieris sanitati non parum detrimenti infertur, ac proprii non modo corporis praescinditur nutritio; sed et pectori, apud matres graciliores, insidiae struuntur, fertilitas naturalis ad pauciores modo partus limitatur; vel utero suscepta nova proles necessario, in quibusdam, defraudatur alimento. Sed potissimum a *seminis*, aut praematura, aut senili

aetate, aut quovis demum vitae stadio frequentius, quam par est, aut alio, quam natura jubeat, modo excreti jactura labefactantur et contabescunt animalia. Vix interim tam ipsum, qui hic dissipatur, mucosum olidumque liquorem, quam *convulsivam*, quae hoc opus comitatur, totius systematis affectionem, debilitatis majoris in se rationem continere, vel ex eo comparet: quod et foemina, cui *semen* negatur, licet minus ac viri, a veneris abusu aut masturbatienis a vitio plectatur. A *sinoviae* per vulnera, vel abscessus ligamenta capsularia penetrantes effluvio, articulorum rigiditas, ankilosis immobilitas perfecta descendunt. *Puriformis* liquoris, vel et *puris* diuturna et copiosa secretio, praeter partis sic affectae laesionem, aegrotantes, ob nutrientis principii cum pure secedentis dispendium continuum, exhaurit: et hac ex ratione frequentius, quam *puris* resorpti effectum, febrem lentam, ac hydropem inducit. Quid a *sanguine* sincero, aliorum humorum penu dispersit, malorum nascatur, nemo est, qui ignoret. Prae aliis, infantes, — minus foeminae, quam viri, ab illius jactura offendantur; ac in genere hydro-

pes, et tabes, lypothymiae, et convulsio, mors ipsa, nunc citius, nunc tardius, haemorrhagias insequuntur.

Haec, ex profluviis oriunda, et quae alia in sequentibus dicemus, incommoda, vel ex eo frequenter augentur: quod natura iisdem, cum diutius persistent, aut saepius revertantur, facillime assuescat, et malorum sic induat, infaustam suo tempore, *habitudinem*. Haec est, quae chronicis, periodicisque profluviis tam despotice tunc imperet: ut restituto vix corpori nutriende, quem amiserat, succo; mox novae dira necessitas incumbat jacturae: quae vel ipsis roborantibus reluctatur, et ab illis, quae *falsam plenitudinem* imminuant, exasperatur remediis. Nec interim *bonis* ubique profluvia, tum serosa, tum mucosa, et sanguinea, privantur effectibus; sed, ut in febribus inflammatoriis saepe cruor ex naribus, vel ano, vel utero prorumpens, tum principio, saepe illas mox jugulat, tum earundem, sub iudicio, saepe *crisin* salutarem constituit; sic et fluxus naturales forte alibi suppressos, ad partem licet ab illa distantem, profluvia nunc supplent; nunc sub locali visceris plenitudine, aut sanguis, aut se-

rum, aut humor puriformis ex viciniis distillans, vel arte naturam immitante extractus, saepe turbas, quod alia vix possent, egregie moderatur.

Method.
general.

§. 468. Ex his apparet, non quodvis profluvium, sine causae latentis, sine morbi praegressi, habitudinis, ac symptomatum praesentium perspecta ratione, mox esse suppressendum. In genere, vel ex intensiori solidorum in fluida actione, vel ex vitio contrario, vel liquidorum ex culpa, nascantur profluvia: istorum, si pateant, si praestare id liceat, removeantur mox causae.

Sub impulsu aucto.

In primo quidem casu, in ipso jam stimuli exsuperantis effectu latet morbi, quem induxit, remedium: et expulso quod virium intemperantiam suffulserat, liquido, hae ipsae praescriptos sanitatis ad limites redire, ac profluvium suspendi haud raro observantur. Ars ipsa, ad nimios solidorum impulsus coercendos, ut in febris inflammatoriae (§. 120.) et in ipsius inflammationis (§. 133.) curatione docuimus, tum victu tenuiori, atmosphaerae ambientis refrigeratione, corporis animique necessaria quiete, ac illius positione opportuna, — tum blandis, ac nimiam irritabilitatem

corrigentibus, antiphlogisticis, ut vocant, remediis, et humoris systemati vel integro, vel speciali, molesti, vel generali, vel locali evacuatione, utatur oportet. Hinc a praepostero profluvia, hoc sub casu, sistendi conamine, ipsius sanationis non raro praescinditur subsidium, et morbi vel causa, vel, quae istius effectus multiplicat, nimia, pro hoc statu irritationis, liquidorum abundantia, in corpore includitur: unde viscerum infarctus, inflammatio, suppuratio, ac tabes, saepe primam sibi promunt originem. Sed quod natura hic adhibet profluyii in profluvio subsidium: hoc ipsum discrimine non vacat; ac malo saepe pejus est, et lethales non raro exitus agnoscit, remedium. Hinc per indicatas, et quae moderamen admittant, opportunis in locis, depletiones, non providam ubique, ars suppleat naturam, et easdem sic dirrigat necesse est: ne sibi, artificiali cum profluvio, tam facile morbi causas, quam effectus, a solidis auferri posse, videatur. Saepe stimulus, a vera plenitudine quamplurimum diversus, hominum robustorum in solidis tumultus insignes, et plethorae non modo signa, sed profluvia excitare observatur:

quae, vasorum quidem depletionem, ut majori jacturae occurramus, sibi exigunt; sed certe non illam, quam natura, vel ars ipsa, sine habito ad causae stimulantis, nec per solam humorum evacuationem eliminandae, naturam respectu, uberiores instituit, exspectant. Non rarum est, ab acri rheumatico, vel alio, vasorum systema nunc omne, nunc certis in partibus, violentos ad motus excitari: qui profluvia, ut vocant, *activa* inducant, venaesectionibus, ac eorum quae aestus infringant, usu perutiliter moderanda; sed donec adhaerens, quae stimulat, materia, has partes dimittat; profluvia continuant, nec in solis antiphlogisticis est positum hujus mali remedium; nec robusti, ac ad morbos a solidorum vim nimia promptioris sub corporis habitu, *nervosum* systema principalem saepe scenam non ludit: et sub tali rerum apparatu, tum fluxus ipse, post primas modo turbas a venaesectione, vel ab ipso profluvio sedatas, magis *opio*, quam sic dictis antiphlogisticis, obediunt.

Sub tenore
imminuto.

Si profluvia ex potentiae vitalis aut in toto, aut in partibus *imminuto* tenore, aut laesione continui oriantur; tunc, deposita

antiphlogisticae methodi idea, praemisso ubique causarum (§. 466.) scrutinio, ad illa, quae vasorum laesioni, inertiae, aut nervosae affectioni, hanc ipsam mentienti, generali, locali, opitulentur, sollicitè recurrendum est. Ad *symptomaticas*, vel ex *consensu* pendentes, plerumque haec profluvia reducenda sunt aegritudines: atque hinc vel morbo primario, vel causae alibi locorum degenti, adhibeatur medicina. Sic in profluviiis ex scorbuto inductis, licet debilitas subesse videatur; non tam felix eorum, quae maxime vel totum, vel partem corroborent, quam succorum vegetabilium, acidorum, est virtus. Sic ex febris intermittens forte causis pendenti, periodico profluvio, peruvianum mox corticem — ex nervosis affectibus orienti, narcotica, nervina medicamenta opponimus; nascentem ex causa biliosa, suburali haemorrhagiam, methodo (§. 109.) indicata, seu emetico, purgantibus, non alio, vel locali subsidio compescimus. Si febris nervosae, contagiosae symptomata profluvium comitentur: ad ea, quae (§. 94.) diximus, auxilia descendimus; quae debilitatem solidorum, universalem, specialem, pro causa, fluxus

agnoscunt; hos, illinc victus uberior, vinum generosum, aromatica, cortex, martialia, exercitium moderatum, aer rusticanus, — hic vero frigida, adstringentia imposita, injecta, et fasciae componunt; profluvio ex acri, ab externis ad viscera repulso venienti, non alia, quam quae ad pellem hoc reducant, aut corrigant, conducunt: etc.

Sub vitio
humorum.

Haec ipsa, ex parte jam illa, quae humoribus tribuuntur, vitia comprehendunt: ut quae, si interdum profluviiis subesse videntur: remedia, tum causis (§ 466.) opposita, tum alia, quae symptomata compe-
scant, requirunt.

O R D. I.

P R O F L U V I A S E R O S A.

G E N. I.

E P H I D R O S I S.

§. 469. Quem per amplissimam cutis superficiem continuo exspiramus, vapor, animalis sub specie distillationis, ab atmosphaerae, se ipso frigidioris contactu in guttulas condensus, *sudorem* constituit. Hic liquor, in sanis coeterum hominibus, transpirationis a materia vix aliter, quam pinguedinosi principii, vel ex adipis subcutanei, vel ex sebi folliculosi connubio oriundi, distinguitur; sed aquosum, viscidulum, subsalsum, ac *urine tenuiori* vix non aequalem humorem nobis offert. Interim, quae, praeter aquam et volatilem materiam, qua canis jam deleta heri absentis vestigia insequitur et ab aliis distinguit, — vel quae partim ex alimentis olentibus ad pellem, vix integre subacta, pertingit, partim distinctis ex glandulis ad genitalia, pedum inter digitos, ad

Sudoris natura.

axillas secernitur? principia, humana ex cute atmosphaerae reddantur: haec, ab illis, quae pulmones mephitica exhalant, diversa, licet ex retropressi sudoris effectibus, perniciosi quid habere suspicemur, cum sileant experimenta, hucusque ignoramus,

Definitio.

§. 470. Sudor ipse in sano homine ubique violentus; et hinc mitis quidem, sed in ea, quae sudat, parte morbus est. Hacc vero secretio cutanea, vel naturalis, vel ab ista diversa, cum virium jactura nunc, ut sub crisi, imminuta, nunc adaucta, *Ephidrosis* vel *sudatio morbosa* vocatur.

Diversitas.

§. 471. Hoc autem sub statu (§. 470.), sudoris plerumque non modo copia, sed et ipsa principia, quod in urinis morboris contingit, mutari atque aliis aliisque misceri videntur. Nunc *tenuis* certe et purus sudor, sub calore non magno, mox a cute in auras ut vapor ascendit; aut limpidus per membra, ut lintea vix tingat, distillat; nunc ut crassum, viscosum, frigidumque gluten superficiem uremtem obducit; vel mora siccatum, hanc ipsam, quasi matulam urinae, sedimento mucoso, spissiori, ac interdum arenoso, conspurcat; nunc odorem hic latex naturalem seu proprium, cuiusvis homini distinctum, con-

servat; mox *specificum, acetosum, urinosum, cada-
verosum* spirat, ac princeps contagiorum ve-
hiculum constituit. Sapor hic, vix notabilis;
ibi *salsus, amarus, aut subduls*, ac *melleus* appa-
ret. Ob tam varia, nec hucusque satis, pro
materiae dignitate, examinata piincipia, su-
doris quoque *color nunc pallide flavescent, nunc
lacteus, vel croceus, sanguineus, ac interdum sub-
viridis, coeruleus, aut ater* occurrit. Nunc vero
partem modo *unam* sudor, vel alteram hu-
mectat, aut ex *latere modo uno* exprimitur;
nunc ex cute *universa* propullat, et hic, *istius*
ex *vitio*, — illinc, *visceris consensu*, vel alte-
rius ut morbi *symptoma*, nunc prorsus *sine
febre, nunc eadem, vel continua, vel intermit-
tende periodica, vel hectica, stipatus, modo
quovis sine fructu modo criticus, atque in isto
moderatus, in illo copiosus, colliquativus* prorumpit.
Sub coelo ardente humidoque *endemicus*
quasi sudor est; ac interdum *epidemice* per
provincias cum periculo, fere *pestis* adin-
star, grassatur. Vel sub ipsa sanitate, cer-
torum cutis hominum foetorem insignem
continuo expirat.

§. 472. De sudore febrili, vel *symptomatico*, Natura
morbi.
qui sub continuarum principio, vel mutili-
ter, vel manifesto cum damno, profundi-

tur; aut qui intermittentium paroxysmos, non febrim ipsam, claudit, — vel *critico*, qui morbi sub fine, — rarius, et per artem, contagiosarum sub febrium initiis, expellitur, jam diximus (§§. 6. 16. 35. 85. 87. 88. 91. 94. 97. 100. 140. 186. 325. 331. 332.); et cui pellis cum visceribus, potissimum abdominis, et cum uterò, *consensui* subiaceat; *exanthematum* (Lib. III.), ac *impetiginum* (L. IV.) satis docuit historia. Hinc pauca de sudore dicenda supersunt, quae secundarium non magis quam primum cutis morbum respiciant.

Sunt, quibus urinae copiosius, quam aliis, — sunt, quibus alvus frequentius in die, sanissimis, solvantur. Sic et cutis in multis abunde transpirat, facilesque sudores, sine virium jactura, et quin morbum adesse dicamus, per propriam naturam contingunt. His, axillae, pedes illis, continuo, quin ex suppressi hic locorum sudoris phoenomenis ad praeivium in humoribus vitium concludere mox liceat (§. 373.), madescunt. Sed quemadmodum aliarum organa secretionum, nunc, a stimulo. aut sibi ipsis admo- to, aut visceri affini adhaerente, agitata, functionem, cui praesunt, accelerant, per-

vertunt, aut protinus suspendunt; nunc, vel ob virium propriarum defectum, vel ob causae deprimentis, longinque actionem, mox tardius parciusque absolvunt, aut deserunt; mox impulsui humorum resistentiam non ponunt, ac laticem susceptum, iners ut cribum, transmittunt; sic et cutis, certe saepius ex consensu, vel morbi non sui devicta imperio, sed interdum vel *nisu*, vel *inertia sibi propriis*, a sudore copioso, vel ubique, vel certas ad partes inundatur. Verum est, et a cordis vasorumque vigore ad-
aucto, et a stimulo per consensum in pellem dominante, sudores moveri; sed nunc, sub intenso febris inflammatoriae impulsu, haec ipsa sudoribus siccissima resistit; nunc, absente stimuli cujusvis insoliti indicio, hoc organum vel sponte mollescit, ac proprii humoris delectatur in balneo. Nemo est, cui, vel stragulis modo leviter ob-
tecto, matutinis sub horis, sine febre, et quovis interno sine stimulo, sudores non interdum sat largiter prorumpant, diversum a naturali odorem manifestent, et novas quasi corpori vires, et pridie ignotam animo hilarisatem concilient. Alii sine causa evidenti, sine febre, sudoribus potissi-

num nocturnis, per menses diffluere, ac macie, debilitate, inappetentia mulctari cernuntur. Mutuum renes inter et cutem, vel apud sanissimos, secretionis commercium existit; ac minorem illorum actionem, istius mox functio addaucta, — non modo per vaporem invisibilem, sed et per sudores, sub eadem positione, faciliores, ac vicissim, supplere consuevit. Vel ipsi, quos *criticos* appellant, sudores, saepe cutis solius actione, sine, stimuli, vel debilitatis febrilis augmento, sine quovis longinquo consensu, quin praevisio sub caloris decremento, copiosi ex cute distillant; ac sicut febrium plurimarum in pelle prima sentatio ac forsitan origo est: sic et criticos sudores aut levis in ista horror, aut pruritus, aut certe singularis tractabilitas et mollities, cum pulsu molliori ac undoso; praecedunt: quae singula sat clare manifestant, hanc partem corporis tant late expansam, tam sensilem, totque vasis ornata, non servile ut colon, sed frequenter vi propria, humorum nunc undas repellere, ac vaporem sudores arcere; nunc aperto illos sinu suscipere, ac in corporis vel beneficium, vel certam perniciem, hos ipsos uberius profundere.

§. 473. Sed ipsa causarum, quae cutis secretionem adaugent, vel immutant, natura, haec (§. 472.) uterius illustrat. Ac *primo* quidem quaecunque, vel in sanguinem delata, vel irritationis localis imperio, cordis vasorumque influida contenta impetum adaugent, nisi majori, quam par est, stimulo agentur, aut inextremis vasculorum ostiis obstaculum resistat, ea, secretionem in genere, — atque, nisi frigus externum, quod ubique non facit, hoc impediat, sed tepor gratus ad recipiendas cruoris undas vasa cutis disponat, atque velsiccus, vasculorum extremitates exstimulat, vel humidus, relaxat; sudoris illam promovere pernoscimus. *Secundo*, quae corpus humore tenui aquoso locupletant, quin hic ipse, vel ob cutis a frigore, a densitate majori resistentiam, vel ob salinam forte liquidi naturam, ad renes, quibus haec magis favet, potissimum dirigatur, aut in tela cellulari subcutanea, anasarcae sub specie, restagnet: ea, sub conditione corporis ac atmosphaerae vix exposita, ac imprimis sub urinae alvique excretionibus moderatis, aut tardis, transpirationis sudorisque augmentum producant. Quae *tertio*, principia in sanguinem deducta, vel

ob *volatilem*, qua pollent, naturam, vel ob indolem incognitam, sub eodem rerum statu, aut majorem cum pelle affinitatem alunt, aut vasorum exhalantium extrema potissimum afficiunt: ea, licet glandulae sudoris non praesint secretioni; istius tamen, cum nihil est, quod obsit, incremento, prae aliis, favere videntur. *Quarto* vero, quae res interna vel proprio contactu, vel actione longinqua, contextum cutis relaxant, aut nervorum in istam imperium refringunt: illa non minus, ac ea, quae exterius admota hunc ad finem conspirant, cutis rivulos aperiant, aut potius vitali, qua in sano homine clauduntur, custodia privant. Hinc vel solus musculorum motus, cutis frictio, irritantia quaecunque, vel excitans animum viresque cordis pathema, vel febris, vel actus atmosphaerae calor, transpirationem, et cum singula conspirent, sudores, accelerant. Hinc vel solus jam potus copiosus, vel caloris insimul principio suffultus, tam facile per cutem, nisi frigore vel aliter contractam, nunc vaporum sub forma, nunc in guttulas collectus, mox diffluit. Hinc superaddito huic potulento volatilis, aromaticae naturae medicamento, eo certius, si modo

ath-

athmosphaerae non reluctetur conditio, sudores proliciuntur. In genere contagia, non pauca, variolosum imprimis (§. 531.), prae aliis morborum causis, aut cutem ipsam invadunt; aut in illam ex longinquo dominantur: ac non raro, quin illorum aut in vasa impetus, aut deprimens in nervos actio id ipsum ubique efficere videatur, sudores expellunt. Hinc demum ipsa fluidorum a vasculis cutaneis, ob calorem externum, ob laxitatem, ob circuli sanguinei ad viscera impedimenta, vel ob spasmos internos, receptorum multitudo, ac eorundem, a potu copiosius assumpto, tenuitas, — aut iterum illorum a contagioso, vel et purulento principio mutata conditio, — vel arcte circumfluens aut partis, aut corporis totius vapor athmosphaericus, aut proprius, vel congestus in primis viis ac abdominales in nervos agens saburrarum putridarum fomes, vel inhaerens vento meridionali incognita nervisque inimica potestas, — vel febris *elodes* (§. 85.), *diaphoreticae* intermittentis (§. 35.) causa, — vel demum nervorum, ut ad partes modo quasdam, vel ut in convalescentibus, in debilioribus, somnoque meridiano, nocturno detentis, aut

scorbuticis hominibus, sub terrore, doloribus, anxietate, lipothymia, vel agonia suspensum, aut vix non prorsus ablatum in cutem imperium,—frequentem, atque saepe nimis in febribus nervosis, contagiosis funestam, sudorum sistunt scaturiginem, ac loco blandi tenuisque liquidi, humorem alienis principiis, atque ipso interdum sanguine, inquinatum ex pelle profluere cogunt. An sub *colliquativo*, ut appellant, viscidiori plerumque, sudore, cujus a fluxu mox corpus contabescit, ut in urina illorum, quos *diabetes* (§. 480.) exhaustit, *saccharinum*, aut nutriens principium per cutem quotidie diffatur?... certe chylus aut humor lacteus per vasa cutis cum sanguine circumactus *sudoris acidi* in multis rationem offerre, ac sudoris, licet rarioribus exemplis, nunc *laetei*, nunc *mellei*, nunc *oleaginosi*, *crystallini*, observatio, id indicare videntur; atque primam, quae dabitur, haec experiundi, nanciscemur occasionem.

Prognosis.

§. 474. Quod sudoris febrilis, symptomatici aut critici, ad *prognosin* attinet, hanc alibi jam satis exposuimus. Nec sermo hic esse potest de aliorum morborum sudoribus: ut quorum significatio ex illorum

natura potissimum desumitur. In genere sudores, sine febris aut stimuli alterius ratione, vel in parte, vel ad omnem superficiem facilius, quam par est, prodeuntes, istarum debilitatem, vim nervosam infractam, vel obstacula circulationis, secretionum excretionum aliarum, interna portendunt, et quo profusius per cutem distillant, aut quo magis a naturali tenuitate, colore, odore, sapore, recedunt: eo majus vel de solidorum fluidorumque turbis, vel de secretionis cutaneae vitio, atque de humorum utilium jactura, testimonium largiuntur. Qui interim ad pedes, axillas, in multis sudor prorumpit: hic, licet foetidus ac ingratus, sanitatem non ita, ut incaute suppressus, offendit. Qui sub tabe purulenta, vel alia, profusus ex cute sudor ruit, hic citum vitae miserandae terminum imponit; aut per frigus externum retentus, diarrhoeam colliquativam inducit.

§. 475. Sudori febrili, tum symptomati- Cuta-
co, tum critico, medendi rationem exposuimus (Lib. I. II. III.). Aliorum qui morbos quoscunque ut symptoma comitantur,

medela vel ex tradita istorum, et causarum, e quibus oriuntur, doctrina elucet; vel ex iis, quae alibi dicenda supersunt, patebit. Qui ex contracta cum hac pellis excretionis consuetudine sudores nascuntur: hos per artem arcere, jam dicta pericula vetant. Qui interno sine morbo facilius, quam par est, sudores prosiliunt: hos, illa, quae sudoris habitudinem inducant fugiendo, sepositis potu balneoque tepidis, diaphoreticis, ac nimis, quibus cutis mollities augetur, vestimentis, debilitate per corporis exercitia, frictiones, balneorum frigiorum, aut simplicium, maritimorum, aut corticis peruviani, vel salicis albae decocto junctorum auxilio, correctis, vel unguentis oleosis dissipari licebit. Illorum, qui ex morbis gravioribus resurgunt, sudores, per victum nutriendum, vini haustum generosi, per elixir vitrioli, ac quotidianam in aere liberi et puro equitationem, vel per navigationem fraenantur. Infusum salviae, cinamoni, cum vino paratum, quam optime huic fini respondet. Nimios sub aestatis calore sudores superaddita potulentis spirituosius portio liquoris, et quies mode-

rantur. Plures vero, sub coelo calido, ob sudorum impatientiam, gravissimis, ab illorum suppressione, morbis occasionem dederunt.



ORD. I. GEN. II.

DIABETES.

Secret urinae vitia.

§. 476. **Q**uod *renes* secernunt, ac vesica perurethram dato tempore expellit liquidum, pro hominis aut sani, aut morborum aetate, sexu, temperamento, — pro potus, cibi, medicamenti ingesti, — pro coeli, atmosphaerae, — pro cutaneae, alvinae excretionis, — pro corporis, quin pro animi ipsius aut quieti, aut stimulis agitati, — ac demum pro temporis, quo suis in alveis retinetur ac stagnat, conditione, tam copia, quam indole diversum: hoc, vel abundantia, paritate, principiis vitiatum, vel a naturali non tam alienum, aut citius quam par est, aut praeter voluntatis imperium, aut tardius et cum labore excretum, vel protinus suspensum, plurimorum, nunc signum ac effectus, nunc causam morborum constituit. Ex istis modo illi, qui ex lotio, vel coctia insigniter adaucto, vel naturae praeter leges, principio nutriente onusto, vel aegro-

to nolente ac inscie excreto, nascuntur, profluviorum ad classem spectantes, *diabetis*, ac *enuresis* sub titulo, attentionem sibi nostram exposcunt.

§. 477. Rarissimam aegritudinem dixerunt esse *Diabetem* sive *Dipsacum*: ac nos ipsi, Diabetis infrequ. viginti perannos in *Patria Germana*, diversas inter gentes, medicinam exercentes, modotria, quae multis nec unquam se offerunt, hujus morbi conspeximus exempla. In *Italiam* transvectis interim, *diabetes* nobis, vel brevi octo annorum curriculo, jam septies oblatum est; nec dubium nunc quidem alimus, hunc morbum frequentius, quam cum aliis non ita pridem nos ipsi credebamus, ubique locorum occurrere, et a medicis, in urinae *quantitatem*, aut *saporem* haud satis attentis, non semel non adverti.

§. 478. Est autem *Diabetes* vera corporis Definitio. per urinam colliquatio, aut lotii profluvium, vel copia potum longe superante, ut plurimum, vel *principii saccharini* admistione excedens, cum siti inexplibili, cute arida squamosa et macie extrema sine febre in longum plerumque incedens.

§. 479. Vario sub aspectu hic morbus in- Divisio. cedit, ac in plures hinc species distinctus

fuit. Nunc etenim *insipida*, aquosa, nunc, quasi a melle admisto, *dulcis*, quae excernitur, *urina* est. Quem *lacteum* (*chyluriam*, *coeliacam urinalem*) dixerunt: hunc, si ab *urina*, *subalbida*, quae, susceptâ, largas post *epulas*, sat valida deambulatione, a sanis hominibus subinde, sine damno, excernitur, recedamus, nos ipsi nunquam conspeximus diabetem; atque multis *purulentam*, cum *urin*is certe non raro copiose remistam, pro *chylo* imposuisse suspicamur materiam. Non interim *lacteum* colore diabetem, viri scilicet septuagenarii hoc in *Ticinensi* nosocomio degentis, observatione freti, exisere prorsus negabimus. Hic scilicet, ob insigni humeris sat longo tempore impositum pondus, post octo demum a nixu dies, ab insigni ad ultimas lumborum vertebrae dolore, tandem a febricula hinc inde, ad noctem crescente, correptus, insigniter sitire, et *urinas quasi lacteas* atque adeo copiosas excernere coepit: ut plures per menses quotidie, nunc sexdecim, nunc viginti hujus liquidi subdulcis libras, potum, licet plurimum ingereret, non parum superantes, per urethram expelleret. Sitis ingens, fames aucta, et *macies torosi* prius hominis

extrema, cum tanta urinae copia collata, hoc in casu vix adeo *purulentam*, quam illam, quae diabetem comitatur, tabem latuisse, indicare videntur. Nec desunt similia, apud alios, *chylosi diabetis*, quae difficulter a purulenta materia repetamus, exempla. Quem *lienteriam urinalem* compellant, in qua, celerrima et copiosissima potus assumti, nec mutati, per renes et vesicam evacuatio contingat, conspeximus nunquam. Nec *mucosam* hoc in morbo urinarum naturam, nisi *mucum*, qui tenui pallidoque liquori dulcedinem conciliat, appellent, observare potuimus. Qui diabetem *idiopathicum* a *symptomatico* distinguunt: hi forsitan sat recte id faciunt; sed ultra, quam nobis quidem de hujus mali origine constet, sapere videntur; aut *spurium*, *hystericum* *febrilem*, *rheumaticum*, qui sine tabe ac siti tam intensa incedit, cum *vero* diabete confundunt. Sed quamvis per longum tempus decurrere hic morbus consuescat; non desunt ideo, *acuti*, brevi tempore *lethalis*, quin *periodici*, *intermittentis*, et *critici*, nisi *spurius* hic fuerit, diabetis exempla: et ipse, quem in *clinico Instituto* curavimus, aegrotus, cum sub calore aestivo, ac coelo sereno, parum in

urinis excederet: autumnali ac hiemali sub frigore, vel cum pluviae instarent, quamplurimas mingebat. *Congenitum* diabetem, nisi majorem illam, vel sanos apud homines, qui forte parcius transpirant, urinarum copiam pro tali declarent, non vidimus. Duos unius ejusdemque familiae homines ex diabete periisse, compertum habemus; ac duorum, qui ambo hoc morbo laborarunt, fratrum, alibi exemplum narratur. *Complicatum cum urinae incontinentia* diabetem non ita pridem in sene, — *pleuriticis dolores* duobus in viris, atque in uno existis, *diarrhocum* simul cum diabete *insipido*, *tethali*, — tum in hoc vero, tum in aliis quibusdam, *leucophlegmatiam*, *hydropem* simul, *ascitem*, qui saepius dispersus, mox iterum redibat, observavimus. Rarissima complicationis hoc in morbo est species, quae *retentionem urinae*, quamplurimae quamvis copia parva potus assumeretur, diabetem comitata esse refertur. Hinc licet hoc in morbo urina plerumque sine quovis dolore, atque sub coactae quidem, sed non deletae voluntatis imperio mingatur; est tamen ubi non tam faciles ejusdem, a *dy-suria*, ab *enuresi*, distinctio habeatur; nisi vel

ad *copiam* urinarum, potulentis ciboque fluido ingestis longe uberiores, vel ad *melleum* earundem sorem, ad *sitim* intensissimam, et ad *maciem* aegrotantis extremam simul respiciamus. Vel *paucam* urinam, sed *dulcem*, et tabis, ut in morbo communi, causam, sistit *diabetes decipiens*,

§. 480. Prima, quae in diabetis, quos *Symptom.* vidimus, occurrebant, et *ex improvise* plerumque hominem prehendebant, symptomata, *oris siccitas subitanea*, ac *sitis* vix poculo a labris remoto recurrens, nec verbis describenda, fuerunt: et urinae non prius, ac a potu copiosius ingesto, augmentum habere. Interdum mosbus a siti, ac urinae profluvio *simul incepisse* refertur; sed et sanos apud homines vix ab aquis affatim epotis, mox lotium excerni, tam rarum non est; ac urinae sub diabete non minus copiam, quam nutrientis, quae cum ista secedit, materiae iacturam, ab ipso potu tam exuberante repetere liceret: nisi major longe, quam per fauces ingeratur, liquidorum ex vesica quantitas prorumperet.

Haec ipsa vero tanta hoc in morbo esse *Urinae copia.* solet: ut, cum puella non nisi *septem* tum solidi alimenti, tum potus *libras* assumisset,

tringinta sex tamen pintas urinae dimitteret. In viro paucos ante annos a nobis ad Clinicum Institutum suscepto, urinae quotidie ad libras quadraginta, vel et, semel, quinquaginta cum duabus ascendebant. Majorem urinae quantitatem hoc in morbo excerni, alii viderunt. Vix mitior nobis casus oblatus est, in quo non lotium ad dimidium, vel duas tertias ad partes, ingesta, — et excreti liquoris pondus, jam paucas post dies, illud corporis totius quam maxime superaret.

Atque sub tali aegrotantis positione, saepe frigoris, aut frigescentis quasi liquidi ex lumbis in vesicam descendentis sensatio, ardor stomachi, et calor viscerum mordax, — interdum dolar ad suras, aut pedem, insignis ubique virium prostratio, cutis arida, plerumque squamosa, porrigo, hunc morbum comitantur. *Anorexiam*, quam aliqui diabeticis attribuunt, vel *aquae horrorem*, quem fidi auctores hoc in morbo se vidisse testantur, haud unquam observavimus. In unico aegrotante febris, mox morbi ab initio, jam aderat, ac intermittentis tertianae quasi typum imitare videbatur; alias, plerumque febre, donec morbus adolescat, carere videntur. Vix non apud omnes, vel

sub ipso *sitis incipientis* momento, vel paulo tardius, magna, nec a consueto convallescentibus cibo, apud nos sat copioso, mitiganda *fames* in conspectum prodibat crescente morbo quamplurimum, donec febris sat conspicua se adderet, adaucta: quo tempore et arteriae debiliores, mollissimae, et tandem crebriores sentiuntur, debilitas quotidie increscit, atque calor, ut singula symptomata, ad noctem exacerbari observantur. *Noctis* tempore praesertim, inter diabetis principia, urinae copiam majorem fluxisse, apud alios notatur. Potens quondam veneris in castris miles, hoc a morbo vix correptus, non modo omnem cum uxore coeundi potentiam, sed, ut nobis referebat, seminalis vestigia liquoris, in totum amisit. Interea plerisque oris labia cum lingua, et faucibus insigniter siccescunt, et vox debilis, fere rauca, cum tenaci ad gulam pituita et spumosa saliva persaepe observantur. In alio, dolorem ad fauces, sine phlogosi, constantem, vehementem, ac pustulas ad linguam ac labia exortas conspeximus. Sed sub linguae vel naturali, vel, a potu tam copiose assumpto, artificiali maiore, non minor sitis in aegrotis quibus-

dam, ut vidimus, ardebat: ut quae certe apud omnes magis impetiosa est, quam sub febre quavis ardentissima, et sub majori faucium, ac in *diabete*, siccitate, vel unquam alibi potus desiderium viderimus flagrasse.

Urinae dul-
cedo.

Sed ipsa urinarum natura, quae res Veteres omnino latebat, hoc in morbo mutata est. Quamvis enim et ab aliis, et a nobis ipsis, *insipidam* vel expertem dulcedinis urinam aliquando observari licuerit; plerumque tamen in ista, licet pallida, serosa, limpidissima, *sapor melleus*, vel succo *alni betulae*, verno tempore perforato e trunco profluenti, persimilis dulcedo se prodit. Hoc lotium ad ignem vapores suaveolentes exhalat, atque ad certam spissitudinem redactum, melliformem, bruneam, vel saccharinam, — atque ulteriori solutione, inspissatione, facile depurandam, et ad sacchari communis puritatem, saporem, colorem reducendam largitur materiam; vel sibi ipsi commissum, fermentationem tum vinosam, tum acidam subire observatur. Pulcherrimas *acidi saccharini crystallos*, *alcohol*, et *acetum* hoc animali ex liquido parata, in *pathologico* hujus Regiae Academiae musco con-

servamus; atque ex quatuor et viginti urinae libris, viginti sex materiae saccharinae uncias obtinuimus; nec desunt, qui majorem istius quantitatem diabeticorum ex lotio deduxerint.

Quod interium ex *uncia* hucusque alterius observatione, non ita pridem, innotuit, D. deri-
piens. est saccharini principii in urinis aegrotantis, tabe lenta consumti, *licet ultra, quam sanus consueverat, aut quam ingestas exigent, non mingeret,* quantitas tam insignis: ut ex duabus urinae libris, saccharinae non minus, quam sex uncias, prodirent substantiae: quo tempore coetera diabetis symptomata, sitis indelebilis, lingua sicca, cutis arida et quamosa, aegrotandem vexabant: donec morbo, sub deliriis, convulsionibus, ad mortem properante, illud ipsum in urinis principium ad quartam sui partem decresceret.

In genere hic morbus *lentissime* decurrit, atque per annos non raro protrahitur. *Acutioris*, ut diximus, pauciora, nec visa nobis, exempla diabetis habentur. Nec rarum est, sub tam diuturno morbi decursu, urinas ad *sanas* interdum paulisper accedere, ac odorem non tam suavem, sed quidquam foetentem, ut sane faciunt, spargere; atque sa-

lia, sub evaporatione, diversa, ad majorem quantitatem, largiri; sed mox, vel quovis, tam vegetabili, quam *animali* sub victu, ad pristinam dulcedinem urinae recedunt. Nocturno sub tempore majorem aegroti nobis copiam urinae, ac interdiu, *continuo* dederunt; et ob crudelem, mox a poculis ab ore remotis, istius siccitatem, vel, esti hoc satis maderet, ob sempiternam tum bibendi, tum mingendi necessitatem, vix palpebrae a miseris clauduntur, Hinc major indies debilitas, cutis siccitas pergamena, ac macies, quam ultimam tamen aliqui defuisse viderunt, sequuntur: et sub tam insigni licet aquarum profluvio, ad pedes tamen, ad lumbos oedema, et ad ventrem ascites, nascuntur; vel hydropi diabetem, huic vero hydropem vicissim successisse, alii testantur; vel, ut in diabete *insipido* conspeximus, et alii notarunt, *diarrhoea*, quae paucos juvisse dicitur, miserias adauget. Hoc tandem rerum sub statu, calores vespertini, pulsus debilissimi, frequentes, anorexia, anxietates, tremores, stupor, lipothymiae, vox rauca, deleta, urinarum profluvio se adjungunt, atque optatum aegritudini tam dirae, ac vitae ipsi finem imponunt.

Vel

Vel ipsum sanguinis hoc in morbo a quibusdam educti *serum* aliquando, non ubique, *dulcedinem*, — *crur* ipse, *crustam* nunc aliquam, nunc vero nullam exhibuit. *Salivatio*nis ac *diabetis*, quae vicissim incesserint, exemplum narratur; sed an *dulcis* tunc *saliva* effluerit (§. 491.) observationi, quod plurimum lucis accendisset, non additur.

Quam longe a *spurio*, ut vocant, *diabete* D. *spurius*; haec distant; et quam parum hunc inter et *verum* affinitatis intercedit! Sunt scilicet, qui a prima juventute copiosas, sed non diversas a statu naturali urinas excernant; sunt, qui sub spasmis hystericis, hypochondriacis, dentitionis sub opere, in rheumaticis affectibus, sub crisi morborum, sub hydrope, ab epoto diuretico medicamine, copiosas pallidasque profundant urinas; sed vel sitis vix urget; vel potum ingestum non superat excretio; vel parum haec ipsa in longum extenditur; nec adeo mutata est urinarum a sanis conditio; nec macies, debilitas extrema, *symptomaticos* hos fluxus comitantur.

Viros saepius, quam foeminas, a *vero diabete* consumi, ex nostris saltem, quae hujus morbi in istis exemplum haud suggerunt, et ex non multis, quae apud alios occur-

runt, observationibus conjicere licebit, Coeterum et juvenem, octavum cum decimo vix annum superantem, et mediae aetatis viros, et septugenarium jam, sed floridum adhuc robustumque senem, hoc a fluxu correptos conspeximus.

Causae.

§. 481. Obscurissima causarum hoc in morbo est ratio: et ex illis, quas coeteris profluviiis subesse videmus, vix ulla diabetis satis explicat phaenomena. Qui *locali* pro affectu eundem considerant: hi *renalium vasorum laxitatem, debilitatem, aut paresin* subesse opinantur; ac renum, diabeticorum a morte, pallidorum, molliorum, acidumque odorem spirantium, nec ignota nobis, exempla adducunt. Quos, viri, ex diabete defacti, junioris, renes *injectione* anatomica praeparari curabamus: hi, sub impetu moderato, *lacerationem* vasorum sunt passi. Sed forsitan ob longiorem, a morte, istorum in tepida macerationem hoc ita successit; ac certe frequentius haec renum ac tubulorum secermentium debilitas, dilatatio morbosa, post inflammationes hujus visceris, post diuturnas urinae suppressiones, post mixtum sanguinis cruentum, purulentum, quin diabetes sequatur, — ac morbi magis

effectu, quam ut causa, subesse, — nec sola partis secernentis major debilitas, secretionis in illa augmentum, — ac maiorem longe urinarum, quam liquidi ingesticopiam, explicare videntur. Qui *spasmodicos* inter affectus hunc morbum collocandum esse contendunt: hi, validioribus innixi argumentis, *spurium* diabetem sub spasmis hystericis, ab animi pathemate, a dulcibus ingestis, dentitionis a simulo frequentem pro exemplo adducunt. Interim, vel ipsae, quae a *spurio* tam frequenter *diabete* tenentur exempla *veri* vix offerunt, *hystericæ*; ac sub tam quotidiana morborum spasmodicorum frequentia, diabetes rarissimos inter morbos censetur, et vel ipsi *nephralgiae* vix unquam accedit. Renali sub *calculo* diabetis hinc inde exempla narrantur; sed praeterquod sub tam frequenti calculorum praesentia hic morbus rarissime occurrat: copiosior hunc necdum uriua constituit; et certe *cum calculo* diabetes incedere, quin *ex hoc ipso* oriatur, potest. Ex *renali abscessu* diabetis originem petierunt, qui, *lactescētis urinae* aspectu decepti, *puris* in lotio solutionem pro fluxu *chylōso*; — et hunc ipsum pro *diabete* habuerunt. In *hepar* alii obstructum, scirrhum, ac in

bilem vitiatam, vel saponis adinstar humores solventem, vel, si prorsus deesset, non satis aquam cum cruore miscentem, diabetis causam collocarunt; ast vero tam plurima, sine hepatis, aut visceris alterius obstructione hujus morbi exempla habentur; quam ipso sub *ictero* diabetes vix sequitur: ac rarior foret, pro causa tam communi, effectus, quam ut aliquam haec opinio auctortatem tueatur. Sunt, qui potius in *ventriculorum, intestina, et in assimilationis ex debilitate istorum pendentem defectum*, quam praedictas, aut alias in causas, hujus culpam aegritudinis conjiciant; sed cum plurimorum, qui diabete laborant, *famem*, et *sympsomatum*, quae *stomachi inertiam* nobis indicent, absentiam consideremus: nec haec squidem fundamento fulciri sat firmo videtur opinio. Cum vero tam siccam, ac saepe squamosam in diabete *cutem* observarent, et simul ad urinae copiam, ingesta quaevis quamplurimum superantem respicerent: non pauci illo ipso in organo hujus morbi, tam in arteriarum *exhalantium* obturatione, quam in aucta vasorum *inhalantium* in cute actione, et in aqua copiosius atmosphaerae ex penu ab iisdem resorpta, originem eo

magis derivarunt: quod constrictis vel hiemali sub frigore, vel a terrore, aut spasmo, vel abdominali a stimulo, cutis spiraculis, urinarum mox quantitas et pallor augerentur. Interim, praeter quod eam ipsam, quae ad cutem sese prodit, *siccitatem*, non minori argumento pro *effectu*, quam pro *causa* aegritudinis declarare queamus; cur tanta hic *sitis*, ac tanta urinarum in diabete *dulcedo* observentur, haec *sola* quidem ratio explicare non potest. Qui *sanguinis* hoc in morbo *resolutionem* in auxilium vocarunt: his, cruoris in illo, nunc *corium*, nunc naturalem consistentiam, — chronicam diabetes extensionem, ac aliarum sub eodem integritatem functionum considerata offerimus.

Tam facile aliorum, de causis diabetes, subvertere opiniones, — ac tam difficile est, his ipsis *meliores* substituere! Sed propriae melius esse censemus fateri paupertatem scientiae, quam fucum fucum, humani cum sanguinis discriminae, superaddere.

Quod si tamen, quae causarum sub rigo-
rosiore examine se nobis obtulerit, opinio-
nem, aliorum submittere iudicio hic recu-
sare nequeamus; fateamur oportet: nos, si-
cut in *rabie canina* ex *animali veneno*, aut homini

Opinio
propria:

cnm infecta saliva inserto, aut sponte ejusdem in corpore evoluta, ac faucium in nervos praecipue furiente, *horrorem ab aqua singularem* derivamus: — ita *violentum liquidorum desiderium*, ut potissimum diabetis symptomata, ex contrario eosdem in nervos stimulo, ac imprimis *ex systematis lymphatici actione praeter modum incitata*, repetendum esse, ob rationes non paucas, suspicari. Certe, si *dipsadis serpendis* (§. 480.) *virus*, quod Medici ex Veteribus praecipue, ad unum omnes, confirmant, *diabetem* per morsum induxisse, ut credimus, ad fabulas haud spectat: jam summum opinionis expositae argumentum se vel nolentibus obtrudit. Sed ejusdem naturae virus posse, sub rariori vitae positione, vel et interdum sub febribus, tam acutis, quam intermittentibus in corpore humano praeparari: ex adducto *hydrophobiae spontaneae* exemplo, et ex tribus aliis, in quibus, sub ipso diabete, *horror aquae* comparuit, ni fallimur, sat satis apparet. Hoc ab acri, suo modo, ac per nervos in *systema lymphaticum* agente, mox resorbentium vasorum ad quascunque superficies, internas, externas, ad oris, stomachique cavum, ad cutem ipsam, intenditur ac morbose incre-

cit officium. Hinc primum diabetis symptoma, intensa *sitis* est, et extrema vasculorum inhalantium oscula, quod roris animalis ac muci in ore ac faucibus exstillat, hoc omne promptissime ingurgitant, ac vel perpetuam siccitatem, vel sensationem in sitis organo perversam, ac inexhaustam bibendi necessitatem his in locis inducunt. Similia in ventriculo, intestinis contingunt: ac non modo *fames morbosa*, ardoris in ventriculo, vel et syncopis sensus, sed citissimus *chyli*, non adeo ob *stomachi debilitatem*, quam ob celeriores resorptionem, *vix satis* in abdomine *subacti*, crudioris, secundas ad vias transitus promovetur. *Vasa cutis resorbentia* non minus actionem in ambientem *atmosphæram*, insolitatem exercent, ac universo quasi corpori sitiendi copiosum, quod ex illa offertur, humidum praecipitanter advebunt. A tanto liquidorum undecunque resorptorum torrente. continuo cum potientis, tam avide ingurgitatis, ad renes directo, secretio cutanea languescit, pellis aspera, quasi corium, exurit; cum interim materia urinae, quae non modo *liquidi ingesti*, sed, brevi temporis intervallo, *totius aegroti pondus* longe superat, abundanter suggeritur; principium

nutriens, tum illud, quod ex alimentis quotidie novum hauritur, atque, minus subactum, potissimum saccharinae substantiae elementum constituit, — tum alterum, quod in animale humorem jam conversum est, omne per renes dissipetur, *actabes*, ut vocant, *ad matulam*, quae cum illa, quae in sexu sequiori ex *lactatione* diuturna vel *galactirrhoea* (§. 552,) contingit, quamplurimum conspirare videtur, continuo increseat.

Hanc morbi, tam obscuri, originem confirmare videntur tum inexpectatus ac celerior plerumque diabetes ingressus: tum ordo ac natura symptomatum non minus, quam latissima illius ad sexum, aetatem, temperamenta quaecunque, ac ad debiles aequae, ac robustos ad homines, extensio. Diabetes, quem *ossium emollitio* praecesserat, conservatum in fastis medicis exemplum non minus huc spectat, atque stimuli, vasorum lymphaticorum actionem nunc in solida (§. 399.), nunc in fluida augentis ideam nobis excitat. Nec alterum, quod nobis in viro oblatum est, cui *diabetes*, dum pustulae summopere ardentes, dolentes, ad coxas prodirent, illico (licet iterum sat longam

post moram rediturus) disparuit, parci faciendum esse putamus, confirmatum simili aliorum observatione, exemplum. Quodsi vel *insipidus*, vel *decipiens*, ut vocavimus, *diabetes* difficultates hic pariant: hae forsitan, si *primum*, ex *chylo* in sanguinem suscepto *pau-*
ciori, aut priusquam hic per urinas secedat, in animale naturam jam magis, ac in *diabete mellito* locus est, converso, — *alteram*, si ex succo chyloso secundas ad vias copiosius citiusque resorpto, per potum tam copiose non haustum minus diluto, derivemus, non improbabili conjectura solvuntur.

Quodsi illorum, quae hoc in morbo prae aliis auxilio fuerunt (§. 483.), licet admodum inter se diversorum, agendi rationem diligentius rimemur; haec omnis in eo consistere videtur: quod stimulo, illi, quem morbi causa exercet, opposito abdominales praecipue in nervos agendo, *sensationis* in istis et in faucibus *perversae* conditionem immutando, ac in universum, hoc ex loco, nervosum systema operando, lymphaticorum vasorum resorptionis in opere intemperantiam fraena verint. Hoc scilicet modo: licet minus intellecto, sicut illa, quae resorbentium vasorum actionem intendunt,

hydropem longinquum nunc alvo, nunc renibus expellunt: ita laudata in *diabete* medicamina, moderato *violentæ suctionis* hoc in systemate impetu, tum *sitim* intensam extinguunt, tum necessariam *chylo*, quo rectius in primis viis subigatur, moram concedunt; tum denique cutaneae *inhalationi* praescriptos a natura limites assignant. Qui *sitis* rationem in morbis intellexerit: hunc latere non potest, a pauca interdum bile corrupta, circa stomachum collecta, a cibo putrido vel acri, ac sale condito, a minima ingesti veneni portione, quin solo a spasmus, ac dolore abdominis violento, insigne mox potus desiderium accendi. Nec ignota esse possunt, quæ a vermium in ventriculo, intestinis, reptatu, in faucibus ac vocis in organo contingant; et ab ascaride per ductum choledochum ad *hepar* delato, vel ipsius *hydrophobiae* comparuisse symptomata. Hinc mirum non erit, si et *vermes* interdum *diabetis* ad causas in pueris a quibusdam revocentur: cum istorum, hoc a stimulo, urinae non raro tum quantitas augeri, tum lotium, seri lactic adinstar subalbescere videatur; et cum in uno ex nostris aegrotantibus incredibilis *ascaridum vermicularium* in ano, dia-

beten tam praecesserit, quam perpetuo comitata sit, copia. Sed, nec ad sola *animalia*, nec solos ad *renes*, limitari videntur principii nutrientis, saccharini, morbosa secretio, excretio. Vel ipsa *plantarum* ad *folia* et *cortices* non raro gummosi, dulcesque liquores, ad stirpis ipsius *tabem* usque, transudant, et insecta, *aphes* innumeros, ut totidem parasitas, alliciunt. Ad cutem hominis, *sudor*, *mellea dulcedine* instructus, non semel comparuit; ac talem *sudoris colliquativi* interdum esse indolem, non immerito suspicamur (§. 471.). *Dulcissimam salivam* in morbis, alii non tam raro detexerunt; ac nota est *phthisicorum plurimorum*, sub fine morbi lethalis, insignis et ad nauseam usque molesta, *dulcedo sputorum*. Vel ipsum *aurium cerumen*, in sanis tam amarum, *dulcem* aliquando manifestavit saporem; ac forsitan saepius, quam sciamus, saccharini et nutrientis principii per *chronicas diarrhoeas* jactura, tabis, illi, quam *diabetes* inducit, aequalis, potissimam reddere nobis posset rationem.

§. 482. Ex dietis (§§. 480. 481.), quam *veri* Prognosis, *diabetis* infausta plerumque sit *prognosis*, jam satis comparet. Non desunt quidem illius, feliciori, sub omine, curati hinc inde quae

spem erigant, exempla: et ex nostris *duos*, salutem recuperasse reminiscimur; sed ut *ex viginti*, quos uno celebrique a medico conspectos fuisse legimus. *nec unus* quidem hoc a morbo liberatus est: sic et, qui perfecte apud nos convaluisse videbatur, et optime nutritus per plures jam menses in-cesserat; ab eodem, ut nobis per literas in-notuit, morbo, quo mense pridem incoe-perat, prehensus, perivit; alter vero aesti-vo sub tempore, quo morbus et alias, licet tunc minus, sopiri consueverat, ad suos, ut sanus, dimissus est. Hinc *senes* magis, quam *juvenes*, periculum hoc a morbo in-currere, nisi prognosi eâdem ad omnes si-mul morbos extenâ, vix dicere audemus; nec, an *bibaces* magis homines, quam alii, pravius a diabete plectantur, ut dictum est ab aliis, satis certo pernoscimus. Ubi febris jam lentae symptomata hunc morbum co-mitantur: tunc citius in pejus ruit, — sed interdum adhuc per annum, et ultra vitam protrahit aegrotans. Vix non ubique se hy-drops diabete senescenti adsociat. An et hydrops interdum in *diabeten acutum* con-vertitur? Aegrotus certe, qui rheumatica pleuritide, diarrhoea simul ac pedum oede-

mate adfectus erat, ad *Clinicum* depositus, in *asciten*, cum paucis primum lotio hic incidit. Post vigesimam a morbo diem augentur urinae, venter subsidet; sed sitis ac fames increscunt. Mox potum longe superant urinae *non dulces*, et quotidie, licet alvus copiose semper flueret, ad *quindecim* aut *decem* et *octo*, interdum *viginti quatuor* ad *libras* pallidae secedunt: donec morbo per dies adhuc sexaginta et septem, eodem tenore, protrac-to, extrema sub tabe, aegrotus exspiraret. Jam antehac conspeximus hydropicos, quibus aquae, vel sponte ac paucarum intervallo dierum, per urinas impetuose profluxerant: quibus, insignem ad gradum emaciatis, pellis, inanis, ut saccus, ab ossibus pendebat; et qui, cum de hydropice tam feliciter devicto laetabantur, post paucas modo dies exhausti, inopinato et medios inter congratulantes amicos, ut funus, concidebant. Forsitan urinarum, quod in istis negleximus, examen, non solas modo aquas, sed nutriendi principium se per renes cum istis praecipitasse, in talia attentos docuisset. Qui morbi alterius *crisin* constituisset, *verum diabete*m, non vidimus.

Cura.

§. 483. Sub tanta causarum, quae diabetem inducere creduntur (§. 481.), ambiguitate, ac felicioris curationis, quae vel unam, vel alteram ex illis, ut proximam, confirmet, sub defectu, vix aliud hic a nobis expectari censemus, quam ut ea, quae pluribus profuerint, — atque alia, quae nobis ulterius hoc in morbo rebelli tentanda esse videantur, exponere moliamur. Nullibi plerumque Medicina auxilii tam egena est; quam ubi majores remediorum divitias pro una eademque aegritudine possideri gloriantur theoretici; atque in ipso diabete tam multa, tamque contraria inter se auxilia laudata fuerunt: ut vel ex hac solae rationis medendi inconstantia, plurimorum jam nimis manifestetur inertia.

Pro varia scilicet, quam sibi quisque de causis diabetis formaverat, idea (§. 481.), nunc stimulantia, roborantia, adstringentia, nunc anodina, sedantia, nunc vero calculo adversa, vel et resolventia, et stomachica, et diaphoretica, vel demum antiseptica, in usum vocavit remedia. Hinc alii, *alumen*, aut in pulvere (N. LIX.), aut sero lactis solutum (N. LX.), his terve in die, a scrupulo ad drachmam usque dimidiam, aut fer-

rum, aquas materiales pro potu, vel corticem peruvianum, aut quercinum, rhabarbarum, gummi Kino, quin ipsam cantharidum tincturam (N. LXI.), a guttis quinque ad decem, ac sensim sensimque ad triginta cum aqua, vel et balneum ex frigida, vel renum per fascias compressionem, in usum traxerunt; — alii, ad aquam e calce paratam, — hi, ad eaque obstructions rescarent, — illi, ad amara ciborumque digestionem faventia medicamina confugerunt; — vel calido alii ex balneo; ex variis diaphoreticis, imprimis vero ex pulvere *Doveri* (N. XXXII.), a granis decem, ad viginti, triginta, quin gradatim ad sexaginta, quotidie ad noctem porrecto, auxilium petierunt; — alii quae sanguinem tenuiorem inspissarent, vel acria in eodem involverent, demulcentia cum lacte, porrecta, mucilagines, emulsiones ex gummi arabico, tragacantha, vel, quae putridam solutionem averterent, antiseptica ex cortice, vel et acidis mineralibus, praeferenda esse duxerunt; ac demum alii, ut cutis spiracula, quae aquam atmosphaerae ex sinu nimis avidè haurire creduntur, obturarent, pellem integram cum oleo sollicitè ungendam esse nutarunt.

Ex tam contrariis inter se remediis, tum pulverem *Doveri*, tum cantharidum tincturam, et alumen, frequentius, quam alia, profuisse, apud medicos Scriptores — sed in propriis nequaquam diariis, reperimus. In diabete *insipido*, ab adhibitis modo *decem* tincturae praedictae guttulis, pauciores quidem, sed cum dolore, mingeantur urinae: suspenso medicamine, dysuria disparuit; eoque iterum porrecto, remedium quidem pertulit, sed, vicinus jam morti, auxilium non habuit aegrotans. In alio, ejusdem tincturae dosin gradatim ad drachmam in die adauximus: sed licet urinae hac sub methodo difficulter non prodirent; earum tamen copia vix quidquam imminuta fuit. Feliciori cum successu ex nostris quondam. *Auditoribus* unus, vesicans emplastrum ossi sacro imposuit, atque *duos* ab hoc morbo aegrotantes restituit. In ipso vero *diabete mellito*, in quo nec alumen, nec tinctura cantharidum, nec pulvis *Doveri* cum camphora, nec corticis peruviani cum simaruba decoctum, nec demum myrrha cum sale martis, auxilii quid praestiterant: ab assae foetidae cum extracto myrrhae aquoso et valeriana, usu, conspicuum urinarum decrementum,

mentum, — ac tandem a *cupro ammoniacali*,
bis in die a grano dimidio ad granum in-
tegrum porrecto, perfectam valetudinem;
quam lautior simul victus confirmavit, ob-
tinuimus.

In genere, sub tanta principii nutrien-
tis per urinam jactura, atque sub fame tam
insigniter in plurimis urgente, alimenta
ad eam simul, quae vires in malo tam diu-
turno sustentet, quantitatem augenda, at-
que talia, quae succo nutritio abundant;
quin eundem vel leviori digestionis sub
opera profundant, eligenda sunt. Quam ce-
lerrime hoc opus in plerisque aegrotis ab-
solvitur: hinc istis a cibo leviori et cum ni-
mia facilitate extrahendo, mox novi latra-
tus stomacho et ardores succedunt; vel chy-
mus, vix e ventriculo descendens, a potu
tam largo abluitur, et diarrhoeae sub forma,
quin emolumento esse possit, expellitur.
In aegroto, cui alvus sub *diabete* quam *uri-*
mum fluebat, urinam copiosam quidem,
sed expertem dulcedinis, observavimus; ac
licet alter diarrhoeam cum lotio sat dolci
hinc inde pateretur, dulciorem forsitan
sub alvo sicciori urinam minxisset. Potu-
lenta hoc in morbo diversa, lac ipsum cum

saccharo remistum, sat aequali cum rerum eventu, porreximus. Interrogatus, quem sibi minus officere, atque sitim magis extinguere sentiret potum aegrotus, *vinum* esse respondit. An *alcohol* aquae superadditum, ut et sitim in messoribus magis fallit, et liquida, ne cito nimis per cutem aut renes aufugiant, cohibet, in diabete conduceret?... Ex acidis mineralibus cum potu remistis utilitatem, quod sciamus, non habuere aegroti. Qui acidum in primis viis praedominans interni ardoris pro causa aspiciunt: hi, aquam ex calce paratam cum lacte commiscent; sed morbum hoc potu non fraenant. Melius emulsio ex amygdalis et cum gummi arabico, quibusdam conduxisse videbatur. *Sudores in diabete*, si partis unius madorem excipiamus, a tepido nequidem balneo promoveri conspeximus. Nec *opium* aegrotis, nisi breve, solatium concessit. An *balneum vaporis* hanc cutis secretionem restituendo, morbosam simul vasorum resorbentium actionem in verteret? Ab *oleo*, quod cuti illinivimus, urinae copiam imminui non vidimus. Cum vero fauces tam insigniter hoc in morbo, nervorum, ut puta-

mus, ex vitio, siccescere observamus: an
forsitan *mercurius*, vel excitata cum eodem
salivatio conducerent!... Qui morbi, de
quo agimus, *raritatem* considerat, is talia a
nobis *dubia*, non *facta*, proponi, condo-
nabit.

O R D. I. G E N. III.

E N U R E S I S.

Natura
morbi.

§. 484. **Q**uem pro urinis, ne, perpetuo foetore modestae, indecore aufugerent, in pelvi natura recondidit, alveus: hic in sano animali per horas sat multas transmissum sibi a renibus lixivium, quin stimulum persentiat, conservat; donec et mole, et pondere, et acredine impuri liquoris adauctis, pro potus, ciborum, transpirationis cutaneae, ac propriae capacitatis, sensibilitatis, consuetudinis ratione, admonitus, non sine pleno voluntatis arbitrio, visua, vel abdominalium musculorum, diaphragmatis auxilio suffultus, contenta vel placide, vel cum impetu expellat; aut, si aliter modestia, occupatio intensa disponant, diutius coerceat. Hanc lotii, vel medio sub flumine, *retinendi* potentiam oeconomia animalis non proprio, qui deest, sphyncteri, sed fibris a musculo, quem *ani levatorem* appellant, in subsidium vocatis concessit: ut quo *pseudos-*

phinctere, sub alvo fluente, laxato, urina nullam, quam comprimētis, aut compressae vesicae imperium agnoscit, ac nolenti animali subtrahitur. Diversis autem in morbis, quid quod apud pueros profundo sub somno, ac in sexu sequiori, cui debilior ad vesicam est custodia, sub variis positionibus, similia interdum contingunt: ac lotium, vel minori quantitate collectum, evacuationem, frequentia, non dolore, incommodam exposcit; aut antequam se homo ad mictionem componat, vel nolentis praecipitatur ex urethra, — aut sommo detentis in lectulos aufugit, — aut insciis, delirantibus aegrotis per vias naturales, vel et alias, morbosas, quod *enuresin*, vel *urinae incontinentiam* vocamus, effunditur.

§. 485. *Enuresis* hinc est lotii, vel sani, vel morborum, succedens praeter arbitrium ac indolens ex vesica per urethram, aut per vias non suas, stillicidium, profluvium; vel potentiae urinam coercentis sublatam aequilibrium, debilitas, aut perfecta abolitio. Definitio.

§. 486. Diversa foedi hujus morbi (§. 485.) Differentiae. natura est: atque nunc prorsus nolentibus, aut insciis hominibus urina profunditur, et completa est *enuresis*; nunc vix admonitis de

nova collectione, priusquam ad mingendum se accingere quis possit, praecipitatur (*E. incompleta*), — aut sub somni, vel animi delirantis ludibriis (*E. nocturna delirosa*) subdole aufugit hoc lixivium; — atque talia, vel ipsius vesicae ob morbum (*E. idiopathica*), vel ob causas, quae in ista non resident (*E. symptomatica*), vel rarius (*E. accidentalis*), vel, consuetudine contracta, frequenter et longos per annos (*E. habitualis*) contingunt. A diabete (§. 478.) distinguitur enuresis, quod lotium in ista, neque copia, neque sapore, cum illius urina conveniat; quod sitis tam intensa non urgeat, nec tabes aegrotantem emaciet. Interim, quod in superioribus jam dictum est (§. 479.), cum diabete enuresis interdum complicatur, atque diagnosis difficultatem, nisi attento in singula animo, non parvam opponit. A dysuria, enuresis differentia, ob dolorem, ardorem, qui illam comitantur, sat facile eruitur; sed et has affectiones subinde conjunctas incedere non implicat; ac sicut ipsam urinae, imperfectam licet, suppressionem simul cum enuresi incessisse haud raro conspeximus: ita, ex non absimili ratione, urinam subinde et cum dolore, et praeter volun-

tatem, in illis, qui abscessum aut ulcera vesicae ad collum, vel ad prostatam patiuntur, emitti videmus.

§. 487. Vix alia, quam recensita hucusque (§§. 484. — 486.) symptomata, vel illa, quae proprio vesicae, vel alii, hoc in viscus agenti morbo convenient, in *enuresi* occurrunt. Interim et foetor insignis, qui continuum urinae profluvium comitatur, atque a quavis societate humana aegrotantes excludit, et facilis genitalium, perinaei a tam acri liquore crosio, *intertrigo* (§. 397.) huc spectant. *Puerorum* imprimis, ac *senum*, *enuresis* est morbus; sed et *foeminae* jam partum expertae non raro huic subjacent; et in genere hic sexus, ob dictas rationes (§. 484.), sub impetu, sub violentis vel tussi, vel cachinno, urinae portionem non raro invitus dimittit.

Symptomata,

§. 488. Quod in aliis animalibus, — hoc et in homine, non ad vitae socialis urbanitatem ac modestiam, sed a sola natura ad turpitudinem educato, contingere videtur: ut, quo loco ac tempore ab urina vesicam stimulari persentiat, hoc statim ac sine pudore hunc alveum exoneret. An coeterorum *pulli* animalium, humana ut proles, sub

somno nrinam deponant, nos quidem nescimus; sed certe nulli tam longa et incommoda, quam homini, est infantia animali; nec primis adhuc plumis destituta avicula nidum, ut puer, conspurcat.

Debilitas. *Pseudosphincteris debilitatem, relaxationem* apud multos ut causam enuresis cum aliis ad mittimus; sed qui talem apud infantes aut pueros in se ipsos sub somno mingentes ubique supponunt: hi aut vesicae *sensibilitatis* majoris, aut propriae huic aetati incuriae, aut insomnii, ac pravae consuetudinis effectus cum vera debilitate confundunt. Non infrequens est interim *incontinentiae* haec ratio: et vel a casu, contusione ac vulnere perinaei, vel ab ani, vaginae, uteri, prolapsu, ab hernia vesicae, a calculo, collo istius diutius inhaerente, vel ruditer extracto, a partu difficili ac longo, a nixu sub tussi ferina, vel ad alvum reserandam, violento, ab inflammatione colli vesicae praegressa, a spasmo hujus visceris frequente, a veneris abusu, carneus hujus partis custos non raro debilitatur, relaxatur, distenditur, distrahitur, et a sphincteris officio removetur. An corporis totius debilitas, sine vitio locali, enuresin apud infantes senesque producat, dubitamus.

Frequens neque cum sola debilitate confundenda, incontinentiæ urinae causa est *paralysis*: cujus origo nunc ipsum ad cerebrum, — plerumque lumbalium vertebrarum in antro, — interdum ad nervos colli vesicae ac pseudosphincteris, delitescit. Ipsius quidem vesicae totius resolutio frequentius, quam colli aut sphincteris solius paralysis, his a causis descendit, ac vitium *enuresis* oppositum, *retentio urinae*, si viscus ipsum resolvatur, inducitur; sed praeterquod utrumque hoc mali genus non raro conjunctim et eadem ex causa procedat; interdum ad sola nervorum, qui pseudosphincteri concessi sunt, principia vel decursum, licet pathologicae sectiones id ubique non indicent, morbi causa haerere videtur. In febribus acutis, nervosis, aegroti frequenter, quod et febriis hominibus contingit, urinam perstragula vel inscii, vel delirantes effundunt: ac primum vesicae, mox et ani sphincteres officio praeesse recusant. In multis affectus soporosi, paraplegia, haemiplegia, hydrocephalus internus, ventriculorum cerebri hydrops, cyphosis, contusio, concussio, luxatio, fractura, caries, exostis vertebrarum,

hydrorachitis, aut hydrops in ossea hac specu, a nobis, vel adultos apud homines, aliquoties conspectus, depositio rheumatica, vel alia, inflammatio, abscessus, enuresin, plerumque cum urinae retentione complicatam, aut saepius hanc solam, producunt. In aliis, calculi, aut fistulae ad anum suscepta sectio, aut longa in balneo frigido remora paralyisin sphincteris pro effectu habuerunt. Hoc igitur vitalitatis ad inferius vesicae segmentum infractae, vel abolitae sub statu, urina vix ureterum ex ostiis in hunc alveum delata est: cum hunc ipsum decliviores per vias mox deserit, ac *sine sensu, continuo* per urethram obscoene distillat.

Sensibil,
augm.

Sed vel contrario ex vitio, *sensibilitatis, irritabilitatis* ad superficiem vesicae internam *intemperantia*, vel nativa, vel per ipsam consuetudinem inducta, vel ex stimulo quocunque oriunda, urinae frequentius, quam par est, aut et praeter voluntatem redduntur. Sunt certe, qui lotium sat diu, — sunt, qui per paucas modo horas, irritationis sine sensu, hoc liquidum retineant: quae diversitas non a sola hujus alvei capacitae minori, majori, — sed *propriae sensibilitatis a*

gradu, vel a contracta, urinas aut frequentius aut rarius mittendi, *consuetudine* dependent. Quæ, ab urinis soluta, forte solito vel parum acriora, vesicam alluunt: hæc, licet ardorem necdum, vel dysuriam inducant, mejendi necessitatem in pluribus mox augent. *Infantum* his a causis frequenter profiscitur enuresis: ac interdum unius ejusdemque familiae proles ad unam omnes hoc vitio, non semper sine labis congenitæ, scrophulosæ arthriticæ dispositionis suspicione, laborant. Sic omnes parentum a podagra vexatorum filios ad pubertatis usque tempus, *enuresi nocturna*, quaecunque demum subministrarentur subsidia, pertinaciter afflictos fuisse novimus. Vix menstrua filiae proruperant: cum sponte ac præter opinionem hic morbus dispareret; sed brevem post moram, hæc ipsa *spasmodicum* in *asthma*, licet corporis eleganti firmoque habitu gauderet, conjecta, et *herpetibus* hinc inde ad cutem notata est. Quibus aut renes a calculo, aut urethra ex blennorrhoea irritantur: his et vesica redditur sensibilior; et hac ultima jamjam dispersa, hoc receptaculum a minori, quam pridem solebat, urinae quantitate, ad istius excretionem sat

diu sollicitatur. A rheumatico, catarrhali vesicae affectu, a chronica hujus visceris phlogosi, a sanguinis menstrui, haemorrhoidalis, has ad partes congestionem, quin dolor ubique se prodat, — et interdum, ut diximus, a solo cum partibus aliis consensu, hujus alvei sensibilitas et mictionis frequentioris necessitas non raro increscunt. A spasmo vesicae, vel abdominalium musculorum violento, urinas cum impetu expelli, epilepticorum exemplo comprobatur. An et *vermes* subinde vesicam humanam exstimulant? ... *hidadites* cum urinis excretæ, et qui *canum* in *renibus*, ac, prout nos ipsi cospeximus, in ejusdem animalis *vesica*, reperti sunt *vermes ascarides*, a polyposi concretionibus his in locis interdum reperiundis, ob organicam structuram diversi, vermium in vesica repertorum exempla de hominibus, a variis Scriptoribus adducta, confirmare videntur. Ex recto intestino per ulcus in vesicam intrasse de quibusdam, — sed, quod canis exemplum sani nos docuit, non de omnibus dicendum est.

Vitium organicum.

Quaecunque vesicae cavitatem immi-
nuunt: ut ejusdem, ab utero scirrroso, can-

crosò, hydropico, vel steatomate praemagno, vel et *ossea* substantia, quae in museo pathologico possidemus, vel polypis repleto, vel gravido, — a foetus capite, aut clunibus, a scirrho intestini, mesocoli, vesicularum seminalium, angustatio, compressio, — membranarum, quae vesicam componunt, vel universalis, vel circa collum, ab ulceribus, a calculo inducta crassities, collositas, — excrescentiae fungosae, polyposae, iterumque calculus, tumores purulenti, scirrhusi, quae vesicae portionem inferiorem occupando, urinam ab eadem excludunt, contractionem aequalem, aut pseudosphincteris actionem impediunt, vel mingendi necessitatem perpetuant; — haec singula mox *enuresin* mox vitium huic oppositum, mox illud isto conjunctam, constituunt.

Huc spectat urinae, vitio aut congenito, aut a praegressa inflammatione, exulceratione vesicae derivando, per vias haud naturales, atque voluntatis imperio nequidquam subjectas, ex hypogastrio, umbilico, perinaeo, intestinis, contingens egestio. Sic vesicam sub abdominis integumentis et pubem prolapsam, ac duplici externoque

ostiolo obscoenum liquorem perpetuo exstillantem *Bruchsalensi* juvene, ac in tenero infante conspeximus; post longas ischurias urinam per urachum sibi vias aperuisse, experientia testatur; a mesocoli carcinomate cum vesica cohaerente atque eorosso, istius, et intestini communicationem, — atque similem in *rectum* intestinum vesicae aperturam in viro a dysenteria, et in altero, ab haemorrhoidali inflammatione correptis, observavimus ex prostatae suppuratione, ulcere venereo, aut ex calculi sectione, frequentes ad perinaeum urinales nascuntur fistulae; ac mulieribus non paucis a partu difficili, artificiali, ex inductis colli vesicae, ac urethrae inflammatione, concretione, ac subsequente laceratione vel ulcere, urina, foedo per vaginam aut alvum spectaculo decurrit; atque tribus in viris, in exemplum hic adductis, nunc flatus, nunc faeces per urethram exivisse deteximus.

Prognosis.

§. 489. Cuivis ex enumeratis (§. 488.) incontinentiae urinae speciebus, sua et propria est prognosis. Quae solam *debilitatem* pro causa agnoscit, nec diu continuavetit, — quae modo sub somno profundo, longiori contingit: ea remediis, opportuna vivendi

ratione, adhibitis, vel sponte, crescentibus annis disparet. Quam herniae, prolapsus inducunt, hanc repositio sat cito suscepta dispellit. Quae ex *paralysi* descendit, incontinentia; ea, nisi causâ illius mox ab initio sublata, perraro, — ac si talem auferri non liceat, nullo tempore sanator. In morbis acutis, enuresis, cum simul alvi excretio praeter arbitrium accedat, frequenter, non tamen ubique mortem praenunciat. Quae ex *morbosa vesicae sensibilitate* proficiscitur: ea, si causam istius dissipare valeamus, vel tractu temporis et sponte cessabit. Ex pessimis est enuresis quam *vitium vesicae*, aut partis vicinae, *organicum* induxit; atque sic mali, de quo agimus, ex causarum, quibus debetur, consideratione potissimum eruenda est prognosis.

§. 490. Ut quovis alio in morbo, sic et in *enuresi*, praecipuum curationis momentum in causis removendis consistit: quod, cum frequenter obtineri non queat, imperfectam, aut nullam hoc in casu medelam aegritudo admittit. Cura.

Nascentem ex debilitate incontinentiam, *E. ex debil.* nisi provectam nimis, corroborantia, excitantia, ipsi loco adfecto admota, feliciter

dispellunt. Hinc repetita partium vicinarum in frigidam immersio, frigida, vel spiritiosa, aromatica fomentatio, linimentum volatile cum oleo nucistae expresso, *perinaeo* apposita, clyster frequens cum camphora ex corticis decocto, quod ultimum et interne cum rhabbarbari aequa portione adhibendum est, praecipue indicantur. Interdum tinctura cantharidum a quinque guttis ad quindecim, viginti, cum debita cautela, bis in die, ex aqua porrecta auxilium concessit.

E. ex paralysi.

Non multum diversa, sed longe difficilior, ac plerumque infausta est enuresis ex *paralysi* medela. Praeter ea igitur, quae morbum primum, aut praegressam apoplexiam; paraplegiam etc. concernunt, tum dicta jam remedia in opem trahenda sunt, tum vesicans ossi sacra imponendum, regio lumbalis linimento volatili cum camphora ungenda, viresque electricitatis, ab ossis sacri confiniis ad perinaeum, dirigendae sunt. Injectiones ex cortice peruviano paratae, hoc vesicae sub statu, per urethram mox refluunt, atque in illius universali paralysi nobis, licet retentae, perparum praesiterunt.

Qui-

Quibus urinae ex nimia vesicae irrita-
bilitate, sensibilitate, vel citius, frequentius,
quam par est, vel praeter voluntatem se
praecipitant: his, suppressa primum, aut
saltem moderata morbosae dispositionis
origine, remedia ex causae ipsius cogni-
tione petenda, atque hinc alia aliaque con-
ducunt. Sic, ubi suppressio menstruorum,
haemorrhoidum, plenitudini vasorum cir-
ca vesicam, atque tensioni, nimiaeque mo-
bilitati occasionem praebuerint: hanc tol-
lunt appositae vel pudendis, vel ano, pe-
rinaeo, hirudines, enema, fomentatio ex
frigida cum aceto. Si ab acri rheumatico,
vel alio sensibilitatem perversam contra-
xerit vesica: remedia huic acri corrigendo,
ab hoc viscere avertendo, idonea in-
dicantur. Quam calculus hoc in recepta-
culo contentus irritationem inducit, hanc
sectio illius avertit; vel, si ab instituta ope-
ratione, vel post blennorrhoeas jam abactas,
vel post alios spasmodicos affectus, vesica
morbosam sensibilitatem diutius manife-
stat, opium sat larga dosi per clysteres in-
testino injectum conducet. Infantes sub
nocturnis insomniis in se ipsos mingentes,
ad coenam tum potu copioso, tum cibis,

qui urinae copiam adaugent, abstineant; ut lotium, quo lectulum petunt tempore, depellant, avertantur; ac hora nunc isla, nunc illa, ex somno longiori, ut vesicam exonerent, evigilentur. Nec minae, nec verbera, nisi ratio et pudor, aut aetas major id faciant, habituali huic vitio medentur. Si forsitan universalis debilitas cum nimia vesicae sensibilitate conjuncta videatur; tunc chinae decoctum, ac coetera roborantia, — atque si per consensum vesica stimulari videatur, nunc opium, nunc illa, quae longinquae irritationis causam debellent, in usum trahenda sunt.

L. ex vitio organ.

Orientem *ex vitio organico* enuresin vix unquam medicina dispellit. Interim si urethra mulieris, ex partu difficili, in vaginam aperiatur; cathetere flexili ad vesicam conducto, ac lotio per illum, tempore sat longo, solícite evacuato, raro quidem, sed interdum urinae per vaginam defluxus avertitur. Vix unquam tam felices esse licebit, si vel ipsa vesica lacerata incontinentiam producat; interim *genuensis* nobis exemplum juvenis notum est, cui vesicae abscessus cum recto intestino sat aperte communicans, vel solius auxilio naturae sanatus est.

Quam caput foetus, vel uterus gravidus in vesicam exercet, haec saepe facili negotio aufertur, compressio. Vesicae scirrhus, callositas, excrescentiae, nullum ab arte humana auxilium admittunt.

Quo igitur in casu enuresin auferri non licet, urina saltem, ne foedo spectaculo nolentibus effluat, ac partes subjectas erodat, instrumentis, quae *Chirurgia* pro sexu quovis suppediat, colligenda est.



O R D. I. G E N. IV.

PTTALISMUS.

§. 491. **F**ons triplex *saporis* atrium irrorat, atque subtilem, penetrantem ille vaporem ubicumque exhalat; hic blandam, lubricantem lente eructat pituitam; tertius insipidam limpidissimamque undam nunc placide scaturit, nunc rapidam ac divitem cum impetu expellit. Insignis hanc ultimam, pro cavo non magno, glandularum congeries, vel sponte, vel nervorum imperio, irritatione quacunque, pressione coacta, profundit: nec febris hanc perennem scaturiginem, ut illam muci, aut vaporis in ore penitus exsiccat. Ex cognita hucusque salivæ humanæ analysi, vix tanta, ut vel ab aqua puriori suppleri non posset, nobilitas resplendet; et animalis naturæ, præter suam originem, hic liquor vix multum ostendit; sed aliter nos docent digestionis ciborum sub nimia ejus-

dem jactura languentis effectus, — aliter observatio, aperto scilicet, sub artificiali salivatione, hoc fonte, principium vitale has per vias, quasi in ipso diabete per renes, ruisse, — saporem hujus liquidi, cum sano in homine nullus esse consuevit, conspicuam in aliis *salsedinem*, in aliis *dulcedinem* insignem ac melleam prodidisse, — febres malignas, nervosas non modo praecipuam depositionem circa glandulas salivales sibi sedem eligere; sed per abundantem salivae fluxum, quem aphtae non producant, non raro dispergi (§. 91.); — hunc ipsum liquorem potissimum *hydrophobiae* vehiculum, cujus unica jam guttula hunc morbum in sanos propaget, constituere; — ex omnibus humani animalis secretionibus nullam a solo nervorum imperio tam celeriter, quam istam intendi; — insigne glandulas salivales inter et testes, et mammas (§. 174.) et ventriculum, et ipsa intestina sensationis commercium existere: quae singula, salivae dignitatem, tum sano, tum aegrotante in homine, abunde demonstrant.

§. 492. Quodsi igitur salivalis hic liquor Definitio.
(§. 491.) copiosius, quam naturae ad usus

requiratur, secretus, aut continuam atque modestam deglutitionem exposcit, aut ex ore praeter modum ubertim distillat, aut, ob ductus laesionem, se per genas praecipitat: *ptyalismus*, *salivatio* vocatur.

Differentiae.

§. 495. *Ptyalismus* vel sponte ab ipsa natura promovetur (*P. spontaneus*); vel ab arte inducitur (*P. artificialis*); atque ille vel *primarius* est (*P. idiopathicus*); vel morbi alterius *symptoma* (*P. secundarius*, *consensualis*) constituit. In quibusdam saliva non semper, sed *periodice* ex ore distillasse observata est (*P. periodicus*). *Epidemicam* interdum *ptyalismus*, *secundarius*, ut credimus, naturam assumit (*P. epidemicus*); et *criticae salivationis*, tum febrilibus, tum aliis in morbis exempla numerosa (*P. criticus*) habentur. *Ptyalismum traumaticum* vocamus; cum saliva ob ductus proprii laesionem externam, ut plurimum copiosius, quam naturales per vias fecisset, delabatur.

Symptomata.

§. 494. Rarior *spontaneus ptyalismus* est, qui ex propria glandularum salivarium effectione descendat; frequentior ille, qui aliis sub morbis symptomatice propullulat. Quocunque tamen hic modo nascatur, oris antrum continuo limpidissi-

mi liquoris, vel simul muci, affluxu obruitur, et ad continuos screatus urgetur. Spumosa saepe indolem a muco commisto salivae assumunt, atque vel loquente, vel dormiente aegroto, per labia et mentum, nausoso aspectu, distillant; vel qui clauso forsitan ore obdormiunt: hi, suffocationis, ab irruente per laryngem saliva, metu perculsi, desiderato a somno arcantur. Rarum est salivam tam copiose secretam non alio simul vitio laborare, quo cavum oris a phlogosi correptum, ab ardore, calore ac pustulis ulcerosis inquinatur. Interdum dolor ac tumor ad glandulas parotides, submaxillares, conspicuus occurrunt. Sunt, quibus, ob miram ad partes faciei laxitatem, salivae per flaccida et pendula oris labra continuo derivantur; atque alii, vel sola consuetudine, vel a copia salivae inducti, lacu salivali vicina sibi loca quaecunque inundant. Omnibus vero a quotidiana salutaris liquoris jactura digestio ciborum difficulter absolvitur; et corpus, sub majori illius dispendio, quod salivationis mercurialis exemplo docemur, contabescit. Qui acida, vel pingui et rancida ventriculi, intestinorum saburra la-

borant; hi, praevia *ustionis*, et quasi *flammae* ex *stomacho* per *oesophagum* *ascendentis* molestissima sensatione, limpidissimi liquoris quantitatem, sine vomitu, sat magnam, cum levamine eructant. Hic liquor licet imo a pectore aut ventriculo, ascendere videatur, salivalis protinus naturae est, et quasi metallico sapore instructus, cum maxima oppressione, anxietate rejicitur. Potatores hoc malum, sub horis matutinis, frequenter molestat.

Causae. §. 495. Si majorem nervorum in glandulas faciei conglomeratas potentiam excipiamus, qua, ferculi desiderati odore, aspectu, vel sola percepti quondam saporis recordatione, saliva cum impetu jam prosilit; non aliis ex causis salivae, quam aliorum humorum (§. 466.) secretio naturalem excedito. Qua demum ratione *mercurius* salivam prae aliis secretionibus, quacunque sub forma porrectus, tam facile ac potenter adaugeat: hoc, sicut ex lege stimulorum generali explicari non potest; ita certam humoris salivalis cum hoc metallo *affinitatem*, licet minus intellectam, supponere videtur. Huic similem quodammodo subtiliora pestilentiam morborum *contagia*

(§§. 83. 92.), externae *cynanchis causae* (§§. 174. 176.), atque criticae salivationis materia incognita, sat evidenter ostendunt; quamvis quicunque stimulas, oris cavo, vel ipsis glandulis salivalibus admotus, ut a sola jam fumi tabacini suctione apparet, eosdem effectus producat. Sic dentitionis difficilis sub opere, a dente carioso, a dolore, seu trismo, ut vocant, faciei, a gingivarum exulceratione, a linguae, aut faucium inflammatione, mandibulae fractura, vel tetano, convulsione, quin a sola jam oscitatione, glandularum, ductuum ve salivarium a musculis compressione, a calculo sub lingua, vel in ductu salivali haerente, copiosam aegroti ex ore salivam profundunt; et ab aphthis deciduis, non minor humorum ex buccis excretio succedit. Suppresso, ex pedum refrigerio, aliave ex causa, perspirabili vapore, vel renum secretionem imminuta, vel menstruis obstructis, vel adeo sub menstrui in teneris virginibus principio, sputorum interdum mox copia augetur. Salivatione praecedente, alvus dura, urina pauca, secretiones omnes parciales observantur; a diarrhoea subortata, vel perspiratione adaucta non raro ptya-

lismus dissipatur; ac ad salivationem a mercurio praeveniendam, non certius, quam tepor athmosphaerae, et aucta transpiratio, remedium habetur. Sed jam solus ad ventriculum, ad intestina stimulus abundantem mox prolicit salivam. Ex nausea, vomituritione, copiose hic latex ex ore distillat; a scirrho oesophagi, gastritide, cardialgia, a colico dolore, a vermium reptatu, similia contingunt. Vela sola conceptione, quanta non a gravidis sputorum rejicitur copia! et quanta non ab hypochondriacis, hystericis, melancholicis, ab illis, qui acidam aut rancidam in ventriculo saburram circumferunt, aut a *pyrosi*, expuitur saliva (§. 494)! In homine ex *pancreate scirrhuso* contabescente, ad decem haec ipsa libras quotidie rejecta est. An oriens a suppressa salivatione diarrhoea, ex aucta ejusdem naturae *pancreatici liquoris* secretionem descendit? Abundantem nuper salivationem in viro conspeximus, cui *paralysis ad linguam*, intacto saporis officio, pene omnem hujus particulae, quasi tabe laborantis, motum abstulerat. Coeterum, quae a faucium, genarum, pharyngis paralyti subsequitur salivatio, ea plerumque non ex aucta sa-

livae copia, sed ex musculorum, hunc liquorem coercentium, inertia, aut ex deglutitione impedita, per mentum delabitur.

§. 496. Sub tam raro salivae *primario* effluxu, *prognosis* momenta ex historia morborum, quibus ptyalismus ut *symptoma* accedit, repetantur oportet. Qui sub fine morborum, sine virium jactura majori contingit: hic salutarem plerumque illorum per has vias solutionem praedicit; atque talem per plures hebdomadas cum evidente beneficio fluxisse conspeximus. Qui salivam vel ex mala et indecora consuetudine, vel ex rebus acrioribus, masticatione, suctione tractatis, copiose rejiciunt: his ciborum digestio labefactari, atque aliae secretiones excretionisque imminui observantur. A fortiori, neque critico ptyalismo, ut ab eo, quem pridem ad luis venereae curationem promovebant, non minus ob humoris nobilioris jacturam, quam ob impeditae masticationis, atque ob somni denegati rationem, extrema corporis debilitas ac macies brevi tempore indicuntur.

§. 497. Quae ratio medendi *secundario* Cura. ptyalismo conveniat: hoc vel aliis hujus operis in locis jam expositum est; vel in

sequentibus succincte tradetur. Quae ex propria glandularum affectione descendit, rarissima est salivatio, atque ex stimulo his organis proxime admoto, plerumque, ut videtur, catarrhali, rheumatico, facilius, quam ex sola debilitate, explicatur. Talem nos ipsi *habitualement* in juvene conspeximus, atque alterum ptyalismi, sex jam per annos verno tempore recurrentis exstat de foemina exemplum. Si calculus salivalem ad ductum aut glandulam suo stimulo ptyalismum inducat: peregrino hoc corpore prudenti sectione ablato, importuna simul exsiccatur salivatio. Quam sibi methodum *traumaticus* ptyalismus ex poscat. Chirurgia nos docet. Ex quocunque demum stimulo glandulae salivales irriterentur; fomentatio nunc sicca ex farina, vel cineribus cum herbis aromaticis atque camphora remistis, nunc humida ex emolliente decocto, cataplasmate, seu calor loci affecti aequalis, moderatus, plerumque conducunt. Salivationem rebellem vesicans nuchae appositum hinc inde moderatur. In aliis, balneum, et quae pellem ad sudores disponant, evacuatio alvina, profuerunt. A collutoriis vi adstringente instruc-

is, in primario ptyalismo, vix multum expectamus; atque in genere retinendum est salivationem, quae morborum ut *crisis* concedit cum periculo repelli; et vel symptomaticum ptyalismum, ne difficilis diarrhoea insequatur, cum prudentia majori esse pertractandum.

ORD. I. GEN. V.

EPIPHORA.

D. lacrym. §. 498. *Epiphorae*, ut *symptomatis*, quod oculorum inflammationem frequentius comitatur, alibi (§, 150.) mentionem jam injecimus; sed, licet profluvii hoc genus rarissime *primarios* ad fluxus pertineat; ejusdem nihilominus considerationem, ut Medicorum attentione non indignam, pro meliori systematis morborum intelligentia hic breviter resumimus. Non paucis quidem animalibus lacrymales glandulas natura distribuit; sed nulli ex istis tam durum ac frequens, quam generi humano, hoc de fonte hauriendi, imposuit onus. *Lacrymarum* vero sub nomine tam rorem illum, qui ex oculi et contigua palpebrarum superficie *insipidus*, ut videtur, evaporat, quam commistum huic ipsi *salsum*, et ex glandulis sibi propriis distillantem, humorum intelligimus: qui, licet ob separationis solus intemperantiam vix debilitatem inducat; ob organi tamen

hunc humorem aut secernentis, aut continentis, aut ab oculo ablegantis vitium, incommodam ac foedam aegritudinem, quam *epiphoram* dixerunt, constituit. Naturam lacrymarum quod attinet, ea si extremam oculi sensidilitatem consideremus, in propria, nec a longiori stagnatione acquisita, sed recentissimo liquori jam concessa, et ipsius adeo urinae acorem superante *salsedine*, jam primo aspectu non indignum admiratione argumentum nobis offert. Limpidus nempe et inodorus, sed, si modo pauca *dulcescentis* sub ophthalmia lacrymae exempla excipiamus, ubique *salsus* hic liquor secernitur: qui, ut recentior Gallorum analysis demonstrat, aquam distillatam pondere modo parum excedit; tincturae *heliotropii* colorem non immutat; sed maculam in charta, vel a violae, vel a malvae succo, coerulea, constanter *viridem* inducit, superighe copiosas et aliqua tenacitate non destitutas bullas mox contrahit; lentius et solo ab aere exsiccatus, *crystallos* ex paucis sale marino et materia alcalina compositas, — citius vero ab igne inspissatus, reliquias, vix partem *centesimam* et *quartam* constituentes, olei et aquae pauxillum, ac tandem carbonem sa-

lina materia onustum subministrantes largitur. Haec liquoris miserorum principia tam calculorum, in caruncula, in sacco lacrymali repertorum, quam crystallorum ex acido amararum, sub opthalma ad palpebras observatarum, historia illustrent. Vel ipsum *sanguinem* non tam raro cum lacrymis se miscuisse, vel *coerulei*, aut *lacteï* coloris materiam circa limbum palpebrarum haesisse, exempla testantur.

Definitio. §. 499. *Epiphora* igitur est lacrymarum, non tam animi dolentis, quam morbosae affectionis imperio inducta, profusio.

Different. §. 500. Rarior est, quam *primariam* vocari liceret, epiphora, et lacrymae plerumque ex alio, quam ex proprio has secernentis organi vitio, abundant, aut palpebris aufugiunt. Est interim, ubi glandulae lacrymales, ut de salivalibus jam dictum est, a phlogosi leviori correptae, aut quocunque demum stimulo agitatae, vel uberiori secretioni indulgere, vel secretum humorem citius, quam par est, e propriis canaliculis emittere videntur. Num sola *debilitas* a praevis ophthalmiis, vel a studiis immodicis inducta sine majoris sensibilitatis ratione, epiphoram *primariam* relinquat, dubitamus.

§. 501.

§. 501. Evidentior in homine, quam in quovis alio animali, subtristi mentis affectu delacrymatio est; atque nil impedit, quin et hunc vitae statum breviores ad morbos referamus. Plerumque oculorum aliquis pruritus, tremula pupillae inundatio, palpebrarum angustatio, nictatio, suspiria, respiratio inaequalis, retractio labiorum, has procellas annunciant. Mox humor oculis circumfusus tam a punctis lacrymalibus suscipitur, atque naribus celerrime advectus, frequentius emungitur; quam guttatim per genas se praecipitat. Quem longa inspiratione pulmones aerem profundius inspirarunt, hunc, a diaphragmate succussi, cum impetu, ac mira vocis inflexione per vices expellunt. Sunt interim, quibus lacrymae sine fletu, ac furtim pallescentes per genas delabantur; atque sub diuturno illarum effluxu, calor, rubor, et quasi phlogosis oculorum, palpebrarum, vix celandā per horas, doloris vestigia relinquunt. Vix autem hae, tam communi hominum sorte expressae ad *epiphoram* revocandae sunt lacrymae; sed vel exaucta per causas alias in glandula lacrymali secretionem, vel ex impedito humoris ad nares defluxu, hic idem, non raro mani-

festa simul acredine instructus, per genas, quas interdum arrodit, inflammat, devolvitur; atque ingrato non minus aspectu quam visus obnubilatione manifesta, *oculum* sub animo quieto *lacrymantem* constituit.

Causae. §. 502. Est aliquid in lacrymarum secretionem, inprimis apud hominem, quod non satis intelligamus: singulare nempe moeroris, gaudii, tenerae misericordiae in glandulam lacrymalem imperium, ut, si modo salivae in esurientibus celeriores affluxum excipiamus, nullibi tam subitaneus, tam involuntarius, tamque conspicuus in organum secernens effectus, — eo major, quo sensibilior est homo, apud infantes atque mulieres certe maximus, habeatur. Sunt adeo inter istas, quibus sub ficto protinus dolore, aut tenero affectu, lacrymae, prout occasio ac astuta voluntas id jubeant, copiosae prorumpant. Interdum non ab animi tristitia, vel organi ex vitio, sed ab incognita nervorum affectione, similis in glandulas lacrymales, quam a fortissimo moerore, actio se prodit: ut plurimas, sub fletu involuntario, fere per horas extenso, lacrymas ab hystericis, hypochondriacis aegrotis, cum nullam sibi fletus causam esse fatentur.

effundi videamus. A fortiori tamen animi dolore, lacrymarum secretio impeditur; et, quod mirum est, a fluxu istarum abundante, non exiguum moestitiæ solamen obtinetur. Sunt, quibus, ob constitutionem peculiarem, ab animi tamen insensibilitate longissime diversam, nec moderatus, nec summus moeror oculos vel unquam humectet. Facillimos in lacrymas et fletum, post apoplexiam, paralyses, aegrotantes deprehendimus, ac in febribus nervosis sine animi consensu, liquor ille ex palpebris decurrit. Interim ex nervorum irritatione pars maxima lacrymarum scaturit. Sub dentium dolore feroci, aut mechanico nervorum, qui hos ipsos, aut nares adeunt, stimulo, copiosa mox lacryma distillat. A corporibus peregrinis oculo illapsis, a trichiasi, distichiasi (§. 150.), — a quovis acri, tum oculis, tum naribus admoto, ut a fumo, vapore spirituosos, ab alli, ceparum, raphani rustici odore, masticatione, quin a frigore, vento a luce vividiore, lectione longa, inprimis nocturna, a contagio morbillosos, variolosos, a phlogosibus catarrhali, effectus iidem habentur. Nec minus sanguinis subitanea et impetuosa, sub tussi, risu, sternutatione fortiori, ad caput

congestio huc spectat. Similia occurrunt, si vel palpebra inferior praeter modum relaxetur, vulneretur, erodatur, aut, extrorsum conversa (*ectropium*) lacrymas, quod etumor, ad carunculam lacrymalem (*enanthus*) facit, ab oculi cantho interno diverstat; vel si puncta lacrymalia, aut continui his saccus, aut ductus, a tumore, ab inflammatione catarrhali, rheumatica: variolosa suppuratione, materia tenaci, a polypo, vel a calculo, vel quovis demum modo, angustentur, exedantur, oblitterentur, atque superfluum ad oculos humorem ad nares, forte simul a polypo infarctas, obstructas transmittere recusent.

Prognosis. §. 503. Nisi partium, quae lacrymas coercent, abducunt, ex vitio epiphora contingat; haec ipsa, in febribus praesertim, nunc morbillos, interdum et variolas, futura, nunc instantem per nares haemorrhagiam, nunc deliria, significat. In febribus nervosis, lacrymatio peioris indicii dicenda est. Frequenter foeminarum, quae fluore albo laborabant, oculos quasi lacrymis innatare conspeximus. Quae ex vitio canalium lacrymalium originem trahit, aut a longo jam tempore continuat, epiphora,

ea, pro causae ratione, aut difficilem, aut nullam curationem admittit.

§. 304. Cum ex alio magis, quam organ- Cura
ni secernentis e vitio, lacrymarum proflu-
via succedant: medendi methodus, ad mor-
bi causas potissimum dirigenda, aliis hujus
operis e locis, atque ex chirurgicis notioni-
bus plerumque eruenda est. Quam nimia
oculorum sensibilitas, lacrymationem ex-
citaverit: hanc paucis tincturae thebaicae
(N. XIX.) guttulis, quotidie in oculum stil-
latis, corrigimus. Si debilitas organi sensi-
bilitatis intemperantiam aut produxerit,
aut commitetur: tunc junctum opio satur-
ni extractum (N. LXII.), — et si ab acri, sti-
mulante materia lacrymarum secretio au-
geri videatur; vesicans emplastrum tem-
porum regioni appositum, atque illa, quae
in ophthalmia his a causis excitata commen-
davimus (§. 154.), indicantur.

O R D. II.
 F R O F L U V I A M U C O S A.
 G E N. I.
 C A T A R R H U S.

Introduc.
gener.

§. 505. Consideratis hucusque (§§. 469. — 504.) profluviis, quae tenuiorem atque *sero- sam* animalium humorum partem dissipando sanitatem offendunt; ad earum nunc, quae *mucosa*, vel simul *lymphatica* sanguinis principia disperdunt, considerationem nos accingimus. Haec quidem, nutritioni potissimum dicata, materia, tum ipso cum sanguine, tum inprimis seroso cum latice tam intime conjuncta incedit: ut apertis, cujuscunque demum generis, vasorum ostiis, vix unum, sine altero, liquidum aufugiat; sed concessa aliqua mucosis principiiis quiete, vel obstaculo naturali, morbo, celeriori humorum cursui oppositio, vel mutatis vasorum secernentium, ex inducta laxitate, aut et stimulo majore, officiis, — haec seri, animali cum glutine unio ac affinitas tam in-

tima infringitur; aufugit illud, aut a vasculis resorbentibus abducitur; ac solvente sibi ablato vehiculo: nutrientis materiae junguntur magis magisque cohaerent principia: in lympham, a qua non aliter, quam sanguis ab ista, perfectae scilicet elaborationis ab organis animalibus necdum expertae ratione, differunt; non magno intervallo abitura. Hinc ab exigua hujus nobilioris principii continuata in longum jactura, longe major, quam a profluvio *seroso*, nisi forsitan cum lymphatica substantia uberius saturato (§§. 473. 480.), insequitur debilitas ac macies; nec paucae, per quas corpus humanum hoc necessario nutritionis adminiculo defraudetur, sunt viae, quas singulas attente a nobis investigari nunc interest.

§. 506. Ac primo quidem *catarrhus* considerandus hic venit: qui scilicet in membranae pituitariae, per vias respirationi patentes extensae, affectione, plerumque ex suppressa transpiratione oriunda, frequenter febrili, plus minus inflammatoria, ac molesto vanoque, ad partem, nunc istam; nunc illam, excretionis molimine, vel, primum, in serosae, salsae et acris, — ac tandem in densioris viscidaeque materiae rejectione consistit.

Definitio
catarrhi.

Species va-
tiae.

§. 507. Pro tanta vero antrorum, sinuum, anfractuum, canalium, quae aer, respirationis sub opere, continuo allidit ac permeat, amplitudine, extensione, — pro tanta membrane, quae haec spiracula investit, sensibilitate, mollitie, — pro tanto nervorum, vasorum, glandularumque numero, — pro tam insigni inter se ipsa, et longinquis cum partibus, consensu, — pro functione organorum tam diversa, pro corporis dispositione praegressa, vel debili et laxa, vel firma et robusta, — oportet morbum, licet originis et causae agentis ratione prorsus eundem, diversa tum in locis affectis, tum in aliis, vicinis non minus, quam distantibus, et in variis hominibus, symptomata agnoscere: quae interim, quamvis et exitus, et methodi medendi respectu non ubique in omnibus, convenient, uno nihilominus eodemque tractandu absolvi, et, quibus inter se confluant, lege, ac ordine exponi merentur.

Nunc vero *coryzae* sub nomine, *cava narium*, ut *sinus frontales*, *sphoenoidales*, aut *antra maxillaria* catarrhus occupat; nunc *faucibus*, *velo pendulo* adhaeret, ac descriptam jam alibi (§. 172.) *cynanchen catarrhalem*, — vel, ad *laryngem* extensus, *raucedinem*, seu *branchum*, —

atque tam dictum ad locum, quam ad *tracheam*, aut ad *bronchia* defixus, *tussim*, seu *laryngis*, *tracheae*, *pulmonum catarrhum*, constituit. Pro varia origine, ac pro febre, quae morbum eundem, *catarrhalis* sub *febris* denominatione, comitatur, diversa, vel et prorsus absente, aliam aliamque hic ipse naturam assumit: nunc *simplex*, nunc alio cum vitio, *venereo*, *scrophuloso*, etc. conjunctus, — nunc sine totius labore, *localis*, — nunc vero, vel *primarius*, cum febre, plerumque *inflammatoria*, *gastrica* interdum, ac, sub corporum, ob humidiores atmosphaeram, vel ob vivendi rationem, laxiorem, debiliorem, ac magis sensilem habitum, — vel, difficiliore sub rerum decursu, non sine contagii, apud equos in *coryza virulenta*, licet aliter Vir eximius contenderit, manifesti, *epidemiae* imperio, vigentis, suspicione, *nervosa*, et in homine cum *exanthemate*, inprimis *miliari*, lubenter incedens; — vel *secundarius*, ab acri morbilloso, varioloso, venereo, aut stimulo, alium per morbum excitato, *symptomatice* in ductus. Non paucos *habituali* catarrho vexari, ac plures existis. ubi pulmo debilior, sensibilior, hoc ad vitium juniores disponat, ulcerosam ad phthisin properare vide-

mus. Alii, crescente mucosae materiae in bronchiis secretionem morbosam, magnam quotidie pituitae puriformis copiam cum tussi rejiciunt, et ex tam longa nutrientis principii jactura, quin ulcus pulmonum, ut causa, subsit, *pituitosam in tabem* labuntur. Aetatem senilem, sub habitu corporis laxiori, catarrhi pulmonum frequentes, ac vix non perpetui, seu *chronici* sine tanto discrimine, divexant. Nec *periodice* incedentis, plerumque *symptomatici*, exemplis destituimur catarrhi. Varius autem est muci, quem partes catarrho affectae excernunt, color; consistentia, natura et copia sunt variae: quae singula, extradenda nunc generum historia, adamussim patebunt.

Coryza. §. 508. Narium catarrhus, *coryza graveda*, vocatur (§. 506.): quae, pro magna specus nasalis extensione, nunc istius modo partem, nunc omnem superficiem prehendit, ac diversa, nunc levia, nunc vero sat gravia symptomata inducit. *Gravedinem*, ut scholae quondam jusserunt, a *coryza*, quod in illa, tenax pituita, sub dolore, ut vocant, *gravativo*, — in hac vero, serosa, tenuis, acrisve materies effluere dicatur, cum modo gradu et tempore hae differant, distingui nil in-

terest; sed juvat, singula, quae simplici-
ori hoc morbo, quasi sub oculis aguntur,
non contemni, sed ut fidelem eorum, quae
in trachea, et in bronchiis, graviora in aliis,
contingunt, imaginem attente contemplari.

Sub *narium* ipsarum *catarrho*, siccitatis in- C. *narium*.
gratae, plenitudinis, tensionis sensatio,
aquae oculis subturbidis, languidis, rubel-
lis, suffusae, vox obtusa, nasalis, ut vocant,
odorum, et adeo saporis, perceptio immi-
nuta, cum cutis universae ad frigus sensi-
bilitate majori, aurium sussurrus, emun-
gendi continua necessitas, sternutatio fre-
quens ac molesta, praecedunt. Haec sequi-
tur indecora liquidi serosi, calentis, subsal-
si lacrymae non absimilis, et acris, copio-
sissima interdum, distillatio: qua *narium*
pars ima, per labrum, rubescis, et ardet.
Interea mucosa illarum, ac ductuum, sac-
corumque lacrymalium interna membrana
turgēt, et aeri non minus ad nares ingres-
sum, quam lacrymarum ad illas descensum
praecludit. Hinc istas, ad oculum morari,
vel calentes, per genas devolvi ac spiritum,
cum edimus, dormimus, nisi ore aperto,
quod teneris infantibus, his necdum assue-
tis, permolestum est, somnumque arcet,

difficulter hauriri oportet. Accedunt capitis obnubilatio, gravitas, ut dolor frontis sat molestus, horripilationis, caloris, vagi, ad noctem crescentis, sensatio, ac ipsa demum febris, ac phlogosis per nares extensae, graviori sub affectu, non desunt indicia. Per plures haec dies, non aequali tamen semper vigore, — interdum per multas, continuant, dolorque obtusus, internus, per velum palatinum, posterius, ad fauces expanditur: quo loco, mucus ab aere inspirato, sub somno, in lemas aut crustas exsiccatus, irritationem adauget, ac levem simul, deglutitionis sub opere, dolorem inducit. Tandem, nunc citius, nunc tardius, loco seri pellucidi, liquidum paulo crassius, mucosum, ac sensim sensimque, cum facillitate majori, glutinosa, vel alba, vel flava, interdum subviridis, vel striis ex sanguine, remistis, sat foetidi subinde odoris, pituita, copiose ac plures per dies, emungitur, ac pristina odoris, saporis, spiritusque integritas, non sine magnae levitatis ac promptioris ingenii sensatione, restituitur.

Vel eodem, quo nares a catarrho tenentur, tempore, vel hac parte vix adeo affecta, similia *sphoenoidales*, ac *frontales* ad sinus,

ad antrum maxillare, vel uno, vel utroque ex latere, contingunt. Sed praecipuam attentionem sibi cava in ossibus frontis, et maxillae superioris exculpta merentur: quae coeteris capacitate majora, causisque laedentibus magis exposita, non raro difficiles, obscurosque catarrhos patiuntur.

Nunc etenim tensionis, plenitudinis, caloris interni, et vel obtusi, vel satis acuti, lancinantis, profundi tamen, doloris, a nasi radice, per unius, vel utriusque supercilii regionem extensi, sensatio, cum hemicrania, cephalagia, oculorum lacrymatione, rubore, de *sinu frontalis* catarrho testatur.

C. sinus
front.

Nunc ad maxillam supernam, loco dentibus oculoque intermedio, haec dicta, et communia catarrhis, signa premunt, nasi-que cavum vicinum siccescit, aut emunctionis sub opere, cum doloris incremento, nil muci excernit; aut gena pallide hic tumet, calet, aut rubore suffusa est; vel dentes, inprimis sub attactu, manducatione ciborum; affecto in latere obtuse dolere videntur; gingivae calent, rubentque, nec palati ad fornicem ubique pressionis desunt, aut ponderis, tensionis molestae symptomata. His vero amplioribus in ca-

C. antri
maxill.

vis, a phlogosi, aut et violenta inflammatione, occupatis, non minus, ac ad alia (§. 126.), *hydropes acuti* hinc inde nascuntur; ac serum copiosum, nunc purum, nunc puriformi liquore inquinatum, colligitur: quod, vel remoto ad ostia, cum narium cavitate communicantia, obstaculo, vel sub capitis in partem aegrotanti adversam decubitu, interdum copiose, cum impetu prorumpit; aut; propria vesicula, seu cystide inclusum, abunde distillat.

Sed, quod jam de narium ipsarum catarrho, in opta tam resolutionem abeunte, monuimus, elapsis aliquot, aut pluribus, a primo hujus morbi insultu, diebus, tenuis loco seri, aut siccitatis molestae, pituita viscida, glutinosa, nunc alba, flava, subviridis, nunc puriformis, ac striis sanguineis notata, interdum sat foetida, interdum, ut vidimus, dentissima, fere cerea, vel, capite ad anteriora reclinato, ex *sinu frontali*, — vel, illo in latus sanum converso, ex *sinu maxillari* affecto, emungitur copiosa, et morbus dissipatur in integrum.

Abscessus
ozaena.

§. 509. Non vero tam felix erit morbi has ad partes haerentis, et vel inflammatione violenta stipati, vel ab acri virulento, vel

quocunque a stimulo, qui auferri sat cito non possit, inducti, exitus. Non rarum est scilicet, a causis catarrhi, aliisque non paucis (§. 513.), tum ipsas ad nares, tum ad sinus, praecipue *frontales*, vel et *antra maxillaria*, *abscessus*, nunc satis manifestos, nunc maxime obscuros, clandestinos, generari: qui praeter communia internae suppurationis phaenomena (§. 126. 128.), odoratùs majorem, minoremque laesionem spongiosas ac tenues hujus osseae compagis lamellas vel comprimunt, vel situ naturali expellunt, vel maxime distendunt, extenuant ac plurima, chirurgis non ignota, incommoda parturiunt. In *ulcus* sordidum ad nares, vel dictas ad partes, mutato abscessu, *oxoena* subsequitur: nunc *simplex* atque satis *benigna*, nunc vero, ob cariem ad partes vicinas extensam, ob foetorum insignem, vel ipsis aegrotis non minus, ac aliis, intolerabilis, ob causae virulentae, specificae actionem, ob fistulas, excrescentias fungosas, polyposas, steatomatosas, scirrhasas, cancrasas, *complicata*, vel summopere *maligna*, vel curatu difficilima.

Ad *sinum* scilicet *frontalem*; vel unum, vel alterum, *abscessus*, *oxaena*, — sub dolore in

Ab. oz. sin.
front.

aliis, obtuso, in aliis, pulsante, acutissimo, — sub febre, in his, magna, in illis, pauca, vel nulla, — nisi acerrimo ichori exitus ad nares paretur, ossis, in quo hic stagnat, substantiam, exesoperiostio, emolliunt, distendunt, erodunt; ac, vel ablato, quod sinus frontales bipartit, sepimento, in lacum communem hos efformant; vel, laminâ sinu interna ad cerebrum protrusa, soporem, stuporem, ac, rupto repagulo, mortem aegroto, apoplecticam inducunt; vel carie superiorem in palpebram patente, hanc ipsam sanie rodente suffudunt; vel deum aliam, per orbitam erosam viam, sibi pandunt; ac unum subinde cum naribus, et antro maxillari cavum constituunt. Nares in totum, cum ossibus palati, velo pendulo, ab *ozoena venerea*, exesas, atque ut unum cum antris maxillaribus specum, aspectu horrendam, formarent, consumtas, in Viro, tandem a phthisi pulmonum perempto, et a nobis *Bruehsaliae* dissecto, conspeximus. Similes tumorem hoc in sinu luxuriantem, spongiosum, scirrhum, tam a pressione, quam a maligna, cancrosa suppuratione, calamitates expectant.

Nec multum ab istis distant, quas *antri maxillaris ozaena*, excrescentiae fungosae, canerosae, exostoses, inducunt, miseriae. Non quidem simplex puriformis, vel et foetidi liquoris, hoc ex sinu defluxus, latentem in antro *suppurationem* sat valide confirmat; ast vero, cum inflammationis hac in specu diutius vigentis exposita jam phaenomena praeiverint: — cum puris jam facti signa (§. 118.) sequantur, ac doloris pulsantis lancinantis, sub decubitu in partem affectam, et sub emunctione aucti, sensus succedat; — si gena rubeat, tumeatque, aut maxillae, vel exterius, vel palati ad fornicem, prominentiam sub digitis cedentem, fragoris non ubique expertem, exhibeat; si, capite in partem sanam converso, ichor brunei aut atrii coloris, foetidusque distillet; — maxime vero si fistula vel caries ad malam, vel ad orbitam, gingivam, alveolos, palatum existat, ac si dentes hoc loco vacillent, longiores videantur, aut cariem ostendant; tunc de latente hoc in antro ulcere cariioso, vel ozaena, aut saltem de fungosa, hic loci luxuriante, excrescentia, vix dubitum relinquitur.

Oz antr.
max.

Raucedo.

§. 510. Non raro faucium, laryngis membrana mucosa eodem, quo narium illa (§. 508,), modo afficitur; atque *cynanchen* illinc *catarrhalem* (§. 172.), hic vero *branchum*, ut diximus, — interdum utrumque simul vitium, constituit. Saepe fauces titillatione ingrata correptae, ad noctem inprimis, siccescunt et ardent; subsequitur vox aspera, obscura, imminuta, vel *rauceso*; nec cibi tam facile per pharyngeam, nec aer tam expedite per laryngeam, iter absolvunt; sed tussis sicca, vel saltem screatio materiae aquosae, salsae, levis horripilatio, vagusque calor, sitis, lassitudo, inappetentia, hominem, vix lectulo adstrictum, tenent. Post aliquot dies, praevia subinde nausea, horis matutinis, ejicitur mucus sensim sensimque copiosior, crassior, tenax, albescens, nec tamen e pectore, sed solis e faucibus, larynge, eductus: vox redit sonora, expectorationis immittitur necessitas, ac pristina spirandi, deglutiendi facilitas restituitur. Sunt, qui, praecipue ex senibus, quotidie praemaenam a somno pituitae ex faucibus copiam eructent, atque *chronico pharyngis catarrho*, sine magna molestia, in perpetuum, aut tempore hyberno, humidoque praesertim, la-

borent. Sunt alii, quibus, sine tanto mucis apparatu, vox plurimum *rauescat*, aut etiam *deleatur* in totum. Multiplex hujus mali, non raro pertinacis, ac interdum *periodici*, natura est. Ipsum quidem *vocis*, cujus instrumentum larynx est, *abolitionem*, *aphoniam*, Aphonia.
 — *loquelae* vero, quae oris perficitur organo, *jacturam*, *alaliam* dixerunt. Utrumque mali Alalia.
 genus, nunc ex causa ad ipsa vocis, loquelae instrumenta residente, *primarium*, oritur: nunc morbi alterius symptoma *secundarium*, constituit, atque non raro ex viscerum cum larynge *consensu*, prout alibi docuimus, ac loco opportuno uberius referemus, descendit. Quae *branchi acuti*, facileque *lethalis* referuntur, — ea vel ad *cynanchen laryngeam* (§. 173.), vel ad convulsivos hujus fistulae affectus, reducenda sunt, exempla.

§. 511. Non aliena ab istis (§§. 509. 510.) C. tracheal.
bronchial.
 in *trachea*, et in *bronchiis* contingunt: quae, cum *tussim*, ut princeps symptoma, inducant: ab hac ipsa, non satis aptam, ac morbis aliis, indole quamplurimum diversis, non minus concessam, denominationem habuerunt. Qui vero catarrhus haec loca paulo fortiusprehendit; is, affinia descriptis (§§. 173. 186. 188.), aut facile in *tracheiti-*

dem, peripneumoniam, tum veram, tum notham, abitura, symptomata excitare consuevit. Nunc etenim febris manifesta catarrhum tracheae, bronchiorum, comitatur: quae ipsa in dolem frequentius inflammatoriam, — hinc inde vel gastricam, vel et nervosam, ab annua constitutione, aegroti habitu, vel causae praegressae ratione, assumit; nunc febris nulla, aut certe pauca, hoc, locale quasi, vitium distinguit; ac mitiora sunt catarrhi trachealis, pulmonalis phoenomena. Non rarum est, coryzae, raucedinis symptomata cum istis conjungi; sed in multis modo aspera arteria, aut bronchia affecta sunt: ut in quibus, sub eadem licet membranae mucosae, quam ad nares aut fauces aegrotantes, conditione, diversa tamen symptomata succedunt. Praeter communes scilicet catarrhis vespertinos, levesque horrores, calores fugaces, dolores tum dorsi, tum artuum tensivos, pungentes, lassitudinem, quae sub noctis ingressu, cum febre, si haec simul adfuerit, augentur, tempore matutino remittunt, — siccitatis, titillationis ingratae, ardoris, vel tracheae ad tractum, vel in pectoris profundo, sensatio, spiratio plus minus difficilis, ac tussis continua, ab ini-

tio maxime, ob siccitatem, molesta inprimis a loquela, forteque ac profunda inspiratione mox augenda, insurgunt. Si quid primis hujus morbi diebus ex trachea expellitur: aquosum, salsum spumosumque humorum hoc offert, sub impetu tussis majori, striis hinc inde cruentis remistum. Tam vehementer interdum haec tussis urget, ut vomitus vel in illis, quibus alia coeteroquin ad hunc causa non est, nunc simplex aquosus, nunc bile, alimentis remistus, frequenter moveatur; in gravidis, non raro abortus, in aliis prolapsus vaginae, aut herniae, vertignes apoplexiae, lacrymationes involuntariae haemorrhagiae per nares, pulmones, hos motus thoracis feroces, convulsivos, ac vix non suffocantes, sequuntur. Post aliquot, nec certos tamen numero, dies, matutinas inprimis ad horas, jam spissior quodammodo, sed pauca adhucdam, materia, sub tussi minus violenta, facilius educitur. Quodsi rectam vivendi rationem observet aegrotus; res in dies in melius convertitur; ac sputa gradatim copiosiora, tenaciora, albescentia, cum magno pectoris emolumento plures per dies, donec iterum decrescant, facillime secedunt; transpiratio

aequalis, vaporosa matutinas ad horas subintrat, urinae sedimentum lateritium deponunt ac pristina valetudo restituitur. Neglectis vero morbi initiis, vel catarrho stimulantibus, ac methodo calefaciente tractata, vel demum frigore incaute, ad pulmones imprimis, admissio, difficultas spirandi, tussis violentia, pectoris ardor internus, ac febris augentur; nec raro, sub fallacissimo catarrhi innocentis aspectu, in plenam discrimine peripneumoniam aegritudo convertitur; ac saepe nimis pulmonis suppuratio, ac phthisis ulcerosa, imprimis apud illos, qui hunc in morbum inclinant, aut praevia in pulmonibus tubercula tulerunt, succedunt.

C epidem.
influenza.

§. 512. Tum vere, autumno catarrhi inter infantes, pueros, senes, laxaeque structurae homines, ob tempestatis vicissitudines, quam maxime regnant; sed nullo non tempore, ac imprimis sub athmosphaerae ex calida in frigidam humidamque transitu subitaneo, populares redduntur. Interim, quin tam evidens ubique in ambiente nos aere mutatio praecesserit, interdum catarrhi febriles per provincias divagantur; ex una in alteram serpendo, per integrum vix

non orbem, passu lento vel celeri, sed ad certam itineris morborum directionem suscepto, non sine magna latentis contagii suspitione, feruntur; ac omnes fere incolas, sine habito aetatis, sexus, conditionis, vitae generis discrimine, infestant. Symptomata *epidemici* hujus catarrhi, cum descriptis in genere conveniunt; ac simul omnem membranam mucosam, qua late partes respirationi apertas investit, plus minus affectam testantur; sed celerior, vehementior est febris, ac interdum ipsius catarrhi, decursus, — evidentior per crises cutaneas solutio est. Confestim, ac die vix non eodem, fere omnes habitantes invadunt torpor, artuum, dorsi lassitudo, debilitas universalis, vertiginosa capitis obnubilatio, horripilatio vaga, mox horror, plerumque sat validus, calor vehemens, insomnia, in quibusdam deliria; cephalaea, in multis nausea, amaror oris, vomituro, vomitus, sitis vel ingens, vel pauca, coryza, vehemens sternutatio, lacrymatio ac rubor oculorum, raucitas dolorque faucium, tussis sicca. in quibusdam sputa sanguini commista, cum pectoris oppressione, dolore hinc inde quasi pleuritico, pulsus frequens, in aliis mol-

lis, ac parvus, in aliis magnus et durus; sanguis eductus, nunc corio obtectus, nunc eodem privatus; urina sub initio fere cruda, aquosa. Quibus sudor copiosus vel sponte, post primam mox diem, prorumpit: hi facile a morbo liberantur; in aliis, remittentibus matutinas ad horas symptomatis, ad noctem similia ac pridie contingunt, ac saepe tertia, quarta, quintave die, post vehementem horrorem, calorem ardentem, deliria, sudor copiosus, odoris acidi, viscosus excutitur; aut ad labra pustulae efflorescunt; urinae sedimentum lateritium deponunt, ac febris profligatur vix non omnis. Non sic tussis in omnibus cum febre sedatur; sed in pluribus per multas adhuc dies continuat, ac sputa tenacia, glutinosa copiose secedunt. Haec interim non in singulis eodem se modo manifestant; sed levior, ac prorsus sine febre, in istis, — gravior in illis, aegritudo occurrit: nec non pro varia vivendi, medendique ratione, nunc paucis a diebus haec dispellitur: nunc plures per hebdomadas, neglecta, decurrit. Pro tanta vero symptomatum gravitate, modo pauca morbi lethalitas, sub ipso quidem epidemiae decursu, apparet; sed plu-

res post menses sat multi, ut vidimus, pulmone suppurati perierunt; et qui vitio pulmonis, vel alio, jam pridem laboraverant, hi utique majora discrimina subibant. Abortus non pauci, sub tam communi affectione, in civitatibus contingunt.

Inflammatoriam plerumque *catarrhus epidemicus*, ac benignam, ut vocant, naturam observat; sed febris nervosae cum eodem non minus, quam cum catarrho quovis sporadico, aut alio, conjunctae; exempla non desunt; et magna interdum huic morbo cum *cynanche maligna, ulcerosa* (§§. 175. 296.), aut cum *peripneumonia nervosa* (§. 190.), est affinitas.

Sub eadem catarrhali, epidemica aegritudine subinde dolor et ardor ventriculi, intestinorum, cum ventris fluxu tenesmo, in quibusdam insurgit: et causae ejusdem in viscera magis abdominis, quam pectoris, actionem ostendit.

§. 515. Ad *chronicum catarrhum* retulimus affectum, quo, sub mucii copiosi in bronchiis secretionem, ac sub materiae puriformis scretu, in longum protractis, debilitas, febricula, macies, ac phthiseos pulmonalis quamplurima, quin ulcus pulmonem devastet, symptomata sequuntur (§. 506.).

Tabes
pul-
pituit.

Bronchiorum hic status, vix ab illo vaginae, apud mulieres fluore albo laborantes, vel urethrae a chronica blennorrhoea affectae, differt; sed ob majorem illorum superficiem, ob mucī morbose hic secreti abundantiam, ob visceris nobilitatem, tristiores effectus inducit. Hoc scilicet viscus, omnis, qui toto ex corpore redit, cruor, — et, qui vix huic admistus fuit, chylus, allidit. Non mirum hinc videbitur, si pars major principii nutritivae, ut in ipso *diabete* per renes, sub mucī albescentis, *subdulcis* aspectu, per amplissimam bronchiorum superficiem, aut nimis laxam, aut simul stimulo morbo-so ad exuberantem secretionem coactam, aufugiat; et sub tussi continua, sub multiplici sputorum conditione, *tabes*, cui debilitas conspicua, febris lenta, sudor nocturnus, dispnoea, oedema pedum, ut symptomata et phthisi pulmonali ex ulcere productae communia, accedant, nascatur. Hinc plures, qui ex ulcere pulmonum contabuisse, et mortem traxisse videbantur, aperto cadavere, nec minimum illius vestigium obtulere, nec sputa, quae purulenta in viventibus fuisse quivis jurasset, aliam, quam perversae secretionis, communem cum

nucio in coryza, in fluore albo, in blennorrhoea secreto, originem habuere. Nec deest illorum, qui hoc in morbo, ex pulmone integro, aut certe ulceribus haud quamquam absesso, sanguinem rejecerint, ac si tum in aliquo thoracis loco ardorem, dolorem accusaverint, exempla: ex quibus singulis, quam incertae sint phthiseos pulmonalis feliciter sanatae historiae, et quam idem remedia ad ulcus pulmonum consolidandum laudata, mereantur, elucet. Difficilis hinc morbi utriusque diagnosi, eoque certe difficilior dicenda est: quod, *puris, mucosae* ubique distinguendi adhucdum nos lateat peritia; quod sub tabis pituitosae pro vectioris gradu, quod hanc non induxit, *ulcus accedere*, ac phthisis vera pulmonum adungi queat. Si quis interim ad phthiseos pulmonalis ulcerosae, quae alibi exponemus, signa attentius respexerit; si longum morbi catarrhalis, sine febre mox conjuncta, in homine vix ad phthisin praedisposito, sed laxae constitutionis, ac aliis forsitan mucosis fluxibus, primarumque viarum incommodis, non ita raro subjecto, decursum consideraverit; si febrim non prius, ac major jam debilitas secuta fuerit,

diuturno catarrho accessisse conspexerit; si materiae per tussin rejectae color, pelluciditas, tenacitas, rotunditas, levitas, quantitas a primo jam morbi initio conspicua, diversam a pure, quod parvum ulcus largiri jam posset, indolem ostenderit; si major sub inspiratione profunda libertas et immunitas a tussi subfuerint; si sputa interdum, comparente inprimis alibi dolore rheumatico, quin febris, dispnoea sequerentur, per menses disparuisse, ac tempore pluvioso, frigido, et catarrhis favente rediisse sint visa; si methodus corroborans aegrotanti conduxerit; tunc morbum non ex ulcere pulmonis, sed ex perversa in bronchiorum membrana mucosa secretionem venire, spes magna aufferget.

Cath. chr.

Qui *chronico catarrho* sine tanta pituitae profusione, plerumque senes laxique homines, laborant: hi aut febre immunes, aut modo per vices et post atmosphaerae mutationes manifestas ab eadem correpti, nec maciem conspicuam, nec virium decrementum, ut in tabe pituitosa pulmonum, ostendunt; tenacem, in filis ductilem, ac fuso quasi vitro consimilem pituitam cum tussi, praeunte sat miti dispnoea, matuti-

nas ad horas expectorant; hoc facto, liberius respirant, ac plures per dies, interdum per menses, imprimis hibernos, similia patiuntur; sub coelo sereno calidoque, valetudinem recuperant, ac saepe aetatem provectam, sine aliis incommodis, attingunt. Nec semper pulmo, sed pharynx interdum, aut aspera cum laringe arteria. catarrhi huius chronici sedem constituent; ac primo in casu, screatu pituitae copiosae matutino, — in altero, tussi, sub dispnoea moderata, sat facili, ac sputis globosis ac viscidis, interdum erysipelate, aut herpete, quo pridem laboraverant, ad cutem redeunte, sine mora liberantur. Non rarum est interim, homines a chronico catarrho vexatos, ac flaccidis pulmonibus instructos, fortiori sub accessu, *peripneumoniae*, quam *notham* vocavimus (§. 188.), pericula incurrere; ac ob mucici non minus visciditatem, quam copia pulmones obruentem, et pituitae tenacis expectorandae impotentiam, a *catarrho*, quem *suffocatorium*, ex effectu, denominant, brevi temporis spatio, strangulatum ad instar, perire.

§. 514. Causae catarrhi tum generales, Causae.
tum speciales recensendae nunc veniunt.

Quaecunque scilicet membranam, quae vias respirationi dicatas obducit, pituitariam, stimulo, ad maiorem fortemque inflammationem non protinus sufficiente, afficiunt; affluxum sanguinis haec ad loca adaugent, secretionem immutant, pervertunt. ea producendi catarrhi vim possident. Frequentissima ex istis est materiae, quae per cutem expellenda fuisset, per frigus repentine admissum, retentio. Haec si ad partes musculosas, periostium, ligamenta, vel ad viscera feratur, *rheuma*, — ad mollem, quae mucus, nares, fauces, tracheam, bronchia obliniens secernitur, membranam delata, *catarrhos* producit. Qua ratione id faciat? id satis obscurum est; et quod magis difficultatem adauget, est: quod rarius ex corporis totius, quam ex partis solitariae, refrigerio catarrhus oriatur. Mephitim, quam pulmo, — hanc certe cutis non spirat; sed aliud, incognitum principium, quod excerni impenitus quocunque feratur, irritationem inducat, pro parte irritata diversam, transpirationis materiae inesse communissimi effectus testantur. Forsitan quae ad omnem corporis superficiem simul retinetur: ea, ob copiam, per alia mox organa, per renes

potissimum, nec raro per tubum intestinalem, promptius, ac pauca, quam partis unius refrigerium cohibuit, eliminatur materia. Nec mirum est, si destinata per cutem externam difflari, — sed ab eadem repulsa, internae transpirationis affinia, laxiora, ac simul sensibilissima ad organa facilius, quam alias ad partes, ferantur principia; — vel, si illa ipsa, frigidioris ab aerae attactu occlusa, irritata, quam exhalare debuissent, sinu proprio stimulantem retineant foveantque materiam: qua scilicet causa, adaucto humorum affluxu, exhalantium vasorum manifestius stillicidium, folliculorum mucosorum infractus, phlogosis, mutata secretio, plenitudinis, ardoris sensus, ac singula catarrhi, seu inflammationis superficialis et quasi crysipelaceae, symptomata, sine culpa praevisi in humoribus vitii, sibi mutuo succedunt. Si mitior est phlogosis: tunc, febris excitandae impar, localem modo, brevique temporis spatio absolvendam affectionem producit; si fortior est stimulus, aut major sensibilitas, vel praevisi totius, aut partis, longo sermone, clamore aestuantis, ad phlogosin dispositio: tuuc membranae mucosae phlegmonosa inflammatio, cum

symptomatis, et exitu, pro partis affectae varietate, diversis; accenditur.

Sub hac igitur materiae transpirabilis retentae, nec alias per vias sat prompte excretae noxa, quaecunque aut majorem ac par est, humorum ad cutem affluxum excitant; — aut morbosam hujus organi sensibilitatem inducunt; — quaecunque membranarum, faucium, tracheae, bronchiorum mucosam ad suscipiendam, retinendam stimulantem materiam praeparent: ea partes praedictas ad catarrhos quam maxime disponunt. Hinc immodicus hypocausti calor, ac succedens huic frigus atmosphaerae repentinum, — hinc partis corporis unius prae altera, vel camini ad ignem, vel solis ad radios, vel fotu vestium nimis sollicito, vel continuato exercitio inducta calefactio, ac subsequens illius ab aura frigidiori perflatus, — hinc vestium hibernarum ad inconstantes veris tepores praecox depositio, aut aestivi, levioris amictus protractus in serum autumnum usus, — hinc anxia, nec tamen ubique possibilis, aerae liberioris fuga, ac certa quasi hominum literatorum, effeminatorum *aerophobia*, balneorum calidorum, sudoriferorum, eorumque, quibus

cutis

cutis robur infringitur, sensibilitas auge-
tur, abusus, — hinc frequens catarrhalis af-
fectionis ad partem eandem reditus, ac in-
ducta hic loci, cum sensibilitate morbosa,
laxitas, — hinc forsitan congenita instru-
mentorum respirationi dicatorum imbe-
cillitas, ad provocandos catarrhos praeci-
pue disponit.

Sed et alia existere videntur, quae, vel
per aerem inspiratum, sub quocunque ca-
loris gradu, admota, vel ab eodem ex pul-
monibus non satis eliminata, membranam,
pituitosam non aliter, ac transpirationis re-
tropressae materia, afficiant. Vapore sul-
phuris, arsenici, licet pauco, per athmos-
phaeram difuso, vel fumo, aut re quavis
subtili, irritante per aerem dispersis, ac
pulmonibus incaute susceptis, mox fortis
in sensili membrana tracheae, bronchio-
rum, stimulus, et catarrhi breviora, vel
longiora symptomata succedunt. Saepe,
sub aere nebuloso, quin hic frigore nota-
bili offendat, catarrhi, vix non omnes, vel
ob latentem in hoc, subfoetido interdum,
athmosphaerae lixivio irritantem materi-
am, vel quod illud ipsum, ab aqua jam ni-
mis staruratum, exhalatos pulmonibus va-

pores minus prompte suscipiat, vel quod humidum copiosius cum aere inspiratum, membranam bronchiorum mucosam continuo relaxet,prehendunt. An specificum, quod catarrhos apud homines subinde inducat, *contagium* existat? dubitare liceret; sed illius, quod morbillos, variolas, scarlatinam evolvit, manifesta in membranam narium, faucium, bronchiorum mucosam actio, ac celerrima catarrhorum, sub diversa atmosphaerae conditione per familias eodem sub tecto habitantes expansio, nec non ozoenae virulentae inter equos contagiosa natura, verisimile hoc reddunt.

Nec rarum est, ab acri, quocunque a partibus externis, internis, respirationis ad vias conjecto, catarrhales affectus oriri, ac frequentia ex ulcere, impetigine quacunque antiquis, blennorrhoea, sudore pedum, axillarum incaute tractatis, a rheumate, erysipelate, metastasi has ad partes aliunde conversis, catarrhorum exempla habentur.

Ex ipso adeo *consensu*, abdominali inprimis, non modo tusses, sed ipsos catarrhos oriri, experientia confirmat. Nec certe, cum et oculos (§. 152.), et fauces (§. 171.), et ip-

sos pulmones (§. 189.), hac a causa non raro incendi sciamus; cum tantam pituitae sub tussi ferina, cujus saepe in abdomine origo est, copiam in pectore secerni videamus; mirabimur, sensilissimam bronchiorum superficiem internam a nervis ventriculi, intestinorum, per bilem acriorem, saburras corruptas, aut per vermes, continuo irritatis, similia experiri, aut longas vanasque per tusses ad phlogosin ac morbosas secretiones incitari. Hinc ratio summae interdum virtutis emeticorum, purgantium in catarrhis, praeprimis epidemicis, cum gastrica febre manifeste conjunctis, atque adeo spontaneae, qua non pauci catarrhi solvuntur, diarrhoeae, elucet; quin igitur, cum summo aegrotantium damno, mox quamvis aut oris amaritiem, aut linguae spurcitiem, aut nauseam, vomitionem, vel ipsum adeo vomitum, utpote prorsus in multis symptomata, pro sufficienti emeticorum indicatione habamus (§§. 186. 189.). Enarratae vix causae in membranam mucosam, nunc, qua late per has vias expanditur, omnem, nunc modo in partem illius, operantur.

C. special.

Coryzae.

Coryzam tamen (§. 507.), capitis ipsius, pedumque, apud teneros infantes frequentissima, refrigeratio potissimum inducit. Facilius haec in illis, qui nimis caput integumentis fovent, succedit. Non raro acria quaecunque ad nares, utpote declive, semperque pervium stimulis externis muci collatorium, feruntur. Ab acci arthritico ad nervos narium ac linguae deposito, et gustus, et odoratus in viro jacturam, ut nec salis ammoniaci volatilis penetrantissimum odorem distingueret, sed modo aliquem ab illo stimulum accusaret, observavimus. Singularis plane *virus venerei* in membranam faucium nariumque mucosam est nisus, et frequens abhinc *ozoenae*, his partibus facile funestae, occasio. *Morbillosum* praecipue coryza praecedat, comitatur contagium; atque ipsae *variolae* interdum hoc signo incidunt; vel ipsas abscessuli nares infestant, exulcerant, vel prorsus, ut vidimus, obliterant. *Scarlatinae* malignae furores in fauces, cava narium, jam alibi (§. 296.) adduximus. Nec vobis *leprosi viri*, in nares praecipue ruentis, tristissimi effectus (§. 455.) ignoti sunt. *Erysipelas* (§. 281.), et ipsa *tinea faciei* (§. 447.) non raro internam narium

membranam infestant; ac sicut nares infantibus neonatis copiosius stillant: ita *dentitionis* inprimis sub opere coryza symptomatice huic aetati familiaris, et abundans serimucique nasalis secretio est. Non raro dentes, alveoli maxillae superioris cariosi, istius ad antrum phlogosin, secretiones morbosas, et ulcera inducunt. Ictus, violentia quaevis ad nares, ad sinus maxillares, frontales, — vel et insecta his in cavis recepta, evoluta; similes in aliis effectus agnoscunt. Vel ipse *nicotianae tabaci* pulvis, qui saepe rebus non parum suspectis et acribus commistus, ad nares ducitur, istarum superficiem interdum aggreditur, exulcerat, ac sensum odoris non parum in multis obtundit, aut prorsus abolet. Nec minus *polypus*, excrescentia fungosa tum narium ipsarum, tum sinuum maxillarium, frontalem, irritando, comprimendo, coryzae symptomata inducunt, vel forsitan violenter extracta, ad ulcera vel cariem narium contribuunt. *Chronicus*, a *calculo* ad nasi cavum haerente catarrhus describitur; in aliis juncta cum laxitate membranae mucosae sensibilitas major, aut angustior narium conformatio, ad coryzas habituales disponere videntur.

Branchi.

Praeter generales catarrhi fauces, laryngem, aut asperam arteriam occupantis, causas, aliae commemorandae hic veniunt. Ipsius quidem *raucedinis*, seu *branchi* (§. 509.), difficilimae saepe curationis morbi, causa est multiplex: ac illius non minus, quam *aphoniae*, frequens longinquis in partibus, in pulmonibus, ipso in utero, ac imprimis in abdomine, origo est. Insigne in vocis organon nervi, *recurrentes* potissimum, imperium exercent. A scarabaeo vivo, ab infante deglutito, mox raucitas observata est. *Aphoniae* a vermibus inductae exempla tum aliis, tum nobis ipsis oblata sunt; atque alibi (§. 217.) eandem *peritonitidis puerperalis* non insolitum phaenomenon sistere retulimus. Ab injectione adstringente, post abdominis paracenthesein, ventris in cavum instituta, — ab inflammatione pericardii, quo loco plures, ex *recurrentibus*, ramulos nervosos accipit, *aphoniam*, *dysphagiam*, et mira vocis, nunc in acutissimam, nunc in profundam, mutatae, phaenomena alii notarunt. A nervo *recurrente*, aut lateris unius, aut utriusque, sub experimento in animalibus capto, — vel in homine, sub bronchocelis operatione, vel sub vulnere juguli, discisso, aut raucitas in-

sanabilis, aut perfecta vocis extinctio, insequitur. Vix morbus est gravior, qui vocem aegrotantis non valide afficiat; ac ipsa quantum pubertas ac prima *seminis* secretio apud pueros vocis organon immutet, est nemo, qui ignoret.

Sed cum toties, longinquas ad causas, vocis aliter aliterque instrumenta respondeant; frequentius tamen ad haec ipsa, ad fauces, laryngem, raucedinis causam haerere, experientia confirmat. Sunt, quibus per vitam vox clara; sonora recusetur, et qui perpetuam, sine morbo, loquendo raucedinem prodant. Potissimam vero istius causam sistunt, muci blandioris, laryngem ac fauces oblinientis defectus, aut major, quam par est, copia, aut excedens tenacitas, aut a pulvere in tracheam illapso impuritas; membranae ipsius mucosae laxitas, flacciditas; istius, ac folliculorum, glandularum intumescencia, inaequalitas, phlogosis, varicositas; exanthema, impetigo, erosio vel ulcus ad epiglottidis, laryngis internam superficiem; cartilaginum, quae laryngem constituunt, rigiditas fere ossea, immobilitas, fissio, fractura, compressio; depositio materiae rheumaticae, arthriticae, calca-

reae, tophaceae, metastasis; spasmodica, paralytica, musculorum laryngis affectio. Coeterum, quae alios catarrhos inducunt, inprimis susceptum, post cantus, exercitia oratoria, vel longas vociferationes, ex vento gelido, contrario, ex potu glaciali, corpori aestuanti ingesto, refrigerium, raucedinem excitare valebunt. Qui vini potu vel maxime sunt dediti, vix non perpetua raucedine laborant.

Cat. trach.
bronch.

Ab istis vix differunt causae quae *tracheae, bronchiorumque catarrhum*, tam acutum (§§. 511. 512.), quam chronicum (§. 513.), progenerant, ac omnis ex loco, in quem illae agunt, est diversitas. Ipsa quidem *tussis*, quae principalem hic ludere scenam videtur, commune multis, ut ipsi catarrho, affectibus, *symptoma, non ipse morbus est*; totiesque oritur (quod in genere monendum hic ducimus), ac stimulus quicumque aut intimus, aut vicinus, aut dissita ex parte veniens, vel in diaphragma, vel in pulmones ipsorumque vesiculas, vel in bronchia, vel in asperam arteriam, vel in laryngem, harumque partium, nervos convertitur. Frequentissima *tussis* causa est membranae tracheae, bronchiorum internae sensilissi.

mae, irritatio. Quam acerba non thoranis universi convulsio ex aquae innocentis guttula, nec oculis quidem molesta, per glottidem delapsa, mox oritur! Atqui cum in pulmonum substantia, vel bronchiorum in cavis, similia contingunt, et a corpore peregrino per tracheam pulmonibus adacto, a calculo hic genito, ab inspiratis longo tempore ac bronchiali cum glutine in unum concretis, diversae indolis, materiis pulverulentis par atmosphaeram volitantibus, — aut a polypis ex lymphatico coagulo in bronchiis, arteriosi ramosique sub vasis fallaci aspectu, formati, — a bronchialium glandularum, folliculorum infarctu. a tuberculis, vomica, scirrhus, — aut ab aere, aquis, cruore, puriformi, purulenta materia in celluloso pulmonum contextu collectis, — a vasculis istius varicosis, aut quasunque ob causas a sanguine praeter modum extensis, — ab irritante vapore cum aere in pulmones attracto, — a materia sudoris, a metastasi, ab exanthemate, impetigine, vel aeri quocunque ad pulmones coniectis, stimulus admovetur; — cum partes pulmonibus vicinae, pleura, mediastinum, pericardium, cor ipsum, vasa majora oeso-

phagus, diaphragma, hepar, ventriculus, lien, inflammatione, tumore quocunque, anevrismatico, steatomatoso, scirrhuso aut ulcere laborant, cum in cavo thoracis fluidum quodcunque colligitur; aut ipse thorax, morbosa ossium structura difformis, luxatione, fractura, carie costarum, vulnere, suis in motibus impeditus est; — cum longinqua nervorum, cum illis pulmonum, tracheae, bronchiorum, affinitate junctorum irritatio, prout de *branchi* origine jam diximus, succedit, — his innumeris in casibus mox tussis, nunc sicca, nunc humida, nunc primaria, nunc secundaria, generatur. In catarrho pulmonum, ea ipsa membranae mucosae, quam descripsimus, affectio, tussis molestias inducit. Post *chronicos* catharrhos, ac post ipsam, quam *pituitosam* vocavimus, pulmonum talem, flacciditas hujus visceris conspicua per sectionis pathologicas detecta fuit. Haec *effectus*, non minus, quam *causa* hujus morbi esse potest; nec certe sola laxitas, nisi stimulus localis, quem ulcus antiquum, impetigo praepostere sanata, fluor albus, haemorrhoides, blennorrhoea, sudor pedum, axillarum, etc. incaute sup-

pressa, non raro suppeditant, accedat, qui stimulus secretionem morbosam hic loci tum augeat, tum quodammodo pervertat, sufficere videtur.

§. 515. Ex illis, quae (§§. 507.—514.) dicta Prognosis. sunt, *prognosis* catarrhi jam satis elucet. *Narium fauciumque catarrhus*, raro, nisi morbi alterius symptoma constituent, aut major inflammatio, suppuratio, accedant, periculum inducunt. Aliquando tamen, post diuturnam ac molestam *coryzam*, ipsius cerebri affecti symptomata sequuntur; nec ita pridem conspeximus virum, cui, a narium catarrho, per duos fere menses protracto, vehementer, obscuritas visus, aurium susurrus, loquelae difficultas, circuli calvariam cingentis sensus, tremor maxillae cum epileptico insultu sat frequente, ac cruris manusque, e latere sinistro, debilitas conspicua, — quin alia instorum causa apparuerit, non sine aquae in cerebri ventriculis collectae metu, successerant. Nata ex causis virulentis *ozoena*, perdifficilis, ac arte saepe major morbus est. Neglectis, aut irritatis a pulvere tabaci, aliisque, narium ulceribus, caro fungosa, nunc mollis, alba, vel rubra, sed expers doloris (*sarcoma narium*),

— nunc livida dolensque, in *cancrum* degenerans, — nunc in longum, ut e naribus vel antè, vel in fauces posterius, pro- pendens, extensa, *polyposam* naturam assumens, nascitur. *Raueitas*, ut morbus, periculum vix affert; ut signum, non raro exitialis observatur. *Catarrhus bronchiorum*, nisi male tractatus, aut in illis, qui tuberculis pulmonum, ac certa in phthisi praedispositione laborant, plerumque sine noxa incedit. Periculosior est ille, quem dyspnoea, calor, et febris comitantur; ac milleni, qui haec flocci penderunt, inflammatione pulmonum correpti, perierunt; aut, tuberculis hoc in viscere relictis, futuras ad phthises praeparati fuerunt. *Catarrhus in longum protractus*, licet febris deesse videatur nihilominus suspectus est, ac transitum pituitosam pulmonum in tabem minatur. Haec ipsa, minora quidem, ac phthisis ulcerosa, discrimina agnoscit; sed facile aut in istam, — aut, sputis dè repente suppressis, in spuriam peripneumoniam convertitur.

Cura.

§. 516. Sine medici auxilio quamplurimi a catarrhis, vel, tempore brevissimo, per largos, spontaneos sudores, — vel, longiorem ac inaequalem post moram, per pitui-

tae densioris, aliquando striis sanguineis remistae, copiosae, ex parte affecta secēsum, — vel denique per blandas diarrhoeas sub fine morbi succedentes, liberantur. Hinc in simplici, nec febre, nec dolore fixo, vel dispnoea stipato catarrho, res ipsi naturae committi, ac illis, quae cutanaeam transpirationem intercipient, aut stimulum localem adaugeant, sollicite evitatis, tenuiori sub victu, potuque tepido, tempus, quo sponte solvatur catarrhus, expectari sine artis quovis alio conamine potest. Sunt adeo. qui, loco potus tepidi, diapnoici, ad frigidae, ipsiusque glaciei ad usum in catarrhis, non certe ob aliam, quam quod saepe haec ipsa transpirationem externam promoveant, ac phlogosin localem, incipientem hinc inde dispellant, cum successu confugerint.

Sed, quotiescunque febris, aut gravius symptomata catarrhum comitatur; habito ad indolem istius, ad morbi causam, ad partem affectam, ad habitum aegroti, et ad anni constitutionem respectu, artis sine mora adhibendae necessitas urget. Rarum est, *coryzam*, tam violentis symptomatis, aut febre conspicua incedere; sed interdum haec uti-

que subintrant; atque inflammationis ac-
nares, ad sinus frontales, maxillares, signa
et abscessus metum futuri manifestant. Hoc
in casu, videndum est, quae febris phlogosis
sin localem comitetur? ac si indolem verò
inflammatorium agnoscat, ad regulas jam tradi-
tas (§§. 46. 62. 71. 95. 112. 120.) — in casu verò
febris *nervosae*, ad principia exposita (§§. 94. —
96.), tractanda est. Vapor aquae, vel solius
vel cum aceto remistae, naribus, nisi peni-
tus obstructis, attractus, — hoc verò in casu
ac in illo phlogosis ad fauces extensae, bal-
neum oris ex lacte tepido, malvae decocto
praeter alia, potissimum conducunt. De-
victa localis inflammationis formidine
morbus sibi ipsi, prout diximus, commit-
tendus est. Si forsitan tenacitas pituitae ex-
cretioni resistat; tunc vaporis, aut mannae
in aqua solutae, per nares attractio hanc ip-
sam sollicitat, *Sternutatoria* aliquando hic
opem prastiterunt, — sed ob incertam ac
facile justo majorem actionem, non satis ar-
rident, medicamina,

Jam facto ad nares internas, vel ad sinus
frontales, maxillares, abscessu, hic ipse, ne
ossa subjecta corrodat, quam prompte fieri
id potest, chirurgiae ad leges, pure conten-

to liberandus, vel materia purulenta, ichorosa sinu frontali, maxillari inclusa, educenda est. Perfectio sinus frontalis mature, et caute suscepta, ratione et experientia fundatur. Pus, in antro maxillari detentum, nunc dente malori, qui hunc ipsum attingat, uno vel altero, in primis carie praesente, extracto et sectis, quae antrum investiunt, membranis, forsitan adhuc integris, — nunc, vel ad alveorum radicem, vel ipsas ad genas, vel palati ad fornicem, loco scilicet maxillae magis prominente, inciso, educitur. Ossis maxillae cum dentibus tribus a carie affectae portionem sat magnam separari curvimus; quo facto, aegroti liquores assumptos ex ore in antrum, et ex isto per nares cum impetu projicere per jocum solebat, et tantem hoc a vitio perfecte convaluit. Sed ostium, quod ex antro ad nasi cavum, in sanis, patet; frequenter a praesente inflammatione obturatur; nec facile, ut aliqui proponunt, injectio ipsas per nares haec in antra apud omnes perficitur. Quo loco sinus maxillaris morbose cum oris cavo communicat; eo, ne ciborum, sub esu, portio penetret; cavendum est. Si ulcus cum carie, vel carne fungosa, hoc in secessu

nascatur; haec artis chirurgicae auxillo curentur oportet. Quae, ex causis virulentis ipsis in naribus *ozoena* se prodit: ea quanto magis internis, virulentiae specificè oppositis impugnanda, et simul externis remediis sollicitè tractanda est. Inter ista, mercurii corrosivi diluta solutio, ac tandem suffragigia, potissimam hic laudem merentur.

Ad *branchum catarrhalem* quod spectat, is eâdem, ac *cynanché* hujus indolis, ratione (§. 178.) percurandus, — ac si forte *phlogosis* intensior accedat; ut mitior *cynanche laryngea* (§. 179.) tractandus est. Vapores aquosi hic iterum egregie conducunt, et collectam ad laryngem pituitam resolvunt, rejectionem faciunt. Quas olim syrupo de *Erysimo* virtutes in raucedine tribuerunt, — hae non alio, quam coetera, quae fauces lubrefaciunt, obducunt, et ab acri sero quodam modo defendunt, fundamento nituntur. Linimentum volatile cum tinctura cantharidum (N. LXII.), laryngis regioni illitum — aut vesicans emplastrum huic ipsi impositum, in casu latentis rheumaticae, aut alterius acridinis, conveniunt.

In *catarrho bronchiali*, ut in coeteris speciebus, — sed, ob majorem pulmonum nobili-

bilitatem, scrupulosius, jam traditis generalibus praeceptis inhaerendum est. Humanitati non parum exitiosa fuit vulgaris, ac si venaesectio in catarrho ubique noceret, opinio. Haec quidem in casu febris catarrhum comitantis *nervosae*, aut *gastricae*, experientia plerumque fundata est; ac si vires deesse videantur; aut laxitas pulmonum, habitualis causam catarrhi constituat; subministrata venaesectio catarrhum; dyspnoeam augere, vel ad pulmonis tubercula aegrotum disponere valebit; sed frequentius, in juniore praesertim floridaque aetate, inflammatoria catarrhi febrilis est indoles; et ommissa cruoris, fortiori sub malo, detractio, aut calefaciens adhibita methodus aegrotantes in peripneumoniam, haemoptisin, aut et phthisin praecipitant. Vix interim tanta hic urget, ac alibi, sanguinis copiosius emittendi necessitas; nec facile *catarrhus*, ut vera pulmonum inflammatio, per solam superatur lanceolam; sed certe, naturae vires, certumque tempus, ut in *narium*, — sic *bronchiorum* in catarrho, requiruntur: sub quibus stagnans in folliculis mucosis pituita, mobilitatem, expelli ut pos sit, adipscici, vel stimulus a

pectore revelli, ac impetus humorum a pulmouibus in cutem derivari, aut forsitan illud ipsum, quod pulmones irritabat, per cutem, sub aequali, blandoque sudore, separari queat.

Quidquod non raro, leviori ac recente sub malo, vel et in ipso *catarrho epidemico* diaphoresis, pes haustum salinum pulveremque *Doweri*, aut refractas tartari emetici doses, per potus tepidos ex floribus sambuci et ex malva, vel thapso verbasco, vel hordeo paratos, promota, — aut vapor aquae per fistulam ad pulmones aliquoties in die attractus, ad bronchiorum catarrhum sufficient! Vel et frigida epota apud alios suffecit, ac sua, per stomachum, pulmonum, aut cutis in nervos actione stimulum a bronchiis abegit, mutavit, ac breviori temporis intervalló, contradicente acholarum theoria, catarrhum dissipavit.

Sed maximas hoc in morbo laudes remediis, quae *bechica*, *pectoralia* dixerunt, tribuendas esse crediderunt, qui specificam his ipsis in pulmones virtutem adscribere nequidquam dubitaverant. Haec inter medicamina, tum illa, quae blanda

mucilagine instructa sunt, ac similis farinae syrupi, vel et pinguia, oleosa, — tum contraria his ipsis stimulantia, ex squilla marina, oxymelle inprimis squillitico, ex gnmmi - ferulaceis, gummi ammoniaco, ex hermete minerali, aliisque, numerata fuerunt. Haec iterum Theoria, neglecto casuum, sub quibus haec profuisse videbantur, accuratiore examine, quamplurimis damnosa evasit: et cum a pinguibus oleosis persaepe ventriculus apud illos laederetur; apud istos, praetente jam phlogosi, ex novo stimulo admoto, non aliter, ac de ipsa peripneumonia monuimus (§. 198.), inflammatio membranae mucosae bronchiorum non parum augebatur. Saepe istius, a membranae, quae fauces obducit, affectione descendit, et a dulci mucilagine vel oleo sedatur irritatio; — vel quae nauseam, ut squilla, kermes, emetica inducunt, per consensum ventriculi vel pectoris in nervos, vel in cutem operantur; non virtute specifica pectoris pituitam incidunt, resolvunt; sed saepe ob stimulum, quem, nimium jam, augent, puriformis copiam liquoris in bronchiis augere, et expectorationem snpprimere cernuntur.

Varia hinc et hoc in catarrho medendi, atque nunc debilitans, nunc excitans, pro fabris, causarum, aegroti habitu, diversa est ratio. Vomitorium interdum, sub certa inflammationis verae in Bronchiis absentia, sub morbi cum saburris complicatione, sub pituitae collectae copia, tenacitate, vel debilitate, quam ut expelli haec posset, majori, sub tussi habituali, ac sub ipsa pulmonum tabe pituitosa, egregie conducet; sed tutior plerumque, in catarrho acuto, praemissis, quae ob febrem, aut ob localem affectionem requiruntur, auxillis, est haustus salini cum refractis tartari emetici, aut vini antimoniati dosibus, usus; nec raro tussis nocturnae cum fructu per opium sopitur ferocia.

Sub *tussi diuturna*, quae senes, laxosque homines divexat, antimonialia non minus, quam polygalae infusum amarae, gummi ammoniacum aceto squillitico solutum, — si acre herpeticum, vel aliud subesse videatur; vesicans, vel ulcus artificiale, potissimum conducunt. Similia in *tabe pituitosa pulmonum*, sed simul roborantia ex cortice parata, victusque nutriens, equitatio, itinera maritima, vel sub coelo se-

reno ac altioribus in locis instituta, — interdum, ut diximus, emeticum fumigationes aromaticae, indicantur. Si *periodica* catarrhi natura, aliaque, eundem ad *intermittentium* familiam spectare docuerint; ex cortice, ut in istis, porrecto, medela est.

O R D. II. G E N. II.

MEDORRHOEA.

Transitis. §. 517. Consideratis membranae mucosae, vias aeri hauriendo dicatas obducentis *catarrhosis* affectibus (§§. 504. 512.), ad eos, qui non absimili mechanismo, pudendorum mucosa intimaque velamina frequenterprehendunt, et *Medorrhoeae*, seu *fluxus pudendorum*, generali sub nomine compellari merentur, descendimus.

Definitio. §. 518. Est vero *Medorrhoea*, vel seri, muci, vel puriformis praesertim, sanguinolentae interdum, materiae, ex verendis morbosa, et cum variis, vel ex phlogosi praesente, vel ex partis impedimento, vel ex humoris jactura, vel ex lege consensus oriundis symptomatis incedens, distillatio.

Var. spec. §. 519. Varias profluviorum hoc genus (§. 517.), et quas scholae passim aliuc, diverso sub nomine, demandant, species agnoscit. Vel enim sexus *virilis*, nunc ex glan-

de, ejusdem viciniis, nunc ex ano, mucum, puriformem humorum, praeter ordinem naturae, eructat; — vel sexus *sequior*, nunc dictis ex viis et illi communibus, nunc ex sinu, labiis genitalium, nunc ex vagina, nunc ex utero, pituitosum liquorem foede profundit; — vel haec ipsa, ex causis diversis (§. 532.) propullulans, aegritudo, nunc celeri, nunc lento decursu absolvitur; atque ob istas, accidentales certe magis, quam ob constantes validasque rationes, ut mala inter se distincta spectari, atque nunc *gonorrhoeae*, *blenorhoeae*, vel *acutae*, vel *chronicae*, nunc *fluoris albi*, *leucorrhoeae* nunc *haemorrhoidum albarum* denominatione, aut falsa, aut morbi sedem, materiae excretae indolem, haud satis experiente, venire solebant. Ut rectius in hisce procedamus, hunc morbum distinguemus, ratione loci, ex quo scaturit, in *internam*, scilicet urethrae, vaginae, ac recti intestini, — in *externam*, ut puta, glandis apud viros, — apud foeminas, labiorum, aut sinus vulvae, — ratione causae, in *primariam*, *mechanicam*, *phlogisticam* *atonicam*, *contagiosam*, — in *secundariam*, *metastaticam*, *criticam*, *verminosam*, *gastricam*, *calculosam*, — in *simplicem*, et in *complica-*

tam, — in *acutam* denique, seu brevioris potius intervalli, — et in *chronicam*, *habitua-lem* medorrhoeam.

Symptoma-
mata.

§. 520. Hae, unius ejusdemque morbi differentiae, illam symptomatum inducunt, ac fere protinus *localem*, — nunc magis extensam, ac febrilem interdum, symptomaticam scilicet, affectionem constituunt, Ea nempe, quae urethram, quae cavum uteri, vaginam, sinum muliebrem, anum, investit, dives nervis, vasculis, ac folliculis mucosis membrana, glandulae quae prostatam constituunt, quae penis ad coronam, ad vulvae labia, subtili velamento contectae, jacent, a stimulo quocunque affectae, non aliter, ac similis ad nares, fauces, laryngem, tracheam, bronchia haerens membrana, irritantur, ac in phlogosin, *erysipelaceae* plerumque *phlegmonosae* interdum, naturae, rapiuntur, Sed juvat potiora ex istis, quo scilicet ordine incedant, possibili brevitate exponere.

Medorrh.
urethrae.

§. 521, Ac primo quidem de *urethrae*, utriusque sexui communis, apud viros longioris magisque incurvae, apud foeminas amplioris, brevioris, nec recto intestino, ut in illis, sed vaginae appositae, *blennorrhoea*, seu

fluxu mucoso (*Medorrhoea urethrali acuta*, seu brevi) sermonem faciemus. Apud *foeminas*, medorrhoeae haec species *urethralis*, per *consensum* fere magis, quam ob propriam urethrae hoc in sexu phlogosin, oriri videtur.

Hic morbus, eo quod frequentius ab impuro concubitu, quam aliis ex causis (§. 533.), oriatur, a scholis plerumque sub eodem, ac ipsa *syphilis*, tractatu exponi, et a plurimis cum eadem, sine tanto, ut credimus, experientiae fundamento, et a multis cum certo aegrotantium discrimine, confundi consuevit. Si quis interim consideret, *medorrhoeam urethralem* quocunque ex stimulo huic fistulae illato originem agnoscere, admissa virūs syphilitici in illa producenda potestate, fatebitur is, hanc urethrae affectionem multarum causarum effectum esse. Nec minus Veteres, qui, liquidum, hoc in morbo per urethram distillans, pro *semine corrupto* declarantes, hunc ipsum *gonorrhoeam* dixere, aut epitheto *virulentae* superaddito, ab illa, quae benigna sit, distinguere, voluere, veritatis a tramite aberrarunt.

Eadem hoc in morbo, quam in *coryza* (508.), — sed ad ambitum in viris certe, minorem, et ob maiorem urethrae sensibilita-

tem, angustiam, positionem diversam, ob necessarium urinae per istam decursum, fortiora plerumque symptomata, pro sexus, causarum, constitutionis, diuturnitatis differentia, diversa, et certa per stadia non inepte dividenda, se offerunt.

Stad. invas.

Ac primo quidem, vel stimulo mechanico, locali, vel delata, alia ex parte, ad urethram irritante materia, vel contagio, mulieris infectae ex sinu, nunc paucas ante horas, — frequentius tres, quatuorve post dies, — nunc post hebdomatem, — rarissime, si unquam, multo tardius, suscepto, nascitur, hoc ultimo in casu, ad partem urethrae anteriorem atque infinam, — in alio, ad aliam, pruritus, titillatio, genitalium coeterorum inguinumque consensus, ac fere major in venerem infaustam proclivitat. Succedit citius, tardiusve tensionis, caloris, ardoris primum moderati, ac urinae, licet paucae, ad sui excretionem frequentius stimulantis sensatio. In viris, membri spontaneae, nocturnae inprimis, et ingratae erectiones, cum aliquo labiorum urethrae rubore, tumore, pruritu super glande extenso, — in foeminis. urethrae vaginaeque extremas ad eos, ad lacu-

nas mucosas, phlogosis, per labiorum vulvae superficiem et commissuram extensa, — in utrisque, post urinam expulsam, ardores majores novaeque mictionis necessitae, sequuntur. Hoc sub statu, secunda tertiae die, ex urethra plerumque humoris mucosi, puriformis, albescentis, guttulae modo paucae, copia, tenuitate et acredine, quo major est irritatio, plerumque augendae, ac lintea flaviusculo colore tincturae, distillant.

In quibusdam, vix aliquid, praeter unicam puriformis materiae guttulam, in ore urethrae haerentem, comparet; ac leviori sub causa, malum, hoc solo jam stadio contentum, post paucos modo dies absolvitur. In aliis, non multis, majori scilicet morbi sub impetu, nec primo, nec alio in stadio secretion in urethra augetur; sed in sola istius inflammatione, eaque, ob majorem violentiam, *sicca*, aegrotudo consistit.

Ardore sub mingendo, ac nixu in expellenda, vel pauca urina crescentibus, *stadium secundum*, tertiam plerumque, vel quartam ad diem, orditur. Sub illis scilicet symptomatis, continuo adauctis, os urethrae magis magisque rubet, rigetque; dolor saepe

Stad. infl.

per omnem urethrae longitudinem, ad perineum, extenditur, ab attactu, anteriori inprimis parte, *navicularem* ad *fossam*, incrementum. Glans penis, aut foeminei labra sinuata, que pudendi rubent, lucentque; penis ipsa tumescit, ac vel minime erectus, volumine augetur, aut plurimum retrahitur; cava urethrae angustatur, nec lotium, nunc magis tinctum, aequali, indiviso, recto pleneque rivo effluere sinit; erectiones frequentes, dolentes, inprimis ad noctem, dorsaque decumbentibus succedunt: sub quibus, urinae excretio ad parturientis quasi mulieris nixus ac tormenta aegrotum cogit. Pollutionis, sub his membris virilitensionibus violentis, spasmodicis, sub somno contingunt; aut a vigili, voluptatibus expertes et miseriae aucturae, subintendantur. Jam vero major humoris puriformis quantitas per urethram continuatur, sed praecipue matutinas ad horas, profunditur: qui humor flavas potissimum, atque subvirides, pertinaces in linteis maculas relinquit; ac saepe cum sanguine per strias, aut intime remistus, secedit, aliquando totum per morbum humor effluens colorem album retinere observatur.

Quo major phlogosis, et, quae hoc mali sub impetu accedit, febris est, eo tenuior, magisque saniosus, foetens, atque acer, ut partes vicinas, quas alluit, erodat, exulceret, liquor distillat.

Inflammatione majorem ad gradum adtincta, et magis magisque expansa: hic fluxus, inprimis apud viros, a frigore admisso potentissimum, vel adstringentium injectionum ab usu, a nova venere, masturbatione, exercitio violento, a potu spirituosus, *suspensio* fitur. Mox ardor ac dolor sub mingendo insigniter increscit; universa nunc urethra tenditur, riget: penis ipse inflammatur, calet, tum escit, ac duritiem assumit; erectiones virgae frequentes, priapismus, cum doloris lancinantis ac urethram perfodientis sensu, ad fraenulum inprimis directo, subintrant. His, *testiculi* unius, utriusque tumor inflammatorius (§. 524.), aut *bubo* inguinalis (§. 323.), interdum *ophthalmitis* (§. 50.), — ad anum, tenesmus, accedunt. Continuus, ad *siccam* nunc urethram, minuerendi stimulus urget, nec fere gutta exprimitur lotii, repleta ex pelvi assurgit vesica, lumborum dolor, nausea, vomiturius, vomitus, anxietas, jactatio, pressio,

Suspensio
fluxus.

tensio, summusque dolor perinaei sequuntur; ac, nisi promptius feratur auxilium cum abscessus, paralysis vesicalis, gangraenae, vitaeque instanti periculo, excretio urinae in totum supprimatur. Interdum plures, per urethrae longitudinem, glandulae lymphaticae tument, et dolent: quae forsitan suppuratae, ac in illam apertae, totum impuros, ac patulos urinae abscessulos fistulasque scroti, perinaei, constituunt. Haec *inflammatoria medorrhoeae urethralis* periodus, tam vehementia, quam diuturnitate symptomatum, pro causae sensibilitatis, habitusque universi ratione diversa nunc brevior mitiorque est; nunc, si contagium praecesserit; plerumque ad octo decemve dies extenditur; longiorum, supervivendi, medendi ratione perversa, in mortem protrahenda. Sed alia his cruciatibus persaepe junguntur, quae describi hic magis, quam alibi, merentur.

Chorda.

§. 522. Quodsi scilicet una magis ab urethra parte inflammatio, sat profunda, praedominet, ac sub ista, ut solet (§. 125.), humor puriformis in ambientem lateris illius cellulosa transudet, — aut glandula lymphatica, folliculus mucosus ad conspicuam

magnitudinem turgeant; aut spatia cellulosa, recipiendo sub erectionibus sanguini dicata, ex praegressa inflammatione, deleta, vel quamcunque ob causam ex parte destructa sint; oportet, ut penis erectus, quo loco corpora cavernosa a vicino tumore compressa, vel ipsamet ab inflammatione correpta, vel ob cellularum concretionem, deleta, turgere minus possunt, a solita rectitudine declinans, in latus illud (*chordam* dixerunt) vel brevi, vel *chronico* affectu, *curvetur*. Ad inferiora vero penis, quo loco urethram corpus spongiosum amplectitur, potissimum deflectit. Est interim in iisdem subinde aegrotis inconstans veretri, licet aequae erecti, incurvatio: quod non minus, ac ipsa medendi ratio, (§. 537.), ac demum ipse tumoris sub penis *curvatura* defectus, *spasmi* praesentiam saepe multum hoc ad phoenomenon contribuere docet. Rarum est, nec visum nobis, quod ligamento penis suspensorio ab inflammatione correpto, ad pubem retrahatur hic idem. Interdum sub violenta penis incurvi erectione, sanguis, quod *stimatedosin* vocamus, cum impetu, ac plures, ut novimus, ad libras, ex urethra prorumpit: quo facto, symptomata inflam-

mationis in quibusdam sedantur. Sed in quavis fortiore medorrhoea urethrali sanguis, ut monuimus (§. 521.), facile cum muco, quin igitur conspicua vasorum laesio ubique praecesserit, excernitur.

Bubo. §. 523. In aliis, sub ipso morbi impetu, glandulas inguinales a tumore cum phlogosi, tensione, dolore, ac certo in suppurationem nisu prehendi, seu *bubonem* (§. 83.), cujus varia est indoles, contrahi videmus. Triplici verum modo, causa morbi vel ipsas ad glandulas deducta, — vel alibi, vasorum lymphaticorum ad oras, vel denique ad nervos genitalium, haerente, *bubo*, *idiopathicus* illinc, hic vero *symptomaticus*, nascitur. Uterque ex istis, variam, aut pro materiae absorptae, aut pro stimuli longinqui differentia, naturam agnoscit. *Symptomaticus* vix non ubique est bubo medorrhoeam urethralem, simplicem, aut vix nascentem, aut vigentem concomitans; et sicut vulnus, emplastrum vesicans, vel sola adeo punctura, parti sensibiliore, et ex qua glandulae lymphaticae vascula sui generis suscipiunt, ad longas etiam distantias, illata, jam saepe buboni in illis generando sufficiunt: ita et quavis ad urethram irritatio,
vel

vel solus ab acri, cujuscunque demum sit indolis, eidem introducto, contactus, vel simplex inflammatio, quin haec ipsas ad glandulas penetraverint, bubonem producere queunt. Producent vero *superiorem*, quam vasa genitalium lymphatica ascendant, glandularum inguinalium ad *seriem*; cum stimuli ex crure affecto venientes, si (non rara coeterum) utramque inter *seriem* vasorum communicatio lymphaticorum defuerit, *inferiores* potissimum ad glandulas tumorem promoveant.

Quamcunque vero causam in medorrhoea urethrali bubo agnoscat, nisi ulcus syphiliticae naturae se simul manifestet; incerta est tumoris, utrum idiopathicus, symptomaticusne dicendus sit, diagnosis; ac utraque in specie dubia est, a morbi initio, tum illius, quae resorpta sit, — tum ejus, quae simplici contactu stimulet, materiae natura. Nec etenim semper, qui *symp- tomatice* extollitur, bubo, aut mitior est, aut facilius dissipatur, et suppurationem effugit; nec tumor *idiopathicus*, aut crescit celarius, aut resolvi omnis recusat; nec denique minus *alia*, quam scilicet vasa lymphatica susceperunt, et inguinales ad glandu-

las duxerunt, materia, ac *virus ipsum venereum*, bubonem hic loci producere potest.

In una, alterave glandula, praevia plerumque stimuli in genitalibus sensatione, bubo inguinalis comparet. Tensionem, et quasi chordam ex illis ad inquina tensam aegroti accusant; et in glandula affecta, calor, tensio, tumor durus, dolor, ab attactu sensibilior, occurrunt. Si plures simul glandulae affectae sint, tumor inaequalis insurgit; sed una ex illis, coeteris incremento celeriori praecedat. Hoc facto, cutis colore mutatur, rubet, calet ac tenditur ipsa. Varium sic bubo volumen acquirit, et ab ovi, ad pugni magnitudinem, motum corporis gressusve protinus impediens, ascendit. In multis, febris sat intensa his phoenomenis accedit; in aliis, pauca inflammatio dolorque paucus se produnt; cutis pallescit, ac oedematosi tumoris naturam bubo assumit. Hinc varius istius, ac pro causae violentia, pro subjecti, medelae ratione, diversus est exitus. Pars plurima bubonum, quod pridem, ob falsam hypothesin, timuerunt, felici cum eventu, *resolvitur*; alii ex istis, in *abscessus*, non raro perquam taediosos, mutantur, *scirrhosam* aliqui duri-

tiem, caloris sensusque expertes, assumunt; paucissimi *gangraenam* subire cernuntur.

Ne vero bubo cum *hernia* inguinali confundatur, curandum est. Distinguitur ab ista, quod magis durus dolensque sit; quod loco profundiori haereat, magisque mobilis ab initio esse soleat bubo; quod lentius plerumque, ac *hernia*, et ex causis diversis, oriatur; quod cutis ruborem mox contrahat doleatque; quod *herniae* symptomata deficient. Non facile cum *scrophulis* bubonem aliquis confundet, si latius illas, quam istum, extendi, si lentiori origine, vel ab ipsa infantia, nasci, si doloris plerumque expertes, nec tantae inflammationis, quam bubo, capaces esse cogitaverit. Utriusque complicatio mali, per attentum in ea, quae bubonem praecesserint, vel quae eundem comitentur, animus eruitur.

§. 524. Frequens medorrhoeae urethralis, symptoma *Epididymitis* est: quod nomen morbo, quem inepto *herniae humoralis, testiculi venerei, gonorrhoeae in scrotum delapsae*, sub titulo hucusque novimus, melius convenire videtur. Non modo scilicet cum liquoris puriformis ex urethra excretio, quam

Epididym.

cunque per causam, supprimitur; sed et medio, — quidquod aucto sub effluxu, et, ut vidimus, sub dubio adhucdum istius principio, vel et sponte cessante blennorrhoea, tumor mollis et quasi pulposus prope ipsum, ut fere duplex videatur, testiculum, comparet. Dolor ventris, lumborum, coxarum, nausea, ructus, interdum vomitus borborygmi, diarrhoeae, nonnunquam praecedunt; pondus ad testem sentitur; ac aliquis sub ingressu, vel attactu dolor se prodit. Post diem unum alterumve, hic tumor dolorque increscunt. Plerumque vero *epididymidis* portio inferior, vel et *tunica vaginalis*, non ipse testiculus, tumoris sedem constituit; ac in molem illa convexam, tamque amulam, ut testem vix non omnem, manifeste molliorem, circumdet, extenditur. Nunc dolor, inprimis ad noctem, augmentum capit; ac tumor ipse, jam durior, per totam epididymidem, per vasis deferentis, ac funiculi spermatici portionem, sub figura ovali, pyriformi, ascendit, ac pugni virilis magnitudinem non raro acquirit. Hoc rerum sub statu, vel ipsi testiculo. vel tunicae vaginali, ipsique scroto, inflammatio communicatur subinde; vidi-

musque, ex ista, paucarum intervallo dierum, *hydropem tunicae vaginalis acutum* atque conspicuum, venisse. Interrea et ipsum *vas deferens* turget, ac tensum quasi refert funiculum, et venae spermaticae sanguine ultra modum distentae, et quasi varicosae, tumorem adaugent, et abdominalem ad annulum, forte ex spasmo constrictum, *strangulationis periculum*, sub ventris dolore, meteorismo, vomitu, singultu, minantur. Quicumque nunc motus, aut corpore erecto ingressus, praee dolore, per nervos spermaticos ad renum regionem extenso, impeditur. Nec tamen febris ubique hic urget, sed panca est in multis; nisi major hanc sensibilitas et plethorica excita verint constitutio: quo sub statu, et nausea, et dolores ad coxas, et tormina, ex lege consensus oriuntur. Plerumque hic tumor inflammatorius, qui ipse irritationis, phlogosis ad urethram graegressae, aut praesentis, *symptoma* est, post unam alteramve hebdomadem *discutitur*, ac rara est illius, modo recte tractati, *suppuratio*. Rarissima hic loci, ac forsitan ex dicta funiculi spermatici abdominalis ad annulum strangulatione repetenda, *gangraena* est. Frequentior epididy-

midis, a morbo superato, *durities*; interdum cartilaginea, et fere ossea, occurrit: quae interim, nisi major sit, et a causa irritante, in molem fungosam excrescat, aut forsitan in plenum periculo carcinoma mutetur; per multos saepe annos, suspensorio suffulta sine tento salutis, vel ipsius fertilitatis, detrimento perfertur. Hoc rerum sub statu, aliquando *hydrocele* tumori testis accedit. Interdum ex uno ad alterum testiculum quasi transilit inflammatio; interdum omnis, restituto muci per urethram, suppresso forsitan, effluxu, disparet.

Phimosis.

§. 525. Praeputii, penis *ante coronam* ut reduci super istam non possit, morbosa strictura, *phimosis* vocatur. Haec interdum pueris *congenita* est; ac facilem urinae excretionem apud istos, — in viris, penis erectionem completam impedit. Sed *accidentalis*, multiplices ob causas, inducitur *phimosis*: ubi vel praeputii, glandem coosperientis, extremum ad limbum, diameter imminuitur; vel coles ipse molem hac sua vagina majorem acquirit. Rarius hoc ultimum, nisi ob natas forte tardius in glande inflammationem, excrescentias, verrucas, — frequentius primum, ob oedema, phlogosin

erysipelaceam, ulcera, callum, frenuli laesionem, contingit. Ex praegressis variolis, et abscessulo existis, praeputii ad limbum relicto, phimosin conspeximus. Scilicet ob laxam internae praeputii membranae, telaeque cellulosaе, qua haec cum externa connectitur, naturam non minus, ac ob declivem et pendulam hujus veli positionem, facilis est serosi, lymphatici puriformis humoris, — quin, ipsius urinae, ex urethra, per ulcera laceratâ, ab anasarca, vel a phlogosi praegressa, infiltratio. Sub ista, praeputium stringitur, tumet, pallescit, interdum vesiculis seu *bullis cristallinis*, superiorem ad marginem, obsidetur, ac viam lotio, vel et mucosae saniei, alluentibus, aucto abhinc stimulo, praeccludit. Hinc frequens apud illos, quibus longum et angustum est praeputium, ad phimosin, tam sub urethrae, glandis medorrhoea, quam si ulcera venerea, alia, hic loci lateant, occasio habetur; ac nisi promptum huic malo feratur auxilium; praeter urinae, saniei, excerni impeditae incommoda, et praeterquod glans ipsa penis erosa, interdum vicina cum praeputii portione concreascit, — per alteram, acri, a sanie collecta, absces-

sus sub forma elevatam, consumptam, vel, quasi glans altera, pro parte, vel tota, penetret, stranguletur, ac junctam cum *paraphimosi* (§. 526.) *phimosin* formare videtur, — a celeri haec tenuis membrana *gangrena* corripitur. Alias in longum satis tempus trahitur, et *chronicam* phimosin indolem assumit.

Paraphim.

§. 526. Contrarium exposito (§. 525.) vitium, cum scilicet praeputium arte penis *retro glandem* contractum, hanc super ipsam abduci nequit, *paraphimosis* vocatur. Haec igitur, ipsa ex *phimosi*, repulso violenter, nec prius laxato, post glandem praeputii annulo, aliquando exorta, communior apud illos est, quibus brevius magisque angustum natura praeputium, ac ampliorem sine velo glandem esse voluit. Interna scilicet potissimum illius membrana subtilior, laxior, sensibilior, quacunque ex causa, irritata, et cum tela cellulosa vicina a phlogosi correpta, intumescit, revolvitur, et a cute externa in unum, vel plures in annulos contracta, cum ipsa glande, quae tumet, livet, vel bullis cristallinis obsidetur, non sine celerrimae *gangraenae*, colem mutilantis, vel adeo lethalis, periculo strangulatur. Interdum, minus vehemens, hoc malum, ob in-

sertas praeputio verrucas, per longum sat-
tis tempus, quasi *chronicum* protrahitur. De
tumoris insignis, alymphæ coagulabili, in-
ter praeputii laminae congesta, producti,
ad capitis infantilis magnitudinem in pa-
rephimosis adaucti, et ab experto chirurgo
feliciter resecti, exemplo nobis constat.

§. 527. Jam alio in loco (§. 150.) *ophthal-* Ophtalmis.
mitidis, quam medorrhoea urethralis violent-
ter suppressa inter omnes *acutissimam*, indu-
cit, mentionem inieçimus. Difficilis hujus,
rari quidem, phœnomeni explicatio est;
ac si genitalium cum oculis consensus, ut
videtur, pro causa debeat admitti; non mi-
nor tamen illorum cum larynge, vel cum
thorace consensus, similem in ista mor-
bum, quod sciamus, non inducit.

§. 528. Haec fere sunt praecipua, quae Stad. relav.
stadium medorrhoeae urethralis inflamma-
torium apud multos circumdant, et ex par-
tium consensu oriuntur, symptomata. Sed,
unde consulto recessimus, ad morbi prin-
cipalis (§. 521.) descriptionem redeamus!

Tantium scilicet sedes malorum, licet
ardor dolorque per totum urethrae decur-
sum se prodant, raro a fossa naviculari ul-
tra pollicem cum dimidio extenditur: quo

loco, ab attactu potissimum, ut a carbone accenso, dolente, rubor erysipelaceus urethrae superficiem, et cryptas mucosas suffundit. Interim frequens prostatae glandulae, post hunc morbum ab aegrotis diutius neglectum, vel aliquoties repetitum, suppuratio, scirrhus, ac pendens ab istis ischuria, — phlogosin non tam raro, ac creditur, ad urethrae posteriora haerere, et ipsius periuae, tensionem, tumorem, dolorem, in aliis symptomata, in vera prostatae ac colli vesicalis, vel seminalium interdum vesicularum inflammatione consistere, nimis confirmant.

Hoc igitur stadium, sub quo major medorrhoeae urethralis discrimina urgent, ac febris interdum valida accenditur, per octo, decem fere dies protrahitur; quo tempore, sub debita cautela, symptomata vel sponte decrescunt; humor effluens magis magisque albescit, tenacitatem majorem assumit; ardor sub urinae, minus tinctae, excretionem, erectiones dolentes gradatim sedantur ac denique cessans; muci copia quotidie imminuitur, ac potissimum densae, albescentis, ponderosae nubeculae sub forma, aut filorum vermicularium pellucidorum

adinstar, fundum urinae petit; nec raro, urethrae extremum ad ostium, in *pseudomembranulas*, hoc in ipsum obturnantes ac momentaneum lotio allidenti obstaculum posituras, coalescit. Tandem unius, aut alterius spatio hebdomadae, singula hujus morbi localis nisi novis erroribus, quod, ob reliquam in urethra irritabilisatem, facile est, — aut ob menstrua, foemine plethoricae, irritabili supervenientia, etc., revocati, ac demum in *chronicam medorrhoeam* (§. 552.) conversi, symptomata disparent.

§. 529. Ex dictis vero symptomatis, alia, sexum modo unum, alia utrumque divexant. Sed licet foeminae, sub mictu, ad urethrae principium, ac omnem posthac per vulvam, non parum doloris accusent; prima tamen, in ea, quae per contagium patiuntur, medorrhoea, irritationis indicia, loco, quo virus proxime pertingit, ad *vaginam* esse, demonstrant succedens, mox ab impuro concubitu, hac in parte titillatio, calor, ac tensio; demonstrant summus vaginae, ab attactu, vel ab admissio viri congressu, dolor; ac demum ipsa interdum oculorum inspectio: qua, mucum, licet omnis ad ostium vaginae declivius *confluere*

Medorrh.
vag. acut.

videatur, ex hoc tamen amplioris superficiei canali potissimum depluere docemur. Hinc major ille sub urina mittenda tenesmus, non minus quam uteri ipsius, ligamentorum, pubis, lumborumque lassitudo, dolor, vel ex solo harum partium cum vagina consensu, — vel in quibusdam a modo congressus, conceptionis ob metum, inconfecti, quo contagium externis magis applicatur, pendeat. Haec igitur *medorrhoea vaginalis*, quoad materiae profluentis colorem ac indolem, cum urethrali (§§. 521. 528.) conspirat; sed longe mitius plerumque foeminas, quam viros, mulctat; licet plura in illis, ad *anum*, ob vaginae viciniam, ob muci acrioris ad istum confluxum, incommoda scaturiant; ac ob spongiosam laxamque vaginae structuram, ob declivem ejusdem positionem, ob novas a menstruis recurrentibus irritationes, frequentior in *chronicum* affectum (§. 532.) mutatio contingat. Exempla, ubi foeminae, medorrhoeam, cujus ipsae symptomata necdum persenserant, viris dederunt, haud pauca habentur.

Medorrh.
ureth.

Medorrh.
Rect. int.

§. 530. Vel sine contagio et quovis a stimulo mechanico, vel alio, inprimis herpe-

ico, rheumatico, *recti* intestini ostio applicato, vel a mucro infecto, sub horizontali decubitu, ex vagina versus anum confluentem (§. 128.), vel haemorrhoidum tumorem, vel scirrhi prostatae, aut alterius tumoris actione, demum ex nefando flagitio, — sub iisdem interdum, ac in ipsa dysenteria symptomatis, ad *anum* medorrhoea comparet, ac mucus puriformis, a pure, quod fistulae abscessus, hic loci non raro argiuntur, diversus, coloris albi, flavescentis, aut viridis, subinde sanguinei, coctiosus, sponte secedit.

§. 531. De muci puriformis ex labiis si-
 que mulierum externo fluxu jam diximus (§. 521.). Sed et viri interdum, licet raro ex glande penis sola, vel loco, istam praeputium intermedio, seu veretri ad collum, vel demum ad internam praeputii superficiem, imprimis sub phimosi (§. 525.), undem copiose, nec dote, ab illo, quem urethra plorat, distinctum, sine ulceris praesentia, cum partis affectae rubore, splendore, ardore, tumore fundunt: quod naturali genus *spuriam* quondam *genorrhoeam* dixerunt. Nullus hoc in casu urethrae ardor, nulla in mittenda urina, ubi simplex, nec

Medorrh.
externa.

ad urethram extensum est malum, difficultas occurrunt; sed tenax albaque materies glandem, aphtharum, ulceris, aut et pseudomembranae sub forma, integram et illaesam obducit; ac, pro causae natura, vel paucas post dies, vel solito medorrhoeis descriptis (§§. 521. 528. 529.) longiori decursu, secedente interdum epidermide, siccatur.

Medorrh.
chronica.

§. 532. Quaecunque vero ex dictis medorrhoeae speciebus (§§. 520. 528. — 530. 531), cessantibus licet irritationis sensibilis indicii ac stadio *relaxationis* (§. 528.) jam aliquot per hebdomadas protracto, nihilominus aut nunquam siccatur, aut ob exiguas rationes repullulat: ea, utroque in sexu non infrequens, in sequiori, frequentior, *habitualis*, vel *chronica* vocatur. Scilicet, quin ad locum, ex quo mucus effluere continuat, sub mictu, vel ardor, vel dolor, — quin in viris, erectio molesta, vel sub humoris genitalis ejaculatione, urentis caloris sensatio in urethra, — quin ad vaginam in foeminis, sub coitu, perceptio ingrata supersint, humor tenax, albi plerumque, — interdum et alterius, coloris, — nunc paucus, matutinas imprimis ad horas, vel tempore, quo nixus

suscipitur, aut stimulus praecessit, — nunc multus, continuo, distillat, ac viscidum sensimque ac redinis et proprii foetoris non expers glutem genitalia inquinat, viresque, sub mucī secedentis excessu, non parum infringit. Atque haec est *secundaria*, quae, utroque in sexu, ex acuta, et ex ea, quae contagium agnoverat, neglecta, vel iterum iterumque redeunte, frequenter procedit, medorrhoea. Glandis, sub ista, *impetiginem*, nisi talen, quam impuritas produxerit, breviorē, non vidimus.

Alterius originis, non verò diversae penitus naturae, est humoris, aspectu mucosi, ex foeminarum genitalibus fluxus diuturnus, *fluor albus*, *leucorrhoea* Auctorum; quod genus profluvii *medorrhoeam foeminariam insontem* vel contagio carentem, vocabimus.

Med. foem.
insons.

Copiosi, utilissimique vapores ac mucī fontes, uteri, tubarum, vaginae cava irrorant. Haec ita contingunt: ne sana in foemina, aut virgo sit, aut mulier, excepto menstruorum, coitus partusque vicini, praesentis, peracti, tempore, indecorus e vagina fluxus sequatur. In humana interim, quae corpore erecto incedit, foemina, frequenter, ex causis adeo non semper tam

magnis, liquidum hic loci, aut copiosius, quam par est, et morbosum secernitur; aut per vasa lymphatica abduci non potest: quo fit, ut humor serosus, mucosus, puriformis, coloris subalbidi, flavescentis, vel ad viridem, subnigrum tendentis, — odoris nauseosi, vel et foetidi, nunc modo paucis, cum menstrua vel instant, vel cessarunt, diebus, vel sub nixu motu corporis fortiori, ciborum, potuum spirituosorum intemperantia, perspiratione suppressa, vel ad horas matutinas, vel incertis, vel periodicis subinde intervallis, — nunc vero continuo, aut paucus, aut plurimus, nunc blandus, nunc acris et vicinas arrodens, distillet. Non absimilis tunc membranae, quae genitalia obducit, status, ob eo narium, gutturis, tracheae, bronchiorum, quem (§. 506.) descripsimus, discendus est; ac saepius verum *vaginae catarrhum*, acutum, chronicumque sistit; — alias ex coryza suppressa nascitur; — vel hanc ipsam, a pudendis aver-
sa, ut exempla docuere, et tusin, et asthma, et tabem pulmonum pituitosam (§. 513.) producit medorrhoea.

Dispositio. Communissimum haec ipsa, urbium inter humidaequae regionis delicatulas, imbelles,

belles, cachecticas, laxique habitus incolas motu corporis privatas, — frequentiore apud juniores puellas, vel illas apud mulieres, quae sepius abortum, aut, aetate teneriori, plures, sibi que vicinos nimis, difficilesque partus, — aut nullos usquam, steriles, expertae sunt, — quae propria crudeles prolibus ubera subducunt, — quae semetipsas masturbant, — quae menstruo fluxu privantur, aut parcum nimis, difficilemque fundunt, aut nimium patiuntur, morbum constituit; sed nulla est aetas, nullusque corporis est habitus, quae medorrhoeae hac specie, ex causis diversis (§. 533.), non interdum laborent; et virgo impubes, matura, et foemina coelebs, et uxor, et vetula inprimis, hoc a fluxu haud raro foedantur. Vel sub ipsa graviditate fluor albus interdum foeminam continuo divexat.

Quo ex fonte profluvium hoc morbosum scaturiat, est quaestio. Ex *utero* venire, negant, qui hujus ad osculum in teneris puellis, in virginibus, in gravidis, clausum respiciunt. Uterum accusant, qui menstruum ex hoc ipso fluxum stillare noscentes, fluoris albi, vel praevii, vel mox a menstruo cessante venientis, vel menstrua supplen-

Sedes.

tis, successionem considerant. Nos certe sinum externum, vaginam prae aliis, non raro et uterum, et tubas istius aliquando, humorem, de quo agimus, largiri, sectione pathologica id ipsum docente, putamus. Virginibus os uteri connivet; praegnantibus humano clauditur ab ovo; sed quoties hae viae patent: toties ex uteri, tubarumque cavo humorem quemvis morbose secretum per loca declivia ferri, ac per vaginam stillari nil impedit. Nisi *uterus* hoc in morbo frequentius ipse laboraret; vix tanta in *abortum* sub isto proclivitas, nec *sterilitas* tam saepe in foeminis hoc profluvio effectis observanda venirent.

Materiae
indoles.

Nec certe, quae hoc sub morbo fluunt, ex pituitae folliculis singula venire, aut sistere *mucum*, credendum est; sed humor *puriformis* (§. 128.) ex omni, qua late patent genitalia, superficie irritata, non aliter, ac de urethra stimulis affecta diximus (§. 521.), secernitur, et cum muco cervicis uterinae vaginaeque excernitur mistus.

Distinctio
morbi.

Hinc difficilis non raro *medorrhoeae inson-*
tis, tum ab illo, quod contagium plerumque ex urethra non minus, quam vagina induxit (§§. 521. 529.), profluvio, tum a pu-

rulento, ex latente in genitalibus mulierum internis, aut vicinas, quae cum istis communicant, ad partes abscessu, vel ulcere, pendente effluxu distinctio; et nec materiae per vaginam defluentis aspectus, nec alia ejusdem, quam sensus discernant, qualitas, nisi ex cauto rerum, quae praecesserunt, ac symptomatum examine lux aliqua affulgeat, ad diagnosin sufficiunt. Difficultatem vix parit *menstruorum decolorum, pallidorum, albidorum*, ex sero vel mucosissimo consistentium, vix sanguine tinctorum, quae virgines interdum ac mulieres chloroticae sub certis *periodis* patiuntur, a fluore albo, qui promiscue ac sine ordine, vel cum inordinatis, aut nimis jam mensibus succedit, distinctio. A puere, vel mucosa materia ex ipsa vesica veniente, medorrhoea per] continuum effluvium, quod ex vesica, a paralyti non affecta, non nisi laxato pseudosphinctere contingit, sat facile distinguitur. A vera *gonorrhoea* (§. 547.) differt medorrhoea, quod seminis fluxu, nisi voluptas, — sensus tamen aliquis comitur, ac major debilitas aequatur. Ad *purulenta* e vagina effluxum quod spectat, hic sese origine, quam praegressa inflamma-

tio, suppuratio ad uterum, vesicam, intestina, peritoneum, exhibuit, ac signis istarum (§. 227. 267. 243. 220.) a *medorrhoea vaginali chronica et insonti* distinguit. Magis ardua, impossibilis interdum, est istius, ab *acuta*, per contagium plerumque inducta, vel ab aegrotis celata, vel quodammodo protracta, vel demum complicata (§. 529.) distinctio. Si fides coitum impurum neganti haberi queat, et cohabitantis mariti sanitas testimonium confirmet; si ardor, dolor, vel urinae difficultas, conspicua, a morbi initio defuerint; si profluvium passu lento, aut brevi tempore, priusquam menstrua prodirent, aut mox ab istis, inceperit; si junioribus puellis, loco sanguinis, serosa, mucosa ex utero materia, sub iisdem, ac solent menstrua, phoenomenis, ac certis modo *periodis*, effluat; si blanda primum ac pauca satis, albidaque materia, sub mitioribus symptomatis, ac sensim sensimque copiosior, sub lumborum, ossis sacri, coxarum dolore, ventriculi languore, effluerit; si laxa corporis conditio, vitaeque inners, aut quae diximus alia, vel quae infra dicemus (533.), praecesserint: tunc profluvii indoles insontis et chronici vix

dubiis obruitur. Augebitur difficultas, si major effluentis liquoris acredo jam adsit, ac, sub debita licet genitalium puritate, haec ipsa tamen, aut illa viri coeuntis arrodant, exulceret, vel medorrhoeam urethralem (§. 521.) ex istis, quae interdum contingunt, inducat. Interim facilior breviorque istorum in viris, quam a contagio suscepti, malorum est cura, ac fidelis symptomatum, quae foeminam a morbi principio, blandiora, tenuerunt, et nunc magis ad lumbos ventriculumque divexant, hic faciem, — nec tamen semper, ne errori sit locus, sat claram, accendit. Fluorem album sub fluxu menstrui cessare, quod menorrhoea ex *contagio* non faciat, sine quovis fundamento, cum humor uterque, cum sanguine mistus, distingui non possit, dixerunt.

Sed ipsa symptomatum, quae medor- Symptomata.
rhoeam chronicam ac insontem foeminarum circumdant, historia, diagnosis certitudinem adauget; ac si forte simplex, sine ulcere *venerea*, medorrhoea neglecta, (§. 529.) illam, quod non raro contingit, induxerit; non magno certe in praxi errore haec causa ignorabitur. In genere *localem* medor-

rhoea aegritudinem, nisi totius debilitas systematis praecesserit, constituit; et quae coetero in corpore sub illa succedunt; huius morbi symptomata, effectum; non vero causam sistunt. Hinc pauca, in sanis coeterum mulieribus, donec major humorum jactura sequatur, ab initio, et per menses, quin annos, totius corporis incommoda se produnt; ac primum, sibi genitalia plus aequo madere, mox vero, quibusdam, ante quam menstrua se prodant, ac postquam cessaverint, diebus, humorem serosum, lintea, ex pallido tingentem ex vagina auferere observant. Sensim sensimque in plurimis, nam in quibusdam derepente hic fluxus sat copiose prorumpit, cum horis matutinis lectum, in quo, supinae, nil ad verterant, deserunt; pituitosum sibi humorem e vagina per crura descendere percipiunt. Hic effluxus interim suspenditur; sed sub alvo cum nixu deposita, sub corporis exercitio, post lautum prandium, redit, atque temporis tractu augetur. Jam primum oculi quasi humidi, aut *vitrei*, et arcu sublivido, plumbeo, utriusque tumor palpebrae aquosus, cum faciei pallore, tumore, comparent. Morositas, pigrities, lassi-

tudo, ac aliquis ventris, dorsi, lumborum dolor per os sacrum extensus, accedunt. Ventriculi tandem functiones labescunt; digestio tarda, difficilis, oppressio, morbus, dum jejunae sunt, ventriculi, ructus et aquae vomitus acidae, sequuntur; interdum alvus adstricta, interdum laxa est; debilitas corporis, genuum impotentia, crurum perfrigeratio quotidie augentur; sub motu corporis et acclivium ascensu, cordis palpitatio, anhelatio, se produnt.

Hoc rerum sub statu, periodicus sanguinis ex utero fluxus consueto ab ordine, plerumque tardior et paucus, interdum, nimius, recedit. Augetur muci hoc tempore, vel et parum a sanguine tingitur, fluxus; incommoda plura, lumborum tensio, dolor obtusus per uterum, laterum mollitudinem, abdomen, pelvim, et crura extensa increscunt. Interea color habitusque materiae mutatur: flavescit, virescit ista; odorem spirat nauseosum; ipse vaginae sensus a spisso, quod hic confluit, glutine obtunditur; fastidium creant maritis uxorum amplexus; quae interim, licet et hoc interdum sub statu concipiant; plerumque tamen, ob systématis vitium uterini, vel ste-

riles redduntur, vel partum immature expellunt. Saepe uterus, aperto, praeter ordinem naturae, osculo, et gravior, profundius descendit, ac interdum prolabitur. Gluten ipsum genitalia inundans ex parte per urinas abstersum, vel turbidas, subalbas, *asinnas* has reddit; vel floccos, aut filis in illis capillares, pellucidos, aut crassam gravemque nubem ad fundum constituit; ex parte, vaginae inter rugas et in profundis lacunis diutius retentum, corrumpitur, acridinem, foetorem contrahit, ac in ichorem conversum, pruritum, voluptuosum interdum, ardorem ac phlogosin internam producit, vaginae superficiem arrodit, ac uterum, vesicam, anum, in consensum trahit. Interdum saniosa, livida, subatra, foetidissimi odoris materia tam copiose prorumpit: ut et gressus impedire, et lectulos altius subterpositos illuvies penetrasse sit visa. Hoc tandem sub statu, pallor subflavus corporis, debilitatis, nervosi systematis affecti symptomata, anxietas, tristitia, cephalaea, anorexia, increscunt; accedunt febricula lenta, cum pulsu parvo, duro, inaequali, frequente, macies cum tussi arida, quam breves per intervalla thoracis dolores, ac

nocturni sudores pessundant; vel pedes primum, mox vero crura, corpus univ-
sum, hydropico tumore inflantur; uteri
interdum haemorrhagia jungitur; ac sin-
gula tristem morbi perlongi eventum prae-
nunciant.

§. 533. Sub diversarum medorrhoeae Causae.
specierum historia, causarum simul potio-
rum mentionem injecimus. Quae vero ex
istis referendae supersunt, aut, ad melio-
rem morbi intellectum, uno quasi agmine
disponi merentur, has adduci nunc interest.

Medorrhoeae acutae *urethrales* (§. 521.), Med. acut.
vaginalis (§. 529.), *recti intestini* (§. 530.), *exter-
nae* (§. 531.), causam, in quovis stimulo, me-
chanico, vel alio, has in partes agente, quae-
sivimus. Quae vero causae hunc ipsum in-
ducunt; has, tum ipso *in corpore*, — atque
tunc, mox ipsam ad partem, quae aegrotat,
mox alibi, generari, atque hic, vel ad illam
deponi, vel lege consensus, vel partium
mechanismi, in eandem operari, — tum
corpori, vel parti, quam offendunt, ab *extus*
inferri, — tum *ambobus* his modus oriri, di-
cendum est. In dictis hinc partibus, ut in
aliis, communibus ex causis, phlogosis ac-
cendi, et ad humoris mucoso puriformis

secretionem porrigi occasio potest. Frequentius, ut nos ipsi non semel observavimus, rheumatica materia, aliunde in urethram profecta, medorrhoeam induxit. Similes de podagrico, seu arthritico, aliove ab acri observationes in fastis medicis occurrunt. Ex sola gingiva, ob dentem eruptioni vicinum, dolente, ut in aliis frequenter diarrhoeam, — sic pluries, eodem in homine, medorrhoeam urethralem exortam esse legimus. Ex fortiori, per catarticum, stomachi, intestinorum stimulo, praesens medorrhoea augetur. Ex recto intestino a phlogosi, haemorrhoidalem vel aliam ob causam correpto, ad urethram medorrhoea nonnunquam comparet. Ex fluxu vaginali, perinaeum ac anum infestante, hic ipse ad similem secretionem stimulatur. Ex vicino urethrae, vaginae, recto intestino, tumore, vel ex prostatae induratae, ex polypi, aut scirrhi uterini, aut abdominalis ex visceris morborum has in partes pressione, medorrhoea haud raro scaturivit. Ex cereolo, canali urethrali, — expressario vaginae diutius immissis, a cerevisiae, vini, recentium, nec fermentatorum potu, ex materia acriori, pudendis injecta, ex con-

cubitu cum foemina, fluore albo acriore laborante, leprosa, vel summopere impura, frequenter medorrhoeae originem desumit. Sub alterius stimulantis materiae, in parte corporis quadam praesentia, admotus urethrae, vaginae cujuscunque naturae stimulus, latitantem alibi fomitem has ipsas ad partes invitat, accendit, et medorrhoea *complicata* inducitur.

Nec certe, ut ista sequantur, *ulcus* in urethra requiritur: nec in ipsa, quam contagium ex concubitu impuro excitaverat, medorrhoea, pathologicae sectionis testimonio, nisi raris, et complicatis, ut videtur, in casibus, *ulcus*, aut reliqua ex isto *cicatrix* detecta fuerunt. Praeterea nec *ulcus*, primis jam morbi diebus, cum vix incipit phlogosis, adesse, — nec, superficiale et parvum, mox tantam puriformis copiam materiae largiri, — nectam celeriter, ac solet, medorrhoeam repelli posse, supponi prudenter protest. Vel ipsa tandem partium coeterarum, narium, oculorum, anique, puriformem materiam striasque sanguinis, sub acuto, dolore, sine ulcere, fundentium copiosa exempla, et nudus genitalium, in mulieribus medorrhoea laborantibus, as-

Anex ul-
cere.

pectus, pristinam, quae ulcus in simplici communique medorrhoea, supponit, theoriam falsitatis convincunt.

Praesentis aliquando, ad urethrae canalem, *ulceris*, facile *venerei*, signa indicare sat certa vix possumus. Si violenta, ac diuturna ad urethram inflammatio, cum perversa vivendi, medendi methodo, praecesserit; si, cessante jam illa, modo pauca, interdum vero nulla, sub insigni ardore, dolore, sub attactu, loci semper ejusdem, materia effluat; si cereolus tenuior, canali immissus, cruciatus quamplurimum exasperet; si effluens materia non intime cum sanguine, sed cum striis cruentis remista, secedat; si longum per tempus haec symptomata, consuetis remediis resistant; tunc utique justa satis dubia de urethrae integritate nos premunt. Interim ardentissimum, et constantem uno eodemque in loco, ac simul a quovis attactu violenter adauctum, cum nullo effluxu, urethrae, a concubitu suspecto, dolorem, sine lue insecuta, observavimus.

An venerea.

Communissimam vero causam medorrhoeae (§§. 521. 529. 531.) sexus unius cum altero, ex simili contagio genitalibus infecto, congressus constituis. Hujus contagii

origo prima nos latet; sed quacunque ex causa, nunc quidem cessante, sponte primum descenderit; an *idem* cum illo; quod *luem venereum* inducit, dicendum sit, sub iudice lis est. Ex eadem certe scaturigine propullulat utrumque; — sed indole, si modo, *simplex*, cum altero non confluat, *diversam* et nobis utrumque (§. 521.) videtur. Ommisso interim, quod satis incertum sit, *antiquitatis* hujus profluvii, prae *lue*, majoris argumento, potiora, quae allatam opinionem sustineant, fundamenta, ab eximiis licet Viris sat fortiter concussa, adducimus.

Donec igitur infensi hominibus contagii, quod *syphilidem* communicat, indolem rectius definire discamus; id ipsum, virus esse dicamus, quo concubitu impuro praevio locali affectu, subintrat, — susceptum ab isto, solius naturae, vel aliorum, quae nota sint, auxiliorum beneficio *nunquam*, — per solum vero *mercurium*, systemati vasorum ingestum, ac ab isto, incognitas ad leges, mutatum, efficacia, certitudine, quam nullibi morborum internorum hoc metallum manifestet, evidenter majori, celerique, seu *specifica*, virtute, extinguitur. Medorrhoea, quae, *simplex*; si

ne *ulcere venereo* incedit, sponte, vel sine artis auxilio plerumque, sub debita modo cautela, disparet; et a mercurio medelam certe nullam, non raro vero damnum sat evidens, agnoscit, Ab hac ipsa, vel male tractata, vel inconsulte suppressa, non paucae aegritudines descendunt; sed *luem veneream*, seu morbum a solo mercurio, tam celeri, tam evidente successu, domandum *viginti octo annorum* in arte medendi experientia instructi, abhinc venisse, conspeximus *nunquam*. Dolores artuum nocturnos, hoc ipso in Clinico instituto, accusabant non pauci, qui sola medorrhoea sese pridem fuisse affectos testabantur; sed *mercurio* hos dolores vel alia, quae de lue suspicionem alebant, symptomata, non potuimus auferre; mitigarunt, abstulerunt hinc inde, quae in *luem*, sola, nil possunt, alia auxilia. Praeterea in nullo veritas tam saepe medicis, quam in istorum examine, nasconditur. Foeminae, quae ulcus genitalibus haud offerunt; in *vagina*, quo oculus non penetrat; id ipsum pati, — et sub aspectu *medorrhoeae*, *luem* viro incauto conferre queunt. Sub angusto latet interdum ulcusculum praeputii, vel latet forsitan, quin symptomata id doceant,

in urethra. Vel ea, quae longo a tempore suscepta fuit, continuat, et sub recentioris medorrhoeae symptomatis, huic ipsi inconsulto adscribitur, antiquior jam istâ, lues. *Circulationis extra vias* jacere ad urethram in illa virus, est dictum; sed quomodo, quam tantas, tamque longas, in parte, tenuissima epidermide instructa, turbas, excitare videmus, *resorberi non posse*, non debere, dicetur materia: cum vel ipsum cuti applicitum acre *cantharidum*, licet cuticulam non eleuet, resorberi, — vel osculo, vel suctione *luem* oris cavo inseri fateamur? Opinionem, a mucositate urethrae, ne hic ulcera ex acri nascantur, defendi, vel ipsum hoc elui ac prius excerni, — symptomata, longitudo medorrhoeae admitti recusant. Quot non denique, vel a solo puriformis, in medorrhoea, materiae effluxu, praeputium inter et glandem, ob solius saepe munditiei in viris defectum, — vel anum inter et vulvam, in foeminis, ulcera nascuntur! quae, licet de affluxu humoris iniqui continuo ex urethra testentur; *benigna* tamen indole vel paucis, solisque externis remediis jam cedunt, nec *luem* inducunt!.. Experimenta quorundam, qui se, cum de

sumto ex ulcere, venereo, et in urethram deducto ichore, medorrhoeam graesse, — vel ex materia puriformi, sub ista, per urethram stillante, et vulnere per artem inducto inserta, *ulcus venereum* produxisse docuerunt, ignorare non possumus; sed primo, minime virus venereum, in urethram advectum, vel, quod necdum conspeximus ex corpore jam a lue infecto, in hunc canalem depositum, *medorrhoeae venereae* aliquando producendae impar esse censemus; et *medorrhoeam* interdum, licet casu, in quo *ulcus urethrae* deesse vix credimus, rarissimo, virulentam hanc indolem habere, ac luem propagandi potentia valere, nequaquam ex eo, quod hanc nunquam, sat certam, viderimus, negamus, secundo, ex paucis hac super re institutis, nec satis hucusque confirmatis, experimentis inconcussa veritas quod *ulcera benigna* frequentius sub ipsa *medorrhoea*, quin indolem *veneream* ostendant, inundentur ab ista, infringi haud potest. Quamplurimi, qui *luem* ex concubitu acquirunt, non *fluxum* ex urethra, contagio licet maxime exposita, sed *ulcera* ad penem rebellia, ut luis praenuncia, patiuntur; et qui utroque ex malo laborant; hi saepe per

per mercurium a *lue*, — *medorrhoea* nequidquam liberantur.

Quodsi vero communis et simplex *medorrhoea* contagio inducta, ex *acri sui generis* oriatur, et *veneream* rarissime originem agnoscat; oportebit et *bubonem* (§. 523.) et *epididymitem* (§. 524.), et *phimosin* (§. 525.) et *paraphimosin* (§. 526.), quae profluvii illius symptomata constituunt, nisi forsitan praesente simul *venereo* ac *ulcere* oriantur, similis esse *prosapiae*. Ac revera, hoc ipsum vel sola jam, quod a *cereolo urethrae* immisso, per merum consensum *bubones* oriri sciamus, experientia confirmat; ac altera, quod sine *mercurio*, ac *methodo communi* haec symptomata *medorrhoeae*, quin *lues* unquam sequatur, felicissime dissipentur, vix dubium reliquit. Ab *ulcere tibiae* leviori per *externam violentiam* inducto, mox eodem in latere *bubonem inguinalem* observavimus; a *digiti laesione*, *glandulae axillarum* in tumorem durum assurgunt (§. 523.); hinc ex *urethrae phlogosi* ex suppressa cum *adstringentibus*, vel a *frigore*, *medorrhoea*, similia *vasorum actione lymphaticorum* contingunt. Ab istis, portionem *liquidi morborum* sub ipsa *medorrhoea*

Causae bub.
epid. etc.

abduci, nil obstat; sed licet hoc fiat, licet *circulationis extra leges* haerere tunc dici hoc virus non queat; nihilominus, modo ulcus venereum non adsit, *lues*, — vel bubo resolvatur, vel suppuret, si ex propria iudicium experientia feramus, non sequitur.

Epididym. Nec minus *epididymitis* (§. 524.) ex solo, qui urethram divexat, stimulo, ad leges licet non semper cognitae, profiscitur. Ab incauta spirituosorum, adstringentium in urethram instituta injectione, a frigore suscepto, quibus saepe medorrhoea supprimitur, ab equitatione, coitu, sub ipso hoc fluxu continuatis, frequenter hoc malum inducitur. Qui testes mox a primis medorrhoeae diebus suspensorio committunt: his rarius, ex ista, has ad partes inflammatio succedit; sed hoc ipsum, rem satis non explicat. Ex urethrae vasis lymphaticis nulla cum testibus communicant; inflammatio in urethra locum anteriorem magis occupans, in communi medorrhoea vix deferentes semen cannales attingit; licet graviori sub malo ad hos ipsos extensam sectio pathologica monstraverit. Cum parvo in urethra sub urina mittenda ardore, sat longo. priusquam signa medorrhoeae sequeren-

tur, tempore, hunc se morbum manifestasse conspeximus. Post suppressum in illa profluvium, saepe dolor, inflammatio in urethra, quamvis tumor circa testiculum nascatur, *non urgent*; restituto interim profluvio hic ipse tumor facilius dissipatur. Videtur hinc solus urethrae ab acri, vel a stimulo mechanico, irritate, cum testibus consensus hoc mirum symptoma explicare; nec certe veneream hic morbus frequentius, quam ipsa medorrhoea, indolem agnoscit. Vel a sola urinae retentione, et stranguria qualicunque, testiculos, cum dolore, tum misse, ac illis dissipatis, subdisse, observationes docuerunt. Et mercuriali unguento potiore, quam ex aliis exterius adhibitis, effectum non vidimus; nec *luem* hoc ex malo, nisi ulcera praecessissent, oriri conspeximus.

De phimosis (§. 525.), paraphimosis (§. 526.) natura idem dicendum est. Nascuntur hi morbi ex quovis, tum glandi, tum praeputio, vel utrisque, applicito stimulo, per violentum, vel et naturae contrarium, congressum, per fraenuli sub concubitu laesionem, per acre quodcunque hic loci collectum, receptum, depositum. Saepe

Phimos.
paraph.

ulcus venereum, ut causa, hic latet; frequentius sola impuritas, ac puriformis materiae, sub medorrhoea glandis, praeputii, urethrae profluentis acredo haec symptomata, — interdum ulcera superficialia, benigna producant; quae *lues* non magis, quam ipsam, quae simplex est, medorrhoeam, insequitur. Ex phimosi violenter post glandem reducta, paraphimosis non difficulter exoritur.

Nec alia est fluxus puriformis, mucosi ex *ano* (§. 530.), vel medorrhoeae *externae* (§. 531.) natura, et causae prorsus similis haec mala producant. Ex suppressa medorrhoea vaginali, mulierem ad *anum* eodem morbi genere affectam fuisse novimus.

Medorrh.
chron.

Chronicae medorrhoeae (§. 532.), *pudendorum* plerumque, *debilitas*, cum *morbosa* his in partibus *sensibilitate*, pro fundamento est. Universi interdum debilitas systematis, et quae istam inducunt, inertia corporis, victus parum nutriens, viscibus, pinguis, aquosus, potuum, balneorum tepidorum abusus, atmosphaera humida et frigida, laxa fibrarum a nativitate constitutio, haemorrhagiae aliaeque evacuationes, morbi, vim vitae frangentes praegressi, labor ni-

mius, animi pathemata deprimentia, somnus diuturnus, hoc ad profluvium disponunt. Interim, nisi major his, genitalium se jungat *laxitas*, et innixa huic ipsi peculiaris *sensibilitas*, vix fluxus, de quo agimus, ex sola totius debilitate, orietur. Ubi stimulus sat longns genitalia vexavit, et impetuoso humorum affluxu, vasorum rubur infractum, nervorum *sensibilitas* adaucta sunt haec ipsa, ut secretio morbosae minori sub stimulo, quem congestio humorum suppeditat, in longius tempus continuet, jam sufficit. Sic praegressa medorrhoea acuta, vel male tractata, vel ob diaetae errores protracta, vel pluries renovata, in sexu utroque, sub valido licet totius systematis robore, in chronicum ac rebelle frequenter mutatur profluvium. Ex sola urethrae virilis, per phlogosin praeviam quamcunque, inducta, certis in locis, *angustia*, — post istam, urinae allidentis, vel calli comprimantis a stimulo, chronica medorrhoea provocatur. Ex *ulcere* interdum, licet rarius, profluvii istius origo est. Quae vim uteri vel maxime infringunt, ac majorem hac in parte *sensibilitatem* relinquunt, abortus, partus praematurus, difficilis, aut in tenera

aetate sibi nimis vicinus ac frequens, placentae extractio violenta, veneris abusus, masturbatio, haemorrhagiae uterinae, aut vasorum hujus visceris, a menstruis suppressis, nimia dilatatio, potissimam chronicae medorrhoeae causam largiuntur. Sed nihil sensibilitatis perversae hoc in morbo actionem tam manifeste, quam fluoris albi, menstruorum instante, vel declinante periodo, incrementum, demonstrat. Hoc quidem phoenomenon, alii vasorum systematis uterini sanguineorum in uterum patentium, auctae tunc temporis, nec tamen sanguini transmittendo adhuc satis capaci diametro attribuunt; vix autem aliam muci ex utero, vagina, quam ex sexus utriusque urethra, eodem certe sub morbo stillandis, suspicamur esse originem; nec tam mucosae, quam puriformis est indolis, quae hic funditur, ac levi sub phlogosi, menstruorum impulsu in foeminis periodice renovata, ex integra partis affectae superficie secernitur, non ex sanguine, jam facta propellitur materia. Hinc ex stimuli augmento, quod menstrua periodus ad uterum inducit, chronicae hoc in sexu medorrhoeae periodicum incrementum, — nec aliter, quam

illud quod ex coena lautiori, ex potu spirituosio, ex solo corporis exercitio majori, ex repetitio concubitu, utroque in sexu aequaliter succedit, derivandum est. Eodem fere modo Depositedum ad uterum non gravidum, ad vaginam, urethram, vel ad anum, acre rheumaticum, herpeticum, scrophulosum, vel aliud, si visceris debilitas praecesserit, aut morbi diuturnitate inducta sit, rebelles existis fluxus, qui stimulante alias in partes conjecta materia, illico dissipantur, ac aliorum haud raro *crisin* morborum sistunt inducit. Hinc ex dispersis, ut diximus (§. 614.), coryza, catarrho bronchiorum, vel et asthmate, impetigine, ulceribus chronicis, sudore pedum, axillarum, sat saepe medorrhoea in foeminis, — et hac ipsa, cum repellentibus, incaute suppressa, vel pristina iterum salutis incommoda, vel pejora, nascuntur. Quae vero sanguinem copiosius, quam par est, ad uterum cogunt; vel alliciunt, et congestionibus hoc ad viscus viam sternunt: ea, vasorum his in partibus tonum infringunt, ac sensibilitatis simul morbosae rationes adaugent. Huc spectant imprimis vestes, seu thoraces, quibus foeminae a tenera juventute utuntur,

arctiores ut quorum actione mechanica, cruor, corporis superficie sat ampla, et visceribus pectoris, abdominis, non parum compressis, pelvis ad vasa nimis urgetur; lectio librorum libidinem excitantium, praematura matrimonia, negatum uteris fertilibus conceptionis partusque, salutare quamplurimis, officium, — crurum, genitalium noxius, per *carbones* accensos, vel et *turbam*, ut vocant, infensam nervis uteri mephitim spirantes, suppositos, vel per balnea tepida fatus frequentior, — arcta nimis aut rarius renovata fasciarum, quibus menstruo sub fluxu genitalia circumdant, applicatio, ac sanguinis in vagina collectio, stagnatio, — cruoris, a puerperio, natura sic jubente, ad *mammas* ruentis, lactisque fontes aperientis, violenta, in pueros inhumana, his a glandulis aversio, et ad uterum, his, lege consensus, adeo affinem, a partu viribus, exhaustum, revulsio, — lochiorum major, hoc ipso denegatae lactationis ab opere inducta copia, diuturnitas, — partus partum insequentis, pendens iterum hoc ipso a vitioso conamine, nec igitur civium numero favens acceleratio, — remedium, quae *emenagoga* dixerunt, aloetica-

rum, irritantium abusus, — uteri, vaginæ descensus, prolapsus, — pessariorum, ob ipsa haec mala, gestatio diuturna. Sed imprimis vestium muliebrium, quibus biberno sub gelu fere iisdem, ac sub fervida aestate, utuntur, tenuitas, et crurum, regionis uterinae ab aura frigidiori, calicarum, quibus *Asiae* mitioris foeminae prudenter utuntur, defectu neglecta custodia, reprobandae hic veniunt. A cutanea transpiratione suppressa, nisi renes mox suppleant, diarrhoea frequenter descendit; ac sub uteri systemate jam infracto, facilis est serosi ac suspecti humoris hanc ad partem conversio. Non raro ex frigore genitalibus admissio fluor albus, quasi verus *vaginae catarrhus* inducitur: qui, saepius repetitus, chronica medorrhoeae excitandae non est impar. Interdum et aliae hunc morbum causas, spinae vitia lumbalis, ac istius, vel et uterinae regionis, contusio, concussio violens ab ictu, casu, quibus uteri quaedam, ut aliis a causis, *paresis* inducitur, inferre videntur.

De profluvii puriformis ex ani vitio locali pendentis causis jam diximus (§. 530.), *Haemorrhoides*, ut vocant, *albae*, non ex vasis

hoc nomine instructis, sed ex stimulo per varices inducto, ac per phlogosin intestini recti superficiei, ac folliculis mucosis hujus loci illato, propullulant. *Pollicaris* ab *ascaridis* numero majori ad rectum nidulante, frequenter hoc, stimulum, tenesmum, et auctam muci puriformis secretionem experitur. A praegressa dysenteria diuturnus saepe stimulus intestinum divexat, ac puriformis prolabitur materia.

Externam medorrhoeam (§. 531.), major genitalium, apud viros non minus, quam apud foeminas in primis a menstruis absolutis, impuritas, — in parvulis subinde *ascaridum pollicarium* ad vulvam ascensus, ac inducta ex istis continua irritatio, genuerunt.

§. 534. Varii, quos magna jam parte exposuimus (§. 520. — 532.), nec ab illis, qui alias inflammationes sequi noscuntur (§. 126.) diversi, *medorrhoeae acutae* sunt exitus. Frequentissime hæc ipsa *resolvitur*; aut in fluxum pertinacem, contagio carentem, seu *chronicam medorrhoeam*, convertitur. Rarior *suppurationis*, nisi male tractati, neglecti, hujus morbi, eventus est; ac licet illa sequatur, nisi virus *venereum* inflammationem ge-

neraverit; hujus indolem nequaquam sponte assumet. Interdum, quamvis rarius hoc fiat, sub stadio medorrhoeae inflammatorio, quod in genere majoris hoc in morbo significationis est, accedente inprimis novo, ex spirituosius assumtis, ex celebrato concubitu, masturbationis commisso vitio, alioque stimulo fortiori, *gangraena* penis succedit. Quae, inflammationis ob summam violentiam, fere *sicca* est; urethrae affectio; ea, majori, quam si plurimum efflueret, periculo stipatur; sed *siccam* conspeximus, licet valde ardentem, per sex fere hebdomadas extensam, quam nulla periculi indicia circumdabant, medorrhoeam. Non ideo, si multum puriformis, contagiosi liquoris ex urethra distillet, quod virus susceptum promptius *eliminetur*, — sed quod minor inflammationis sit impetus, citius hic morbus absolvitur. Contagii principia, ab initio modo uncia forsitan humoris infensi guttula, per urethrae ostium (ut seminis, a coitu cum muliere menstruis correpta, sanguine, ipsa virili in urethra, tincti exempla docuerunt) suscepta, secretionem morbosam, qua idem contagium copiosius, quousque phlogosis continuat, evolvitur,

inducit. Nec finem; quo cesset hoc ipsum sat certum, nisi omnis jam in urina emittenda, vel ejuculando in semine calor et ardor urethrae disparuerit, erectiones violentae, dolentes, cessaverint, indicari, — nec humorem, qui effluere continuat, liceat aliqua ex istis supersint, cum certitudine virulentiae accusari licebit. Non raro haec phlogosis urethram, maxime virilem, certis, pluribusque interdum in locis, inaequalem, duriores crassiores, et quasi callosas, cum diametri illius decremento, tortuosas relinquit. Hoc urethrae sub statu lotium difficulter, aut tenui, ac in plures divisos rivos, aut guttatim, praemissa puriformis, et post locum obstructum collecti liquoris portione, exprimitur. Nunc ferè *contiuua* sunt haec obstacula, et certis temporibus, minora, post corporis exercitia violenta, equitationem inprimis, ac potuum spirituosorum, veneris post abusum maiora, — nunc, *spasmodicae* magis naturae, in totum sat diu, ut videtur, sublata. Sub maiori hunc ad canalem impedimento, urinae fluxus in universum, et cum vitae periculo, nisi citius auxilium feratur, supprimitur. Plerumque haec urethrae vitia post

repetitas, licet minime fortiores, medorrhoeas, non modo ad *bulbum*, quo loco phlogosis primariae sedes haud fuerat; sed et plures post annos, comparent, et difficilem propriae originis explicationem efficiunt. Interim in multis, a medorrhoea acuta, frequentius, ut ex symptomatum silentio apparet, dissipata, nihilominus major urethrae sensibilitas, et in pristinos affectus, vel minoribus, ac minime contagiosis, ex causis, promptitudo se prodit: et sub ista, *phlogosis chronica*, vix dolens, et *occulta*, ut in oculis, ac ipsis in bronchiis apud dispositos ad phthisin homines, non rara est, frequentius, quam ipsi animadvertant aegroti, subesse, per universum canalem ad *bulbum*, ipsamque ad prostatam, et collum vesicae, lente extendi; — telam cellularem, quae urethrae membranam mucosam exterius laxè circumdat, non minus, quam illam, quae vasa prostaticae in glomerem coaduntat, lymphæ coagulabili infarcire, ac tandem callosam harum partium duritiem, non aliter, quam *chordam* a medorrhoea acuta relictam, *chronicam*, in aliis, inducere videtur. Hanc genesin, prompta semper loci penes callum haerentis, ad phlogoses, na-

tura confirmat, et abscessuum spatii illius, ac in prostata, mole saepius insigniter aucta, frequentia ostendit.

Scirr. abs.
prostat.

Haec *prostatae* a pluribus certe causis pendens, sed post multiplices medorrhoeas acutas, urethrales, licet multos ab illis post annos, apud *senes* frequentior, durities, ex eo, quod, vel uno, vel utroque ex latere, urethram distrahat, comprimatque, fere perpetuas urinae difficultates, suppressiones frequentes, discrimine plenas vesicae nimis dilatatae paralyses, ac fere eadem, quam ex calculo vesicae, symptomata inducit. Portio hujus glandulae, quae ad urethrae ex vesica egressum, ac loco posteriori est posita, tume facta, vesicam versus assurgit, hujus, ostium obturat, atque, ut aliorum observatio, ac aliquae hoc in *musco pathologico Ticinensi* conservatae ex cadaveribus virorum vesicae docent, hujus visceris in cavum altius et ad ovi anserini magnitudinem interdum, — lotii non modo egressum ex vesica, sed aliquando et descensum per urethres in istam, praepeditura, — vel et ostii vesicalis, ne claudi quavis ex parte possit, et hinc simul urinae incontinentiam, productura, ascendit. Alias, uno ex latere

magis tumida, scirrhusa *prostata*, vel et *seminalium vesicularum*, quos iterum hoc in *museo* utroque ex latere vesicae, magnos, possidemus, *scirrho*, vesicam exterius ac lateraliter comprimendo, similes effectus producant. Vel ad recti intestini confinia extensus glandulae tumor, docente cereolo, atque digito in anum immisso, sub perpetua in perinaeum pressione, ac sub tensione, dolore ad urethrae radicem constante, ingressu difficili, hoc ipsum coarctat, faciem has per vias descensum intercipit, vasorum haemorrhoidalium infarctus, tenesmum ac ani medorrhoeam rebellem creat. Crescunt haemiseriae, quotiescunque nova phlogosis tumori se jungit: qua saepe lenta suppuratione, abscessus hanc ad glandulam insignis, vel plures, minores excitantur. Hi abscessus omnem urinae defluxum nunc supprimunt; nunc, ostio vesicae distracto, homine nolente, partim effluere hanc sinunt; nunc sponte vel in urethram, vel in rectum intestinum, vel in spatia huic ipsi et vesicae intermedia, vel per sinus fistulosos in perinaeum; aperti, licet lotio interdum pristinas per urethram vias aperiant, mox novo ichore repleti, pristina symptomata redu-

cunt; vel, fistulis cum urethra, et cum ipso perinaeo, scroto, vel recto communicantibus, urinae simul et ichoris his ex partibus, apertura vel unica, vel multiplici, effluxum foedum, et gangraenas generantem, inducunt.

Ceterum, incerta est satis medorrhoeae acutae, vel mitis, vel fortioris, quoad morbi durationem exitumve, prognosis. Sub leviori phlogosi, diuturnior saepe medorrhoeae decursus, — sub paucioris materiae effluxu major, ne ad urethram callosa succedat durties, metus est; ac saepe, qui parum sub initio urgebat, morbus aegrotantis, Medici, vel causae ignotae ex culpa, cum discrimine inopinato augetur; saepe alter, a principio ominosus, sub recta vivendi medendique ratione, brevi tempore fugatur. Sub optimo, ut apparet, rerum successu, timor est, ne *chronicam* hic fluxus, facile leviores per stimulos revocandus, naturam assumat. Apud foeminas, ob majorem sensibilitatem, laxiorem partium ob habitum, ob irritationem a menstruis periodicam, frequentius, quam in viris, haec ita succedunt. Constitutio corporis laxa, debilis, sensibilior, scrophulosa, vel alio ab acri

fre-

frequentius vexati, adultiores jam homines, prae aliis, ex medorrhoea acuta, in chronicam labuntur.

Sub *chorda* (§. 522.), ubi penis validius erigitur, non rarum est, sanguinem ex urethra effluere: quo saepe profluvio, illud morbi symptoma quamplurimum immittitur.

Bubones ex solo consensu venientes, resolutionem vix non ubique admittunt. Qui ex resorpta simplicis medorrhoeae materia ortum, *idiopathici*, sumerunt: hi, sine luis periculo, resolvi queunt; ac si forte suppurent, non aliter, quam abscessus in parte glandulari, qui lentiolem quidem, pro ratione in flammationis, sed felicem plerumque curationem admittunt, considerari merentur. Difficilioris curationis est, qui cum scorbutica, scrophulosa diatesi incedit, ac facile in ulcus mali moris mutatur, bubo. Quem ulcera venerea, non ob solum consensum, sed, paulo tardius, *idiopathicum*, produciunt, bubo, hic luem certe indicat, ac inducit veneream. *Secundarium*, ex lue confirmata venientem, sine ulcere pudendi, bubonem non vidimus. Bubones, qui resolvi, supurare recusant, *scirrhosam*

Buboni.

aliquando, remediis rebellem, — et hoc rerum sub statu, interdum malignam, *carcinomaticam*, sub cruris, cui respondent, tumore aquoso, motusque jactura, indolem assumunt. Similia ad *lestes*, sub medorrhoea acuta, ad epididymem inprimis, inflammatos, nec benigna, saepe lenta, resolutione liberatos, in quibusdam contingunt, tumorque scirrhusus interdum funiculum spermaticum fere integrum infestat. Quibus semel, ex medorrhoea acuta, testes tumuerunt; his facilius ex novo contagio hac partes inflammantur. An cum jure sit dictum, testiculorum ex hoc contagio duritium in *carcinoma* nunquam abire: de hoc quidem dubitamus; sed exemplis sat certis, ac propriis destituti, contrarium defendere non possumus. Febre *nervosa*, lethali, vetustum testiculi tumorem fere integre dispatuisse, observatio habetur. De *phimosi*, *paraphimosi* periculis jam satis monuimus (§§ 525. 526). Concretio praeputii cum glande, in prima ex istis, lubenter succedit, ac penis erectionem concubitum fere impedit. Factam interim, a tribus jam septimanis, praeputii concretionem cum parte glandis laterali, per injectiones, solvere nobis licuit. Utro-

que in malo, praeputii, — in paraphimosi, ipsius etiam glandis, gangraena timenda, et ex maculis sublividis, nigris, ex vesiculis sero similis coloris turgescendibus, praevidenda est. Rarior est, sed exemplis non caret, bubonis in gangraenam, quam haemorrhagiae subinde praecedunt, comitantur, mutatio.

Difficilioris curationis est *chronica*, tum illa, quae ex acuta, contagiosa, descendit, tum altera, quae *fluoris albi*, apud foeminas, sub nomine venit (§. 532.), ac *habitualis* jam reddita est, *medorrhoea*. Augetur difficultas, cum, praeter pudendi laxitatem, sensibilitatem morbosas, — vel totius languor systematis, atque prona in spasmodicos affectus dispositio, — vel scrophulosa, scorbutica, arthritica, rheumatica, impetignosa constitutio accedat. Si forsitan vitium organicum, si polypus, recisionem non admittens, aut si major arte humana scirrhus uteri, recti intestini, vel prostatae, stimulo, compressione, pudendorum secretionem morbosam inducant: tunc prognosis illorum, et illam chronicae medorrhoeae, plerumque infaustam, constituit. Praeter frequentem mulierum hoc profluvio laborantium

Med.
chron.

sterilitatem, si forsitan conceperint, frequentes, ex causis non magnis, *abortus* patiuntur. Quae urethrae ex callo angustatione, popullulat; — haec, chirurgicis auxillis, novae inflammationis, et aucti effluxus beneficio, dissipata duritie, interdum dissipatur medorrhoea. Non parva interim profluvii, licet morborum, cui natura jam dudum assuevit, habenda est ratio; atque eodem, citius, quam par est, per artem suppresso, frequenter incommoda salutis majora, ut videtur, non ex ipsa, cessantis tunc, effluxus materia, alias in partes deposita, — sed stimuli assueti, cum parte alia, affine, communicati, ignotas ad leges (§. 374.) nascuntur. Hinc variis a morbis foeminas, medorrhoeae hac a specie praeservari, tum hoc quidem sensu, tum eo, quod latens morbi alterius materiae ad uteros ferri consueta, profluvium hic excitet, minus illo incommodum, — vel quod causae morbi antiqui, quasi per *fonticulum*, pars aliqua quotidie diffletur, non ubique tam absurde a vulgo contenditur. Non rarum est, diuturnae medorrhoeae difficilem vaginae, vel uteri ipsius prolapsum, — ac tandem plenas discrimine *cruoris* hoc e viscere jacturas accedere.

§. 535. Cura medorrhoeae, in genere, a Cura gen. causarum, sedis, temporis, symptomatum ratione dirigitur. Desideranda, nec ficta pietate arcenda forent, si certiora, quae contagiorum medorrhoeae, vel et luis ipsius, potentiam delerent, nossemus, auxilia. Res, in *Europa*, sub tanto Populorum cum Extoris commercio, perardua, nec legum subiecta imperio esse videtur proposita a quibusdam, sed soli forsitan tempori reservata, utriusque veneni *destructio*. Major interim in illas, quae corpore quaestum in Republica faciunt, Magistratus attentio, — Viro- rum, qui uxorem, quam possent, ducere recusant, minorem in Civitatibus ad numerum reductio, — subministrata celeriter infectis, tacita, et gratuita, pro miseris, subsidia, infaustos virus tam late diffusi per Provincias progressus ubique non parum fraenarent. Quod ab impuro concubitu eontagium utrumque certius avertat, vel, susceptum, mox corrigat, deleatque, adhuc quaeritur romedium; summa interim partis contagio expositae, nec protracta in longum, mundities, et genitalium, ad ultimos recessus, cum liquido, ne tempus perdat, quocunque, inprimis cum sapone, purgata,

vel instituta, illius sub defectu, cum pulvere quovis absorbente aspersio, — lotii, mox a concubitu suspecto emissio, — cauta tepidae, vel aquae calcis, in urethram, vaginam, injectio, pericula quodammodo imminuunt. Securos non reddit viros, muliebrium, attentum licet, cum ad vaginam hoc extendi non queat, examen. Illorum urethra, vel sponte, vel antea compressa, si dolorem manifestet, aut ploret, si rubeat ad ostium, nisi morbi alii, contagii insonites, forte praecesserint; concedendi amplexus id satis indicabit pericula. Post prae-vium, qui suspectus est, congressum, quin justum symptomata timorem adhuc confirmant, ab omni tamen cum sanis intimiore commercio, quod adhaerens pudendis externis, internis, virus, sine hominis infecti morbo evidenti, sese facile communicet, abstinere oportet. Coeterum ab illis, quae universum systema, vel imprimis quae pudenda stimulare, quae sanguinis ad ista affluxum provocare, vel quae urinae acrimoniam augere possent, sibi caveant aegroti. Necessaria in viris est testium, seu scroti, mox a morbi initio, suspensio. Frequentius humor, qui effluit, vel, sub lon-

giori, et angusto praeputio collectus, id ipsum, vel glandem stimulat, exulcerat, tepido cum lacte abluatur, vel injecto simili, vel aquoso liquore educatur oportet. Decubitus in dorsum molior, pollutiones in viris nocturnas excitare, — in foeminis, virulenti, corrosivi humoris defluxum ad anum, cum damno dirigere consuevit. Positio coxarum declivis, materiae, supino corporis sub situ, in vagina stagnantis, effluxum promovebit.

§. 536. Nullibi auxiliorum tam ferax est, C. med. as., quam ubi morbi vel *sponte*, qualicunque, non prorsus contraria, sub methodo, solvuntur, Scriptorum ingenium; atque hinc tantae in medorrhoea, de qua loquimur, curanda, — quin ideo morbi magis pateat indoles, aut quibus certo ille vix indiget, divitiae! Quam, *venereo* sine ulcere, contagium induxit, — ea, sub recta vivendi ratione, non minus, ac aliae, quas insons forte stimulus invexit, medicae sine artis subsidio, vel a sola natura, perfecte, quin *lues* timenda sit, vel in plurimis, persanatur *acuta medorrhoea*. Prout virus istius natura, — sic et verum, quo extingui mox posset, antidotum, nos latet: et quae forsitan, primis a

concubitu suspecto diebus instituta, medorrhoeam illico et in cunabulis jugulasse legitur, — ea, vel modo animi, ob suscepti contagii timorem agitati, ac, ut sibi facile persuadet, jam sensu pruritus caloris in urethra, vagina, multati, curas demulsisse, — vel, quaecunque demum fuerit, saepe magis venenum his e canalibus *eluisse*, quam in istis *subegisse*, *suffocasse* videtur, *injectio*. Non raro nimios illorum, quise in contagii pericula incurrisse accusant, timores nutriendo, vel methodi adhibitae laudes immodicas decantando, — si non lucri cupedinis, aviditatis, — saltem levitatis, inscitiae, suspicio movetur. Sunt interim aliqua, nec certe spernenda, quae fortiora mitigare medorrhoeae symptomata, quae pericula avertere, et quae saepe breviorum morbi decursum reddere queant, artis praesidia.

Praeter illa scilicet, quae a suspecto concubitu facienda, evitanda esse docuimus (§. 535.), oportet nimiam partis a viru, aut alio a stimulo correptae, irritationem, inflammationem, et, quae ex vitio locali, vel alibi per solum consensum descendunt, symptomata compesci; oportet morbi effectus, qui chronicam inducere medorrhoeam minantur, praeverti.

Quamprimum igitur, stadii, quo morbus hominem ex contagio *invadit* (§. 521.), symptomata comparent, non pauci, et eximii inter hos Viri, praeditos virtute, aut *stimulante*, aut partis infectae mucum *solvente*, aut nervorum illius sensum *obtundente*, aut denique irritatem ejusdem superficiem *defendente*, liquores, per siphonem huic operi idoneum, tepide, frequenter, et caute injiciendos praescribunt. Ut, quid nos ipsi sensiamus fateamur, quaecunque sub *acutae medorrhoeae* principio, et inflammatorio sub stadio, in urethram pelluntur, res, ejusdem a sensu naturali alienae, — licet sapor id linguae haud indicet, irritatum effectus hic edunt; ac nulla, quam intensiois ad gradum, intercedit differentia. *Stimulantium* usus, aut hypothesis, qua, per auctam ab illis muci secretionem, et nunc demum contagium posse ablui, expelli, — aut alteri, qua factam a viru irritationem huic propriam, per aliam, ab ista diversam, posse protinus deleri, sibi promittunt, innititur. Quid de virus suscepti, per auctum ex urethra effluvium, *eliminatione* sentiendum sit, jam supra (§. 534.) docuimus; et quamvis facta per artem *secundaria* irritatio, *primariam*

interdum posse auferre videatur (§. 375.); vix tamen hoc ipsum in casu suscepti indomabilis, *contagii*, locum inveniet. Vel ipsi hujus methodi fautores, irritationem artificialem, nimis exiguam, vix agere, — majorem, quam par sit, nocere fatentur. Quis igitur, sub tanta sensus in urethra, sub diversis temporis intervallis, inconstantia, — sub tanta in variis hominibus irritabilitatis urethralis differentia, vel praescribente arbitrio *formulae*, vel solius, quae idem non eodem semper modo sapit, *linguae* judicio, irritationis gradum faciendae sat certo docebit? Quis impetum, quo liquorem in urethram propelli deceat, ac illius quantitatem, vel satis ut penetret, vel ne stimulo nimis aucto officiat, probabili conjectura indicabit? Quis curationis, vel a chirurgo, rerum satis experto, labore per horas repetendo, absolvendae, patentia in vulgum, incommoda, — vel si res ipsis, tam variis, aegrotis committatur, laesionis pericula, in censum non vocabit? Quis denique tempus, quo ab injectione, vel inutili, vel noxia, oporteat desitsi, sat aequae definiet? Plura tamen, hunc in finem, pro injectione adhibita fuerunt; inter quae, praecipuae sunt-

solutiones vitrioli martis, cupri, zinci aeruginis, ammoniaci salis, olei terepenthinae, balsami alterius. Ex mercurio, variis sub formis injecto, aliqui efficaciam, quam nec ipsa in *lue*, nisi jamjam evoluta, agnoscit, *specificam*, quaesiverunt. Qui virus venereum a *muco* perpetuo involvi, vel aliter, contagii, potentiam deponere contendunt: hi certe, supposita etiam venerea medorrhoeae communis natura, veneni in superficiem folliculosam *effectum*, pro *causa* habuerunt. Nec *acida*, venerei virus indoles sat firmis argumentis, ut ex *alkali* caustico, ex lapidis caustici, vel demum aquae calcis ex usu, quae utrumque in finem adhibent, spes magna virtutis affulgeat, inuititur. Qui artem destruendo contagio imparem agnoscunt; hi saltem nervos urethrae, vaginae, ut minus sentiant cum calcis plumbi, ex aceto solutae, — vel opii, aqua distillata dilutorum auxilio, obtudere satagunt; et conspecta, istius inprimis, in chronica ophtalmitide virtus (§. 154.), huic satis opinioni suffragatur; sed iu *acuta medorrhoea*, vix aliter opium, quam stimulum augendo, oparatur; atque tam parum ex remedio in urethram injecto, hic loci, vel tempore brevissimo, retinetur:

ut liquori injecto, quae interdum hunc sequitur, symptomatum mutatio, vix queat adscribi. Qui urethram defendit mucus, hic alio vix unquam sine stimulo manifestus, suppletur, viscoso, quod vix penetrat, aut satis urethram oblinat, medicamine.

Quae interim hucusque injectionibus opposuimus dubita: ea, ad negandas clarorum Virorum experientias ne quaquam movemus. Nostrum sat raro ab ægrotis, sub primis *medorrhoeae acutae*, jam certe praesentis, initiis, expetitur auxilium; et quoties hoc ipsum novae methodo favebat: toties, quod coeterarum nos phlogosium cum injectionibus tractatarum analogia docere debuisset, poenituit consilii. Sed ut cautos vos reddere, ut nimios multorum hoc in morbo, tam communi, curando ausus, quod rationes id possunt, fraenare, daretur; *experientiae*, ad quam toties, qui experiundi scientia haud pollent, appellant, in medicina fallacias et hic morbi tetigisse, non credidimus inutile.

C. expect. Nos igitur, qui *tutior*, quodammodo licet longiorem, *breviori*, sed facile ancipiti, curationem praeferimus, acutam sibi ipsi relinquimus, *medorrhoeam*; ac modo

symptomata istius, si forsitan nimis urgeant, moderari curamus. Ad victum quod pertinet, modo febris si desit, consuetum, sed a rebus irritantibus, aut difficultor subigendis alienum concedimus. Quae sale abundant, ea, quod urinae ardorem mox augeant, evitari, oportet. Pro potu, aquam, eamque, ne pauca, et hinc acrior, urina urethram offendat, sat multam, propinamus; sed nimia, aut gravi stomacho mucilagine saturata, quod haec, in sanguine mutata, ad urethram non veniat, potulenta reprobamus. Si vino assuetus sit aeger, nec multum irritabilis videatur, nec febricitet; hoc ipsum portione moderata, ap prandium, concedimus. Alvum, nisi sponte apertam, clystere emolliente quotidie movemus. A motu fortiori, equitatu, saltatione, contrectatione, refrigerio, compressione genitalium, a lecto molliori, a sexus alterius, lasciviam excitante, consortio, ab animi pathemate majori, abstineant aegroti. Effluentem ex urethra materiam cum tepida, aut lacte subcalido, frequentius abluant; aut, quibus longius, angustius praeputium impedito est, injectione, qua et mulier vaginam repurget, simplicissima, bis, terve in

die utantur. Urinam, nisi satis recollectam, quam minus frequenter id possint, emittant.

Si febris accedat, et, in homine robusto, plethorico, inflammatoriae naturam assumat; detracto mox vino, et ciborum quantitate ac indole mutatis, venaesectio, antiphlogistica sine sale aut nitro, tamarindorum decoctum, indicantur; sed rarior istius, sub dicto regimine, necessitas, — ac in corpore debili, gracilique manifesta satis a sanguine detracto damna, sensibilitatis adauctae effectus, comparebunt. Sub magnis pudendorum tensione, calore, dolore, cataplasma anodinum cum laudani portione, vel et balnea tepida, tum corporis dimidii, tum in primis localia ex lacte, vel malvæ decocto, usurpentur frequentius. Si ob spasmi magis, quam inflammationis vehementiam, ex urethra nil effluat; ex *opio* medicina petenda est. Si major verendorum inflammatio id jubeat; hirudines, peni, ad locum dolentem, ad perinaeum, vel ad labra muliebria ponantur. Saepe interim has turbas, erectiones dolentes, spasmodicas, pene quidquam ad inferiora depresso, *opium* ad noctem porrectum, — ac si corporis debilitas, sensibilitas morbosa subesse videantur; si te-

nuis ac diaphana materies ex urethra distillet; ac pulsus frequentes, contracti tangerentur; corticis peruviani decoctum, cum tincturae thebaicae portione, dissipabunt. Interdum clyster emolliens cum opio injectus quam optime conducit. Fortiora alvum hoc in morbo purgantia, quae urinae difficultatem, ac singula symptomata mox augent, cane pejus fugienda sunt.

§. 537. Nec aliter symptomata, quae sub Chordae. stadio medorrhoeae inflammatorio emergunt, praepediri, tractari merentur. Ad penem *incurvum* (§. 522.), cataplasma emolliens, hirudines ponenda sunt, vel et opium liberaliter internae porrectum conducet. Sub dolente ac violenta penis erectione, *priapismo* princeps in *opio* est positum remedium.

§. 538. In bubone (§. 523.), cui *ulcus venereum* non subest, curando, ad *saimuli*, quo Bubon. inducitur, indolem respiciendum, et hic ipse tollendus est. Suppuratio tumoris glandulosi, ut inutilis, taediosa, ac foedam cicatricem inducens, quovis modo praecavendo, et bubonis *resolutio* tentanda sunt. Si fortior ad urethram inflammatio hunc generet; tunc illi, ad methodum praescriptam (§. 536.), succurendum est. Si forte

spasmodica ad urethram affectio stimulum cum inguine communicat; tunc ea, quae ad istum commendavimus (§. cit.), in subsidium vocentur. Si fortitan suspessus ex urethra, vagina, materiae effluxus, hoc malum induxerit; tunc suppressionis pro causa, vel inflammatio in illis arcenda, vel spasmus tollendus, vel ope cereoli, pessarii, secretiones morbosae revocandae sunt. Sub incipiente glandularum inguinalium effectum, praemissis praemittendis, rasisque hac in parte pilis, frigidam applicari conducet. Sub inflammatione jam provecta, fortiori, si venae sectio instituta sit, aut minus indicetur, hirudines parti bubonibus vicinae applicandae sunt; vel cutis tensa ac rubra scarificanda est leviter. Post haec auxilia; mitiori sub malo superflua, cataplasma ex lacte et pane, nec tamen nimis calidum, sub die, — ad noctem vero, ob metum refrigerii, emplastrum gummosum; continuo tumori imponenda sunt. Sub vehementi, spasmodicoque dolore, folia hyosciami, cicutae, in pulvere, aut opium cataplasmati jugenda sunt; ac ad noctem ex opio medicina porrigenda est. Ab *emeticis*, in bubonem curatione, ut in aliis inflammationum speciebus, licet

licet aliqui laudaverint, abstinemus. Nec unguento mercuriali, quod cruris, quo ex latere bubo est, parti internae illiniunt, sed quod modo venereae metus infectionis adhiberi consuluit, hic opus est. Si tamen, sub tardiori bubonis, vix calentis ac rubri, ingressu; aliquo, ad promovendam resolutionem, stimulo indigeri videamur; tunc linimentum volatile, vel mercuriale, quod hic specificè non aget, unguentum possunt indicari; sed facilius hunc finem, victus abundantioris, vini concessi, et levis frictionis ad inguen institutae, decocti corticis beneficio obtineri licebit. Interdum, quod et nos conspeximus, vicina bubonis suppuration, ac purulentae fluctuatio materiae jam tactu distinguui videtur; quae tamen signa, quin tumor felicissime resolvatur subinde haud impediunt.

Si bubonis *suppuratio* evitari non queat; in ea rite pertractanda, ad regulas (§. 134.) praescriptas respiciendum, et nunc vires totius systematis, vel modo partis, erigendae, nunc vero moderandae sunt. Lentior est suppurationis in glandulis progressus; ac melius plerumque naturae, quam arti, nisi cutis tenacitas hoc jubeat, comittitur

abscessus divisio. Tunc vero vel ferro, vel causticis haec fiat, modo plenam abscessus maturatatem acquisiverit, nil interest. Si peior hic suppuratio sub aegrotantis debilitate, contingat: saepe cortex, vinum, lautior victus, vel, si dolor violens accedat, opium, huic remedio junctum, conducunt. Coeteras in abscessu, vel ulcere bubonis curando cautelas Chirurgia vos docet. *Mercurio*, ut specifico, hic nunquam, nisi *lues* simul, ex ulcere, accesserit indigemus, sed in ulcere calloso et antiquo percurando, mercurius praecipitatus ruber, eidem inspersus, ac methodus confortans, meliora praestabunt.

Si *scirrhus* his in glandulis durities sequatur; tunc ad ea, quae (§. 135.) dicta sunt, ac alibi dicentur, spe felicitis eventus, eheu! non magna, descendimus. Nec tamen reliqua in quibusdam, a bubone resoluta, glandularum inguinalium plenitudo majorque sensibilitas, vel dolor inconstans quae saepe victus lautior, chinae decoctum, unguentum volatile cum tinctura thebaica, maris balnea, dissipabunt, pro *scirrhus* imponant; *Carcinomatis* vix unquam senationem, ad regulas, alia hujus operis in parte exponendas,

impetramus. Barior hic loci *gangraena*. praescriptas (§. 136.) ad leges tractanda est.

§. 529. *Epididymitis*, medorrhoeae acutae C. epidid., effectus (§. 524.), pro causae ac symptomatum ratione, diversam medendi methodum exposcit. Nunc enim febris haud magna, vix sanguinis missionem sibi exigit; nunc, mitis ab initio, post primos jam dies augeatur, ac tam intensa fit, ut non una; sed plures interdum, venae sectiones reddantur necessariae. Jam sub praevia medorrhoea, testiculos suspendendi consilium dedimus (§. 535.); interim stadio inflammationis cessante, testes sibi ipsis committi, in multis opportunum est. Qua ratione tumor scroti increscit, eo magis suspensorium relaxandum esse, ne compressio succedat, quivis facile intelliget. A motu quovis absteineat, ac in lecto supinus in dorsum decumbat aegrotus. In robustis; plethoricis hominibus, venae sectio, tumoris, ac doloris incremento majori praemittenda, — ac si vehemens tunc febris, cum pulsu pleno ac duro insurgat, ea ipsa aliquoties repetenda est; aut, si hoc minus necessarium videatur, hirudines decem vel quindecim scroto apponendae sunt. Sanguine, si ita

videatur, detracto, mox a morbi principio frigidam aut duram, aut cum saccharo saturni remistam, circa scrotum continuo applicari, ac testes frequentius in illam demergi oportet. A camphorae spiritu cum extracto saturni et aqua remisto, scrotum inflammari conspeximus. Praeterea alvus clystere solvenda, vel et blando, ex manna, tamarindis, medicamento movenda est. Cibi modo pauci, facilesque concedendi, spirituosae, calefacientiae fugienda sunt. Si major ad urethram, perinaeum inflammatio simul urgeat; emollientia huic ipsi, quod frigida, confirmata jam phlogosis vix perferat, apponenda sunt. Si magis nervorum irritatio, ut vidimus, quam Vera inflammatio, epidymidem ad consensum vocaverit: tunc *opium* ad noctem propinandum, vapores aromatici, ex sella perforata, ad scrotum, testiculis suspensis, dirigendi, ac inprimis clysteres, cum laudani portione fere dupla, liberato prius a faecibus intestino, injiciendi sunt. Vel in ipso, qui cum valida inflammatione incesserat, morbo, sanguine jam satis emisso, *opium*, sub reliquo in nervis stimulo, porrigatur. Sub majori jam testium tumore, duritie, do-

lore, et provecta jam nimis inflammatione, cataplasma emolliens, quod sub initio nocuisset, applicandum est. Mercuriale unguentum, quod plures hic scroto illiunt, sine quovis effectum, nisi malo adhibuimus, et si aliis profuisse asseritur; hoc, minus remedio, quam morbo in resolutionem tam prono, adscribentum videtur. Sub fortiori inflammatione, fluida, circa testem collecta materia per tactum discerni videtur; sed licet manifestum et prae-magnum, hac a causa, *hydrocelen acutam*, conspexierimus (§. 524.); incauta tamen foret, ac facile gangraenam induceret tricuspidis hoc in casu administratio. Testiculum, ab incauto chirurgo, hydrocelis curationem cum tricuspide suscipiente, in medio per-fossum ac diras abinde convulsiones, inflammationem horrendam in *Bruchsalienti* Nosocomio inducta, observavimus. Illa interim a regula, in viro ad Clinicum Institutum suscepto discessimus: cui violento sub coitu, sanguis ex urethra copiosus prorupit; ac altera jam die tumor magnus sinistri accessit testiculi. Dolor ingens, tensio, figura ipsa tumoris, dysuria, singula nobis, primo aspectu, morbi indolem celaverant.

Cum vero manifestam in parte fluctuationem distinguere licuisset; sectionem tumoris institui curavimus. Effluxit humor copiosus, primum flavus, pellucidus, acris ac foetidus, mox vero puriformis albidaque materies. Nato posthinc ac *urinam* mittendam novo stimulo. haec ipsa, non per urethram, ut pridem pauca, sed ipsum per scroti vulnus multa, effluxit. Hinc istud, ad locum usque, unde otium, *lacerata* sub coitu ex *urethra*, in scroti telam cellulosa descendemat, dilatatum, immisso urethrae cathetere flexibili, viginti fere dierum spatium sanatum fuit.

Medorrhoeam, ubi forsitan, *suppressa*, epidymidis inflammationem produxit, candelarum, et, ut aliqui proponunt, cereolorum novo *contagio infectorum*, in urethram sub ipso inflammationis vigore, mittendorum auxilio restituere, inopportunum, damnosum esse putamus. Inflammationis in urethra *effectus* est, in multis, testiculorum inflammatio; illaque ipsa medorrhoeam non raro *exsiccatur*, non a suppressione profluvii inducitur, urethrae inflammatio. Cessante vero ad urethram phlogosi, si tumor testiculi continuet; cereolorum interdum cum

fructu tentabitur applicatio. Vel a sola *angustiae* ad urethram cum cereolis medela, ad testem tumor illico disparuit.

Si, quod rarum esse solet, *suppuratio* testiculum, aut vicina eidem integumenta, hoc ex morbo, prehendat; *luis* sine metu, in emollientis usu cataplasmatibus, donec pus molliter promineat, perseverandum, aut emplastrum ex gummatibus apponendum est. Inflammatum, ex ictu sclopeti vicino, suppuratumque testiculum, sectione aperiri curavimus; ac licet pars magna substantiae, filiformis materiae sub specie, e vulnere exiverit; major tamen testiculi portio, matura sectione, salvata fuit. Suppuratio, quae sub scroto, illaeso testiculo, contingit, a ferro brevi tempore curatur.

Suppuratione longe frequentior est, *epidymidis* non modo; sed et ipsius *testiculi*, ab inflammatione praegressa, *durities*; ex quo satis patebit; quod, si, ab initio non ipsum adeo testem inflammari sit verum; sub fine tamen morbi, res aliter se habeat; et phlogosis, et, pendens ex ista, lenta progressu, *durities*, tum illum, tum funiculum spermaticum; quam longe ad renes fere usque pertingit, non raro corripiat. Varias, et hoc

gravi sub malo, methodus commendant Scriptores. Epidymidis durities saepe sponte disparet; aut, manens, pericula haud movet (§. 534.); ad testem conversa, difficilis curatu, et saepe nullo, melius, quam valide agente, irritante, et mali exitum forsitan in *carcinoma* praecipitante, remedio, suspensorio solum suffulta, tractatur durities. Quam alibi (§. 135.), sub inflammationis in duritiem exitu, proposuimus, — haec et praesenti in casu, tentanda est methodus. Mercurius, stimulum, non raro scirrhis funestum, inducit; et nec specificè hic agere, nec, scroto, perinaeo inunctus, per vasa lymphatica in ipsum transire testiculum potest. Linimentum volatile, unguentum cum camphora, attropae belladonnae, mandragorae radices, externe, — cicutae, aconiti extracta, interne, exterius, adhibita, ononidis spinosae, daphnis mezerii decoctum, gummi ammoniacum in aceto squillitico sollutum, electricitatem, ac ipsos adeo cancrorum lapides, commendari, — sed malum nunquam ab istis superari, sat certo novimus. A scroti balneo, ex aqua cum opio remista, frequenter instituto hoc ipsum dissipatum fuisse, ex-

perto a Viro percepimus. Num usus candellarum, medorrhoeam revocandi fine, in urethram missarum, ut alias, ex suppressione istius inductas aegritudines, sic et testiculorum aliquando duritiem dissolve-rit; de hoc, ex *propriis* decidere nequimus exemplis; nec aliquem, per novam medorrhoeam, ab eo testium affectu liberatum fuisse, unquam audivimus.

Si majorem jam molem ac duritiem testiculus aequisiverit, ac dolor lancinans eundem frequentius penetrare sentiatur; tunc certe testis mature suscipienda est amputatio. Si spermaticus simul, usque ad annulum, jam tumeat, ac durus percipiat, funiculus; tunc, ob portionis istius, abdominalem supra annulum haerentis in malignam inflammationem, in carcinoma, vel in gangraenam abiturae, vel lethalis haemorrhagiae ob metum, pejori sub omni-
ne operatio suscipitur. Post *sarcomatis*, testiculi, *recentis*, sectionem, ab illustri, ac versatissimo in chirurgicis Viro arteriam spermaticam, quae suo, necdum fracto, vi temporis, elatere, se citissime abdomen versus retraxerat, non potuisse ad annulum ligari; ac sanguinem copiosum exin-

de, lethali cum eventu, interna ad loca, prorupisse, exemplo nobis constat.

C. Phimos. §. 540. In *phimosi* (§. 525.), quae ut medorrhoeae acutae symptoma incedit, curanda, tum penis ipsa corona, tum praeputium, ita, ut hoc, super glande reduci queat, praeparanda sunt; hinc impeditae reductionis ad causas probe respiciatur, oportet. Sursumeoles ad ventrem, si modo profluvii ex urethra hoc sub situ difficultas non impediat deligandus, motusque corporis evitandus est. Si febris, pulsusque pleni ac duri simul adsint: venaesectio, pro necessitate repetenda, hirudines, ac methodus debilitans, clystereres indicantur; nec major praeputii, quae raro hic esse manifestat, *rubedo* exspectanda est. Post venam sectam, cum satis recens est inflammatio, *frigida* eidem, vel solam, vel cum aceto, saccharo saturni, conjunctam applicari, saepiusque renovari oportet. Sub majori jam et fere phlegmonoso praeputii tumore, tensione, fomentatio, vel balnea penis continua, tepida cum lacte, decocto malvae, cataplasmata anodino, sat mollia, praeferenda sunt. Lac tepidum, decoctum hordei, vel malvae, emulsionem arabicam, dilutam, ut

glandis, praeputii superficiem probe ab-
lant, concretionem impedian, sine impe-
tu, frequenter injici nunc competit. Phi-
mosis sub fine, si tumor praeputii *oedemato-*
sus supersit, aluminis solutio applicata con-
ducit. Praeputii, quam aliqui hoc in casu
institunnt, sectionem, ob non pauca peri-
cula, ob deformitatem perpetuam, et con-
gressus impedimenta futura, vix unquam,
— accerte minus, si ipsa *gangraena* accesserit,
admittendam esse censemus. Si forte abla-
ta jam praeputii phlogosi, ulcera sub illo
haerere videantur; tunc mercuri sublimati
grana aliquot, in aqua distillata soluta, ter,
quaterve in die, injiciantur; vel si longio-
ris callositas praeputii extremum ad lim-
bum, ne reduci hoc possit, impediat; hu-
jus partem velamenti *circumcidi* juvabit. In
phimosi chronica, cum tumore praeputii, sca-
rificatio istius frequens, moderata, obsta-
cula solvit.

§. 541. *Paraphimosis* (§. 526.) ad curam C. paraph.
quod spectat, in ea, ne penis stranguletur,
et glandem a gangraena mox corripiendam
amittat, ne lotii quaevis supprimatur ex-
cretio, festinandum est. Coles igitur, erec-
tus, ad glandem, a manu, cui nivem, aut

glaciem subtiliter contusam imposuimus, aliquomodo comprimendus, — vel saltem frigidae cum glacie, et saturni extractore-mistae, immittendus est; quo saepe praesidio praeputium super glandem posse protrahi, contingit. Si spasmodica magis constrictio esse videatur; ad *opium*, sine mora, veniendum est. Si res minus succedat; tunc, ad regulas chirurgicas, praeputium, sine mora, quot in annulos post glandem vitiose contractum est, ne corpus cavernosum unum vel alterum laedatur, ac tumori *varicoso*, concubitus impediendi, locus sternatur, incidendum est. Si forte glandem gangraena prehenderit: haec raro cavernosa ad corpora, firmiori tegumento celluloso instructa, penetrahit; sed vel sponte, vel facili negotio, glans tota separabitur. Hoc praestito, ne urethra, ut docuit exemplum, concreseat, per fistulam eidem immissam, cavendum est. Interim gangraena, paraphimosin sequente, ac partem cellulosaе, quae corpora cavernosa investit, consumente, penis *chronica curvatura* originem aliquando agnovit. In *chronica*, mitiori scilicet, *paraphimosi*, ut ipsa in *phimosi* (§. 540.) scarificationes praeputii conducunt.

§. 542. Consideratis stadii medorrhoeae C. stad. ce-
inflammatorii symptomatis (§§. 537.-- 541.), laxat.
ad illius, quod *relaxationis* appellavimus (§.
528.), curam descendimus. Haec vero in
plurimis ab ipsa natura absolvitur. Nunc
igitur, si quid de solito, illinc, victu de-
traximus, vel si, ob febris praesentiam, an-
tiphlogisticis, ac potui paulo magis indul-
simus; sub fuga veneris in longum tem-
pus continuanda, diaetae rigorem, pro gra-
du stimuli minoris, imminui, ac methodo
debilitanti, ne *chronicam* profluvium hoc in-
dolem, quod in foeminis, prae viris, time-
mus, assumat, renunciari oportet. Si to-
tius debilitas systematis aut morbum prae-
cesserit; aut, inquietas ob noctes, ob dolo-
res violentos, ob victus tenuitatem, ob hu-
moris mucosi jacturam, sequatur; tunc,
ultimi sub fine hujus stadii, praeter cibos
nutrientes, cum vini portione, liberius por-
rectos, ad corticis vel frigidum infusum,
vel decoctum ascendimus. Sed plures, hoc
a morbo, *localis* modo, in genitalibus, *debi-*
litis, *laxitatis*, *sensibilitatis* morbosae reli-
quias, laborant; atque hinc localibus ma-
gis, vel solis, vel corroborantibus univer-
sum systema superadditis, remediis indi-

gebunt. Pergradus igitur ad ista veniendum, genitalia frequenter cum frigida, in viris lavanda, in foeminis, simul eluenda sunt. Si longius, quam par est, profluvium continuet; *injectio* in urethram, vaginam, aquae calcis recenter paratae, solutionis cum opio, vel solius (N. LXIII. , vel superaddito saccharo saturni (N. LXIV.)), nunc utique tentari sine ullo discrimine potest; qua certe sub methodo, brevem insat multis, — nec tam longum in aliis, morbum sistit medorrhoea; ac praecipitis non incurrimus curae pericula.

Ex ulcere *venereo* pendentem medorrhoeam, vel cum, *luem* adesse symptomata testentur, adhibito mercurio, ut hanc ipsam, — et quod reliquum est, exposita vix methodo, tractamus.

C. med.
foem.

§. 543. *Vaginali acutae* (§. 529.), non alia, quam *urethrali* utroque in sexu (§§. 535. 536. 538. 542.) *medorrhoeae*, medendi est methodus. Tepida semicupia in foeminis majorem, quam in viris, in stimulo frangendo, utilitatem manifestant; ac potior est, vel vel sub ipso stadio inflammationis, *injectionum* cum emollientibus, vel cum lacte, emulsione arabica in vaginam, sine impe-

tu, factarum, quam in urethram, leniendi facultas. Venam tundendi rarior hoc sub morbo apud foeminas necessitas habetur; nec potus quantitas siti major, quod vaginam saturatior paulisper urina non allidat ac irritet, et quod major genitalia post emissam urinam lavandi concedatur facilitas, requiritur. Sed, ut communior; hoc in sexu, medorrhoeae acutae in *chronicam* est transitus; in fere majorem *relaxationis*, in illa, quam *inflammationis*, stadium, attentionem medicorum sibi exigit. Hinc sese lecto tunc temporis, sub majori corporis ac animi quiete, mulier committat; ac, si forte majores fluxum sanguinis nervorum turbae comitari consuescant; has cum opii portione componat. Tardiori, a cessante jam phlogosi, medorrhoeae, cum externis (§. 542.) medendi, melior, absoluto a diebus jam tribus aut quatuor menstruo, habebitur occasio. Facile fortiozem *vagina*, quam urethra virorum, opii, vel sacchari saturni portionem admittet. Sat profunda sit, ac saepius in die, praemisso, cum aqua simplici vaginali clystere, instituatur, indicata adstringentis solutionis injectio: quam supino in situ mulier per aliquot

minuta retinere conetur; appropinquante vero menstrua periodo prorsus omittat.

C. med.
recti.

§. 544. Habito ad causas respectu, non aliter, quam acuta urethralis, vaginalis medorrhoea (§§. 535. 536. 542. 543.), tractandum est mucipuriformis, ex *ani* locali affectu inductum profluvium. *Haemorrhoides mucosae*, ut vocant, eadem, quas sequenti *de sanguineis profluviiis libro* trademus, ad regulas moderamur et sanamus. Similiter de tenesmo, ac mucoso ex vermibus recti intestini profluvio, tum de illo, quod ipsam dysenteriam insequitur, aliuc sermonem transferimus. Si ex acri, vel a contagio, recti orificio admotis, irritatio ac phlogosis oritur; nisi ulcus venereum, quod specialem sibi curam exposcit, hic lateat; tunc, positis circa anum hirundinibus, vasorum repletionem moderari, alvum cum oleo assumpto laxam servari, ac, stimulo fortiori sublato, ex emulsione arabica injectiones institui oportet. Cessante jam phlogosi, et profluvio in longum decurrente, externa, quae in medorrhoea vaginali commendavimus (§. 543.), remedia adhihenda sunt. Foeminam cum felici curationis eventu tractavimus, quam, ex suppressa cum ad-

stringentibus medorrhoea vaginali, impuro concubitu contracta, mox similia illi, ad anum symptomata, -- et neglecto, a duodecim jam annis, feroci hoc incommodo, recti intestini indurati pertinacissima, et faecum, nisi diffluentium, excretionem protinus nunc impediens constrictio afflixerant. Frequentes, sed parvas, ex lactis cremore dulci, injectiones tepidas in anum institui, butyrum cacao eidem intrudi, posthinc vero agarici frustula praeparati, ac post ista, cereolossensim sensimque majores immitti curavimus, ac fere naturalem hac methodo habitum extremo intestino conciliare potuimus. Nec ad ipsam vaginam, inprimis vero externum ejusdem ad ostium, hujus exitus medorrhoeae, inprimis recidivae, cum ulceribus conjunctae, in duritiem parietum insensilem, ac virgineam angustiam desunt exempla.

§. 545. Sub *externa medorrhoea* (§. 531.), non seposita causae, quae morbum induxit, ratione, potissimum in munditie partis affectae studium ponendum est. Hinc fots aquosi demulcentes, emollientes locis a phlogosi correptis admovendi, ac similia, sub longiori praeputio, injicienda sunt.

C. med.
extern.

Dissipato cum istis stimulo, ad externa, quae robur infractum restituant, majorem partis sensibilitatem corrigant, inprimis ad ea, quae (§. 542.) adduximus, fortiora paulisper, remedia maturius pervenimus.

C. med.
chron.

§. 546. Quae ratione *chronica*, ex acuta descendens medorrhoea (§. 532.), praecavenda, curanda sit, partim jam diximus (§§. 542. — 545.). Quodsi proposita jam methodo superius esse malum, docuerit eventus;

Ex ulcere. tunc potissimum, an *ulcus*, vel, cum rarissime hoc adsit, exulceratio superficialis, in urethra lateat, inquirendum est (§. 533.). Est interim sua et huic rerum aspectui fallacia; et exquisitam, longamque saepe locus sub medorrhoea acuta affectus, sine ulceris praesentia, sensibilitatem, ut novimus, conservat; nec aut puris, ichoris, ab humore *puriformi*, in cryptis urethrae mucosis stagnante, tam facilis est distinctio; aut sanguinis paucillum in illo conspectum, continui laesionem sat certo confirmat. Quodsi etiam de *ulcere* securos nos esse jubeat diagnosis; an *veneream*, seu malignam, hoc ipsum, an vero benignam modo indolem foveat, priusquam *luis* symptomata compareant, haud satis constat; vel,

si forsitan constaret, *mercurialium* tamen usus inter morum, nisi viru jam in corpore evoluto, proficius haud foret. Interim injectio, mercurii corrosivi (N. LXV.), non quidem *specifici*, ut vocant, sed ulcus depurantis remedii virtutem promittit. Si hoc ipso, frigidae, vel ipsius glaciei, frequenter ac brevi tempore anteriorem ad urethram applicandae, per usum, molestum non cesset profluvium, tunc, aut spiritus vini rectificatus cum aquae sex vel septem partibus remistus, aut vitrioli solutio (N. LXVI.), vel et corticis quercus junioris, ex diluto tandem ad saturatius veniendo, decoctum, aut lapidis caustici solutio (N. LXVII.), aut myrrhae liquamen, cum tinctura thebaica, saccharo saturni et aqua (N. LXVIII.), per longum satis tempus, sed majori sub cautela adhiberi merentur. Interdum rhabarbarum, ad dosin, quae alvum vix moveat; vel et balsamus copaivae, terepinthina, apud viros, per quorum urethram remedii vis penetrat, exhibita fuerunt. Vel ipsa cantharidum tinctura, qua tamen vix uti, hoc in casu, vellemus, sine laude non fuit. In casu sensibilitatis ad urethram morbosae, potissiman ex opii, vel sola (N. LXIII.),

vel juncta cum saccharo saturni (N. LXIV.) solutione, actionem speramus. Ab *internis*, hoc sub malo, nisi, debilitas universalis subesse videatur, exspectari effectus haud potest. *Olibani*, hoc sub statu laudati experimentum hucusque non fecimus.

Nec minor est virtus *cereolorum*, vel et syringis ex resina elastica paratae, tam in casu, quo *ulcus* latere suspicamur, quam in primis si laxitas urethrae, profluvii causam formare videtur. Jam sola interdum *equitatio*, et inducta per istam moderata perinaei concussio, — vel et vini abusus, aut novae medorrhoeae susceptum contagium, phlogosin acutam in urethra revocando, longaevae finem imposuit medorrhoeae. Parum refert, quae demum *cereolorum*, qui singuli tantum mechanico in urethram stimulo agunt, ac candem comprimunt, extendunt, eligatur compositio; modo gradatim a minoribus ad majores ascendi; ac eosdem, laesionis sine periculo in missos, tempore sensim sensimque longiori in urethra non modo relinqui, sed et ad ventrem firmari curemus. In vesicae cavum delapsi, et calculo crystallino pro nucleo servientis cereoli, in museo pathologico, servamus exemplar.

C. angust.
urethr.

Sed ad feliciora hujus saeculi inventa, vix dicti cereoli, vel ex resina elastica cylindri, catheteres cum vel *chronica medorrhoea*, vel *urinae difficultas*, *suppressio*, non ex urethrae aut phlogosi, aut spasmo, sed ex mechanica ejusdem *angustia*, nascuntur (§. 533.), licet morbum radicitus vix tollant, numerandi sunt. Sub ulcere, fistulis urethrae, perinaei, sub prostatae tumore, abscessu, ac pendente ex istis ischuria, saepe unicum in hoc summo subsidio solatium habetur. Si vel minor, quem majoribus semper praemitti oportet, cereolus urethram haud penetret; tunc *musica* interdum *chorda* prius oleo inuncta, canalis feliciter, ut nos quoque novimus, angustias superavit.

Suppressib.
urinae.

Si fortis in urethra inflammatio, vel aliud, urinae fluxui contrarium, obstaculum, cereolorum, catheteris introductionem impediat; tunc, maturo consilio, vesica, aut per rectum intestinum, aut ad perinaei, — aut denique ad pubis regionem, cum tricuspile, ut in *sexto*, de retentionibus libro diffusius exponemus, perfodienda est. Plerumque his in chronicis urinae suppressionibus vel prostatae, vel colli vesicae tumor ac durities, ne tricuspis per rectum

intestinum, perinaeum, sine laesionis periculo, ad vesicam feratur, impediunt; ac optimo *ad pubem* hoc viscus perforavimus consilio. Qua vero nos lege cereolis, cathetere, tricuspile, his in casibus uti conveniat, — qua denique ratione abscessus fistulae perinaei, urethrae, tractandi sint, *Chirurgia vos docet*. Vix prius, ac dum jam nimis adoleverint, tumoris, et duritiei chronicae ad prostatam symptomata se produnt, vel accusantur ab aegris. Hinc raro, si unquam, auxilium a methodo (§. 135.) exposita admittunt; nec unguenti mercurialis ad perinaeum, laudata a multis, inunctio, nec interna, ex cicuta, mercurio, vel aliis, medicamenta nobis opem, in casu graviore, tulerunt. Plerumque tamen per vices invadit, et nova ex *phlogosi* augetur urinae ex prostatae tumore difficultas: quam saepe hirudines, linimentum volatile perinaeo applicita juverunt. interdum a *spasmo* excitantur, et per vapores aromaticos, ex sella perforata perinaeo admissos, per clysterem emollientem cum opio injectum, vel per cataplasma anodinum perinaeo appositum, tepidumque per balneum, moderantur haec incommoda.

C. med. in-
contis.

Quae foeminam divexat, vel **ex acuta**, contagiosa (§. 529.) descendens, vel aliis ex causis (§. 533.) oriunda, *insons medorrhoea* (§. 532.): haec equidem vix aliâ, quam *chronica* quaevis, methodo generatim tractanda est; interim propiorem sibi mali istius, urbium apud incolas quotidie invalescentis, cura considerationem exposcit. Quae igitur occasionem huic foedo profluvio dederunt (§. 533.), ea sollicitudine vel maxima evitari, — atque num illud alterius, primariae, aegritudinis effectum, — num totius systematis conjuncto, num solo genitalium e vitio descendat, — num foemina majorem cum hoc fluxu habitudinem jamjam contraxerit, inprimis discerni, — ac tandem, desumptis ex hac ipsa cognitione indicationibus, symptomatum, si urgeat, vehementiam, opportunis auxiliis fraenari oportet.

C. prophyl.

Cum vero, facilius praeveniri, quam adultum, auferri queat hoc vitium; interest quamplurimum, ut curâ parentum tene-rioribus puellis, a prima pubertate, tum *menstruae* excretionis imminens; tum pendentis ab ejus neglectu, vel a vivendi ratione perversa, *morbosi* profluvii matura suggeratur cognitio. A sola rerum, quae

proprii conditionem sexus ac valetudinem concernant, communi ignorantia, et a male intellecta multarum verecundia, quamplurimas virginum, mulierum, matrumque juniorum aegritudines, a primo principio, neglectas, ac multum, priusquam paterent, adauctas fuisse dolumus: nec earum, quae jam per annos non paucam, quin de morbo suspicionem formassent, vel eandem parentibus, medicis prodidissent, pituitam ex uteris stillaverint, nobis desunt exempla. In genere, nisi major in urbibus, quam sperare audeamus, sequioris in sexus physica, et morali educatione mutatio succedat; — nisi matrum corpora futurarum *victu, vestitu, artuum exercitio*, sanitatis ad leges accomodatis, majori, quam solent, sollicitudine firmentur; — nisi nuptiae in civitatibus praematurae evitari, matrumque circa prolem alendam officia, ut ab ipsa natura, sic a legibus praescribi queant; — ac demum, nisi major illarum, quae Cives Reipublicae donant, partus sub opere, cura apud omnes habeatur; — ars Medica quidem amissam mulieribus hoc ex profluvio salutem hinc inde restituet; sed morbum tam late inter illas

extensum, ac numero populorum tam infensum, praevenire, sola, non potest. A frequenti inprimis *pudendorum catarrho*, quem toties frigus, illis, a subdito forte igne calefactis, admissum inducit (§. 533.), et quo major cum profluvio habitudo in multis inducitur, foeminae sibi caveant.

Quodsi igitur vel morbus quicunque C. interna. alius. vel totius laxitas, debilitas systematis, hoc profluvium induxerint, comitentur; tunc illa, quae his ipsis opposita sit, methodus, — sub majori autem fibrarum inertia, corticis inprimis, martialium, cibi nutrientis vini, exercitii moderati, balneorum frigidorum usus, — ac lenta si febris jam urgeat, elixir vitrioli, *localis* simul *affectionis* curationi praemittenda sunt. Nec prorsus, ea, quae *interne* adhibentur, generali laxitati dicata, medicamina, suos in ipsa genitalia effectus perpetuo recusant; sed vidimus foeminam hoc affluxu violenter vexatam: cui, quoties martis limaturam stomacho ingesserat, toties fluor illico, sub magna anxietate, suspendi, usuque martis seposito, reverti consuevit. Rarum est, huic morbo *plethoram*, pro causa subesse; ac si menstrui defectus frequenter eundem

praecedat; ex eadem utrumque symptoma origine, locali scilicet ad uterum obstaculo, plerumque descendit. Hinc raro, si unquam, *venaesection* foeminam, *chronico* huic fluxui subjectam non laedet. Nec minus ea, quae, ob serosi, mucosi humoris in sanguine redundantis insanam hypothesin, toties commendarunt, purgantia ventrem remedia; tum ex eo, quod totius debilitatem, sensibilitatem adaugeant, tum quod viscera pelvis stimulo contrario exagitent, cum damno praescribuntur. Si latens in ventriculo, intestinis, saburra haec exigere videatur; emeticum ex radice ippecacuanhae, vel rhabarbarum cum magnesia calcinata, juncto cinamomo, praeferri marentur. Si vel solâ cum magnesiâ, vel lapidibus cancerorum, vel aqua calcis, profluvii hoc genus aliquando exsiccatum fuisse legimus, id certe, symptomaticum, ex ventriculo, ab acida saburra vexato, hinc opportunam corpori nutritionem denegante, uterique secretionem per consensum turbante, originem potissimum traxisse, arbitramur *Mercurius*, quem aliqui hic morbi laudarunt, si pro *purgante* alvum remedio aegrotis praebeatur: non minus, ac alia hujus classis me-

dicamina, debilitatem praesentem adauget; — si, ob *mucosam*, ut supponunt, cruoris indolem, pro *incidente*, remedio offeratur; ad hypothesis magis, quam verae indicationis ad leges praescribitur. Si forsitan acre venereum, herpeticum, vel scrophulosa dispositio fluorem ex utero induxerint; aliquem subinde locum mercurius habebit.

Sed, vel universi debilitas systematis C. externa. hunc morbum praecedat, comittetur, sequatur; vel ex vitio genitalium locali hic pendeat; *externorum* ubique requiritur subsidium; ac ultimo in casu haec jam sola sufficiunt. Temporis interim, quo foeminam profluvium ex utero vexavit, et contractae cum eodem *habitudinis*, rationem non parvam hic haberi oportet; externaque remedia, sub majori cautela, sensim sensimque, mitioribus ad fortiora progrediendo, adhibenda sunt. Si alius, isque major forte, morbus, a fluente ex utero pituita subsidium habuisset: incauta profluvii suppressio primariam facillime aegritudinem revocaret. Plura interim *habitudinis* ex legibus infractis, quam quod iu aliam iniqua materies repulsa, deposita, sit, partem,

nascuntur a suppresso hoc profluvio salutis incommoda (§. 534.).

Primum, quod *externe* adhiberi mereatur, remedium, est *frigida*: qua, pro balneo locali genitalibus affusa, vel lumborum regioni aliquoties in die, a certa altitudine, instillata ac simul ex syringe sat crassa; pluribusque foraminulis instructa, in vaginam injecta, puriformis, per stagnationem, locique calorem hic corrupta materies eluitur, et nervorum inertia, et laxitas partium quam optime corriguntur. Sub majori pituitae acredine, foetore, *aqua calcis* vel sola, vel cum corticis peruviani decocto, frigide injecta, melius conducet. Sub magis diuturno ac rebeli profluvio, ad illas, quas in urethrae chronica medorrhoea, ex opio, saccharo saturni, vitriolo albo, commendavimus (§. 546.), — sed, ob minorem vaginae, quam urethrae sensibilitatem, fortiores, injectiones (N. LXIX. LXX.) gradatim ascendimus; vel has ipsas, per spongiam marinam, coni inversi figura instructam, filoque munitam, — vel contortum, pessarii in modum, similique liquore imbutum linteum, aliquot per horas, vaginae, cujus simul prolapsus im-

pediunt, committimus. Nec minus *suffragia* ex thure, mastiche, aliisque rebus aromaticis, ad externa genitalia, vel simul per tubum, ne calor vaporis obsit, sat longum, ad vaginam directa, commendari merentur. *Equitatio*, in multis, hoc sub morbo, egregie conducit; nec profluvium abinde, ut exspectari licuisset, augeri, sed manifeste imminui, intelleximus.

O R D. II. G E N. III.

GONORRHOEA.

Definitio. §. 547. *A* medorrhoea (§. 518.), seminis humani morbosum profluvium, gonorrhoeae sub nomine, ob indolem prorsus ab ea diversam, consulto separamus. Est vero gonorrhoea fluxus seminis, vel analogi humoris, morbosus, vel *continuus*, ac stillatitius (*completus*) vel, sine penis erectione perfecta, et a minori, vel a nullo libidinis stimulo hinc inde, contingens (*incompletus*).

Morbi nat. §. 548. Humorem in natura aetate ad testes secretum, ac per vasa deferentia in vesiculas seminales depositum, natura, pro speciei humanae propagatione, hoc, non amplo, receptaculo futuros in usus custodit: donec copia adauctus, et ex parte resorptus, genitales non modo nervos, sed et totum systema, vi magna exstimulet, atque animal humanum generationis ad opus invitet; vel ab illo, quibuscunque ex

causis, huic stimulo resistente, sub insomniis, pro aetatis, constitutionis, vitae, ac morum ratione, saepius, aufrarius, *pollutionis nocturnae* sub nomine, expellatur. In *vigilante* interim, *sanoque* viro, si stimulos externos evitet, seminis, praeter voluntatem, perraro fit excretio; ac ut ista, in homine volente, naturae ad finem, succedat, vere tri erectio praecedat, et ad copulam foecundam praeparentur genitalia, necesse est. Nec in *dormiente* adeo homine frequentius; quam id seminis collecti copia inducat, hic liquor sub somni ludibriis disperditur, nisi aut victus succulentior, potus spirituosus, sub vita otiosa, ingesti, aut intimius cum sexu altero commercium, vel amor, vel obscenorum lectio librorum, imaginum lascivarum aspectus, libidinosa colloquia, mollisque in dorsum decubitus, naturam exstimulent. In *acrotanto* vero homine, vel dormiat, vel vigil sit, ob varias rationes, et in primis vel ob totius systematis nervosi, — vel ob specialem genitalium debilitatem, sensibilitatem, vel demum ob stimulum his partibus admotum, seminalis excretio liquoris constitutos a natura limites excedit, et cum insigni sanitatis detrimento,

vel sub somno, vel, quod peioris jam conditionis signum est, sub ipsis vigiliis, a causa minori, ac saltem sine debita penis erectione, aut et sine consuetæ voluptatis sensu, contingit *pollutio*. Sed et altera existit, rarior longe illâ, virorum conditio: cum semen dormientis non minus, quam vigilantis ex urethra, præter omnem voluntatem non modo, sed et libidinis, voluptatis sine sensu, ac sine veretri erectione, destillat.

Sunt quidem, qui *vivi* semen viri, quod sponte in *cadavere* factum esse concedunt, sine sensu voluptatis ac tentigine vel, in dormientibus, sine animae ludibrio venereo, effluere negaverint; sed quamvis hæc raro medicorum ad aures perveniant mysteria; duo tamen nobis ipsis, jam pridem, quæ contrarium ostendant, oblata sunt exempla: unum, juvenis, sed impotentis cum uxore dilecta, viri, qui suae culpam impotentiae, in seminis, sub somno, sine quovis, de quo sibi constaret, animi ludibrio, ac sine ulla voluptate effluentis, frequentem jacturam non immerito rejecit; — alterum, quod magis rarum est, viri, a prima juventute castissimi, ac licet sexaginta

ginta jam annos numerantis, plurimo tamen semine dotati. Hic nempe, cum, in aetate juvenili, robustus, laute nutritus, et a quovis alio sibi stimulo venereo longe cavens, in febrem malignam incidisse, ac in summo periculo versari, medico celeberrimo videretur: ea ipsa, qua mortem hic timuerat, nocte, *ter* semen copiose sub somno emisit, ac altera jam die sanitate perfecta gavisus est. Cum vero hujus viri, jam senis, nobis commissa valetudo fuisset; frequenter in illius urinis, nisi semen hinc inde dormiens, a quo plurimum reficiebatur, perdidisset, hoc ipsum ad pollicis unius et majorem altitudinem in fundo vasis deteximus. Ex *prostata*, ut alii jusserunt, hunc album, seminique simillimum liquorem derivavimus; sed cum aliquando, curru, saxosas per vias, celerrime ruditerque veheretur; sub medio cum nobis sermone, et cum certe nulla venereis de rebus cogitatio subesset, sibi lotium ex urethra praeter arbitrium fluxisse monens, id ipsum, quod effluxerat, *semen*, odore, colore, consistentia disincte nobis obtulit. Nil certe obest, quin, sub majori vesicularum seminalium *plenitudine*, vel sub *laxo ostiolo*

rum, quibus istae in urethram deplentur, habitu, vel sub praegressa foraminulorum, excernentium *erosione*, sub nixu corporis fortiori, equitatu, hic liquor in urethram exprimitur.

Quid *foemineo* in sexu, humorem, sub coitu, non certe quovis, nec omni a foemina, sed tamen a multis, sub optato congressu, profundi solitum constituat, — quam ille originem agnoscat; hoc, licet de re perquam communi agatur, hanc usque in diem sat certo non perspicimus. *Semen esse*, antiquitas, *ovaria* pro *testiculis* considerans, pronunciavit; Recentiores, ex magnis rationibus negarunt, sed, forsitan minori veritatis argumento, a muci, circa extimam vaginam, fontibus prodire dixerunt. Haec scilicet excretio, in multis, — copia, celeritate, et impetu majori, quam a scriptis mucosis repeti ut queat, contingit; nec humor expulsus, tenacem, ut mucus, indolem ostendit. Augetur quidem et istius, sub coitu, per vaginam, secretio, sed quae sub iisdem, ac in viro, phoenomenis, per pauca momenta copiosius contingit, ea non minus in sexu sequiori, quam seminis in viris effusio, voluptatem ex coitu percep-

tam, oestrumque veneris promptissime extinguit; vel, stimulo continuato, lentius, aut minime, succedit; vel, si frequentius provocetur; eadem, quam major, in viris, jactura seminis, laesae valetudinis incommoda (§. 549.) producit. Haec denique, diversa a muco vaginae, materia, non minus, ac semen virorum, sub somni ludibriis, sine quavis genitalium irritatione externa, muliebri e sinu hinc inde profunditur; et commune nimis utrumque apud sexum masturbationis vitium, aequali in utroque successu, suscipitur, aequali demum salutis amissae poena castigatur. Frequentius in *equariis*, plurimarum equarum, num venerem apperterent, et ad conceptionem essent praeprae, examini attente interfuimus. Uno hic ab equo, plures ad venerem equas, ad mammas, genitalia, admoto capite, irritari, ac suam generationis ad opus promptitudinem, largissima liquoris flavescentis, pellucidi, ex genitalibus explosione, significari observavimus. Quod certe, in uno ex grandiorum classe animalium observatum, tam conspicuum, phaenomenon, quid in foemina humana conceptionis sub opere contingat, sat clare manifestat.

Quodsi vero, quae ad prolem generandam, utroque in sexu, contingit, tam seminis virilis, quam humoris, apud foeminas, analogi; excretio, vel a stimulis aequo minoribus, vel praeter arbitrium, tentiginem, suscitatur; tunc morbus, quem *gonorrhoeam* vocamus, oritur, cujus flebiles in ipsos non minus aegrotantes, quam in generis humani propagationem, effectus, describere conabimur.

Symptomata.

§. 549. Non modo qui praeter arbitrium, aut medio sub somno, aut vigiles, obscoenum liquorem e genitalibus, minori sub stimulo, deperdunt (§§. 547. 548.); sed et illi, qui, necdum *gonorrhoea* laborantes, tamen ultra, quam aut aetas, aut vires permittant, verrerem ardentius, libidiosi, colunt, aut semetipsos masturbant, juniores inprimis sponsi, uxores, immaturae aetatis pueri, puellae, aut senes tardiori matrimonio juniore cum foemina juncti, ex nobilissimi, licet pauci, liquoris dispendio non minus, quam ex *convulsiva*, quae singulos coitus comitatur (§. 467.), et quam in ipsam epilepsiam transivisse, ex variis exemplis utroque in sexu captis, recordamur, totius systematis agitatione frequente, pri-

mum viribus languentes, de flatibus, de stomachi infracto tenore, conqueruntur, pallescunt, ac pristinae formam elegantiae deponunt; capite gravantur, susurrus aurium, aciem oculorum imminutam, animi moestitiam, anxietatem, — sub motu suscepto, dispnoeam cordisque palpitationem accusant, tremunt manibus, et cruribus vacillant. Interea febris haud adest, ac cibos sat avide assumunt; sed in corporis nutritionem converti, quotidie magis, magisque macilenti, non sentiunt.

Huc vero malorum cum ventum est, vel et illi, qui ex propria semen voluntate jam nimis sparserunt, aut cum uxore, aut soli, decumbant, cum palpebras vix clauserint, mox, imprimis in dorsum extensi, ac lecto molliori cubantes, veneris sub somno ludibria, ac novam seminis jacturam patiuntur. Jam vero, si novo concubitu id mali praevenire contendant: se minus aptos ad coitum persentiunt, ac saepe sub dimidia, vel nulla, penis erectione, priusquam sinum mulieris adire potuerint, — interdum jam a solo foeminae dilectae aspectu, vel, oblata rei lascivae imagine, commemoratione, sponte liquorem semi-

Tabes dorsalis.

nalem, sub exigua, aut fere nulla voluptate, amittunt, ac vera gonorrhoea laborant. Interdum, quod jam divus medicinae fundator intellexit, cum urinam, aut stercus reddunt, semen genitale copiosum et liquidum profundunt. Ex *prostata* partem istius venire, cum ratione asseritur; sed magna, quae hoc profluvium insequuntur, debilitas, nervosa symptomata, ea satis, nobiliorem hic simul liquorem deperdi, et ex partium, quae hoc secernunt, violento et in longum continuato stimulo, secretionem seminis enormiter, et cum totius interitu nutritionis, augeri, demonstrant. *Spinalis* vero nervos *medullae* hic magis; quam alios, hoc sub morbo, vexari, tum fornicarum, aut et frigoris, ex collo, per columnae vertebralis longitudinem descendendum sensatio, tum lumbalium musculorum major, quam aliorum, ut spinae dorsi promineant, extenuatio, satis ostendunt, ac *tabis dorsalis* nomen, licet aliam haec originem interdum, quam ex *venere*, agnoscat, non ineptum esse, confirmant. Non raro summi ad caput, nucham, lumbos, vesicam, anum, dolores hic urgent; vidimusque, hoc ipso in *Clinico Instituto*, juvenem, qui,

onaniae ex crimine, tum vertigine caduca, tum pedum tanta, ut eisdem insistere non potuerit, debilitate, tum denique crurum, ad articulos inprimis, quin macies jam magna adfuisset, dolore vehemente laborabat. Alterum conspeximus, qui sub ipso onaniae delicto, cum terror accedens, spermatis omnimodam excretionem violenter cohibuisset, a dimidii corporis paralyti correptus fuit.

Quodsi nunc malo, quotidie incrementum sument, obicem non ponant; *febris lenta* accedit, ac sub pulsu celeri, exili, pomeridiani horrores, rubores penarum, calores interni, urentes, sudores nocturni, colliquativi sequuntur; hebetes fatuique fiunt, cadaveris speciem ambulantis assumunt, vel corpore obstipo rigescunt; tumet oedemate pedes; variae ad cutem maculae, vel pustulae, vel et ulcera nascuntur; oculi in profunda, et fere vacua orbita sepulti, coecutiunt; diarrhoea accedit, deciduntque capilli; et qui nimiam plerumque vanam, sic aliis generandis operam dederunt: hi vitam, vel ipso juventutis sub flore, ephemeram, aut sponte efflant; aut manu violenta, suarum, quae tantis cala-

mitatibus stipatae sunt, dierum pertaesi, concludunt. Non rarum est epilepticas convulsiones hanc originem agnoscere; et qui sub fortioribus epilepsiae alterius insultibus frequentius polluantur: — hi citius, non adeo primum ob morbum, quam ex *tabe dorsali*, per seminis jacturam inducta, necantur. Nec fortissima animalia hoc furore libidinis effrenis excipiuntur effectum; sed *equos mares*, summi pretii, qui sibi ipsis, sub violento lumborum motu, semen elicere solobant, in tabem eandem incidisse, ac perversae poenas voluptatis dedisse, memoria tenemus.

Causae. §. 550. Varias ad gonorrhoeam (§§. 547. 549.) causas contribuunt. Nunc etenim *debilitas, sensibilitas morboſa, universalis*, nunc illa *genitalium* potissime, subesse observantur. *Convalescentes* hinc inde semen ex illa, sub somno, frequentius, quam sub ipsa sanitate, amittunt, ac vires deperditas difficilius recuperant. *Inedia, meditatio, ac studia profunda, moestitia*, non minus huc spectant: ut qui nimis, veneris cupiditates jejuniis animique intensis lucubrationibus, arcere conentur, nocturnae pollutionis causam saepe longe adaugeant. Sed frequentius certe ipse vene-

ris abusus, tam ob auctam systematis universi debilitatem, quam ob genitalium infractum robur, ac morbosam sensibilitatem, hunc morbum, inducit. *Debilitatem genitalium* majorem prognerant nimium harum partium in suis functionibus adimplendis exercitium, stimulus continuus, sanguinis congestio, ac frequensior seminalium receptaculorum depletio; vel illa, quae istorum foraminulis excretoriis vim facere, ac eadem laxere, erodere queunt. Hinc, amato objecto destituta; et vi solius phantasiae difficiliter promovenda, seminis per masturbationem expulsio; — hinc coitus, brevi temporis intervallo frequentius, quam natura exposcat, tentatus: sub quo sanguinem interdum, loco spermatis, a viris libidinosus excretum fuisse, docuit experientia, — hinc seminis violenta, sub ipsa ejaculationem, ob terrorem incussum, retentionio; — distractio vesicularum seminalium ab hernia vesicae, tumore scirrhuso, tum proprio, tum visceris adjacentis; — spermatis collectio, in corpore laute nutrito, nec sibi satis a stimulis venereis cavente, nimia; — frequentior plenarum vesicularum, sub nixu ad alvum deponendam for-

tiori, compressio; — equitatio diuturna ac incommoda; — lapsus in perinaei regionem, aut violens contusio; — sectio calculi praegressa; — frequens urethrae, testiumque, sub medorrhoea acuta, irritatio, potissime huc spectant.

Sensibilitatem morbosam his in organis inducunt, tum ea ipsa, quae robur istorum infringunt, tum inprimis morbi urethrae, prostatae, vesicae, vaginae, uteri, ovariorum, rectique intestini, praegressi, ac iterum medorrhoea acuta, spasmus vesicae, calculi in ista, vel in ipsis vesiculis seminalibus haerentes, drastica remedia, vel diuretica, apud viros, fortiora, *aphrodisiaca*, inprimis cantharides; acre quodcunque verendis admotum, rhematicum, arthriticum, herpeticum, venereum, leprosum, semen ipsum, varias ob causas corruptum; — vel quaevis his in partibus phlogosis, vel suppuratio, sub fistula ani ulcus cancerosum, venereum prostatae, colli vesicae, seminis excretionem, — nec semper per *urethram*, sed, quibus patet *via morbosa*, per loca, provocasse sunt visa. Sed vel ipsa seminis, aequo frequentius excernendi infelix *consuetudo* saepe facit, ut, ad minus volumen

reductae seminales vesiculae, vel paucos et aquosos a semine ad novas depletiones facilius stimulentur. Quin sollicita magis, quam corporis, maturi ac vegeti, vitaeque socialis, nec a victu lautiori, nec a sexu alterius consortio sibi satis caventis, conditio id suadeat, fuga veneris, in quibusdam, a natura fervidioribus hominibus, pollutionis nocturnae ac nimiae causam largitur; ut *veneris morbosae* non raro ipsa *conjugali in venere* sit posita medela. Haec ipsa vero ex genitalis humoris abundantia descendens pollutio, si diutius continuet, in *habitualement* converti, et a causis non magnis in corporis detrimentum in dies frequentius succedit.

Sub majori vero, tam universi systematis, quam genitalium ipsorum debilitate, cum sensibilitatis incremento morbo conjuncta, vel sola imaginatio, vel longinquae adeo partis, non summa, irritatio, ad mirum frequenter pudenda consensum provocabunt. *Hydrophobia*, enormes interdum erectiones, ac unum intra diem, triginta pollutiones induxit. Apud viros literatos, hypochondriacos, nimis frequens subinde seminis jactura est. Jam sola de

rebus venereis cogitatio, vel papillarum ad mammas irritatio, quibusdam ex sexu sequiori, genitalis secessum liquoris inducit. Ipsa purgantia medicamenta, quae in vesicam et urethram proprie non agunt, ob nervorum tamen communia principia, erectiones fecerunt. Temporalis ex musculi vulnere, pollutionis historia occurrit. Dum virgis caeduntur pueri jam puberes, non erectionem modo, sed et seminis jacturam aliquando patiuntur. Vel solus jam clyster, calidiori ex aqua injectus, pollutionem induxit. Ex colica spasmodica lethali, pollutio secuta est.

Prognosis. §. 551. Jam ex sola, quam hic exposuimus, morbi historia (§. 549.), ejusdem simus pericula sat clare elucent. Nulla quidem tam *aurea* fuit, quin temperantiae *amor* leges violaverit, *aetas*; sed multa sunt, in quae descendere, praescripta hic vetat brevitās, et quae mores hominum ab antiquis discedere, ac unius, in omnem quasi gregem, vitia proserpere fecerunt. Tam late scilicet, luxuriosas per urbes, per plurima, utriusque sexus proli alendae, educandae dicata hospitia, per integras virorum, mari, terraque, sine conjugis consor-

tio, viventium, societates, expansum *onaniae* vitium, quemadmodum a solis medicorum hortatu monitisque extinguere omne non potest; ita promptius a bonis legibus ac morum disciplina restitutis, quam ab arte salutari, auxilium expectat. Innumera hoc ex fonte, in quavis Republica, obdeletam in prima juventute cum uxore coeundi potentiam, divortia, orbataproli- bus conjugia, ac praematura civium funera quamplurima repetenda sunt. Quot non systematis nervosi vitia, convulsion- nes, epilepsiae, paralyses, hebetudines, amentiae, vitae taedia, — quot non haemoptyses, phthises, febres lentae ac hecticae, — quot non leucorrhoeae, uterique haemorrhagiae, prolapsus, ex hac unica obscoena scaturigine propullulant; . . . Quae morbi alterius symptoma est, ea, prognosin illius fere sequitur, vel exacerbatur, atque nunc facile, nunc vero difficulter superatur, gonorrhoea. Tristior est status viri, cui semer, vigilanti, ex pene non erecto, sed flaccido effluit; tristissimus, si ulcus, aut fistula, quae auferri non possint, alienas huic fluido vias aperuerint. Ubi lenta jam febris hominem adu-

rit, et in exhaustis a tenera jeventute, vel longam per venerem corporibus, tam ipsa gonorrhoea, quam, socia huic morbo, coeundi, generandi impotentia, medelam vix non omnem recusant; ac in genere, provector, vix unquam, — quae recens es, non facile, gonorrhoea curatur.

Cura. §. 552. Ex ipsa causarum (§. 550.) cognitione, hoc etiam in morbo, curationis petendae sunt regulae. Vel quovis in casu, quae totius systematis actionem paulo fortius incitare, ac sanguinis ad laxiora, sensibilia genitalia affluxum augere queunt, potus generosi, aromatica, lasciviae, incitamenta, decubitus in lectio molliori ac in dorsum, fugienda sunt. Subita et omnimoda consueto a concubitu abstinencia periculo non vocat. Qui nimio veneris ex cultu, cum somno indulgent, polluuntur; hoc ex isto interdum de nocte expergefieri, ac lotium, si possint, ut mittant, mone-ri oportet. Si stimulum praesentiant; tunc lectulum quantocyus deserendo, pollutionem non raro avertent. Cui sub somno ex pene erecto semen effluere consuevit: huic, ut a primo erectionis molimine evi-

gilet, suspensorio et scrotum, et coles simul munienda sunt.

Pollutiones nocturnae ac nimiae, ex seminis, ant analogi apud foeminam liquoris *abundantia*, oriundae, non aliter, ut diximus (§. 550.), quam veneris salutaris prudenti concesso usu domantur. Interdum victus tenuior, vegetabilis, corporis exercitium ac labor, vini, et rerum, quae stimulum genitalibus addunt evitatio, in plethoris venaesectio, jacturam moderabunt; sed pauci, sanitatis particulam majoris, cum auxilio, quod optimam, in dubiam, aut pejorem convertat, valetudinem, nuberi si possint, lubenter resciant; ac saepe, ex certa organi fertilioris constructione pendens abundantior secretio, a quovis artis, nisi noxio, molimine, si leges imponi haud sinit.

Quae vero nocturnae, diurnae, pollutiones, gonorrhoeae, *debilitatem* pro causa agnoscunt; has, victus facilis, sed nutriens, parva, saepius, portione, ex carne tenera, succosa, — cancrorum, testudinum, ranarum jusculis non calidis, cum ovo, — ex amygdalis, *chocolode*, ut vocant, ex recentibus, ac paucis aliis vegetabilibus, farina-

ceis porrigendus, — potus ex frigida, cum vini generosi non magna quantitate, — motus corporis, pro viribus, in aere sereno, nec frigido nimis, nec calido, susceptus frictiones cum pannis asperis, fumo aromatico imbutis, cauta, genitalia ne iritet, equitatio, amica, proprio cum sexu, consortia, non parum moderabunt. Evacuatio hic quaevis, nisi aliae, sat fortes, rationes hanc exigant, evitanda; sed simul quae robovent, cautissime, ne stimulum augendo, fluxum seminis mox revocent, longo tempore adhibenda sunt.

Peruvianus hinc *cortex* cum aqua decoctus emulsione arabica, et aquae cinamomi portione superadditis, egregia hic praestat. *Aquarum usus mineralium*, ob validam in urinis pellendis potentiam; non satis tutus apud omnes videtur; et facile *martis tinctura* cum succo pomorum parata, vino martiali, suppletur. Vel et ferrum, in pulvere, cum cortice cinamomi ac saccharo porrectum, conducet. *Spadanae* interim non raro hic cum fructu, vel solae, vel lacte remistae, porriguntur. Ex *balsamicis*, nisi obsint, hic parum expectamus

auxi-

auxilii. *Adstringentia* interne porrecta, cum in *chronica medorrhoea* rarius fluxum cohibuisse sint visa, parum quoque aut nihil in testes ac vesiculas seminales operari viderentur; interim, cum major simul totius systematis hoc in morbo, quam in quavis habituali medorrhoea, debilitas occurrat: *adstringentia* levi manu porrecta, qua ipse cortex et ferrum virtute prosunt, interdum conducent. Potissimam hic laudem meretur *frigida*, corpori, lumbis, perinaeo, genitalibus ipsis, brevi tempore, ac saepius adpersa, vel per clysteres hinc inde, sed pauca quantitate, in rectum intestinum injecta. Apud foeminas, nisi jam nimis hac in parte irritabiles, frigidae per vaginam injectio suadenda est. Sub corporis non jam extrema debilitate, balnea, ac tandem natationes in *frigida*, conveniunt. Sed cum tanta in aegrotis, per seminis jacturam exhaustis, *sensibilitas* hic urgeat, *opium* a multis hoc in morbo laudari, rejici ab aliis, videmus. Non raro hoc genus remedii, ob stimulum, quem prima actione inducit, ob lasciviae imagines quas in praedispositis revocat, non minus, quam ob virium inertiam, quam, illo cessante,

relinquit, cum damno porrigetur; sed quemadmodum in penis, sub *acuta medorrhoea*, erectione, curvatura violenta (§. 537.), sub testium tumore symptomatico (§. 539.), insignes *opium* virtutes praestitisse et visum: sic quoque sub isto morbosae sensibilitatis ad genitalia effectum, inprimis per clysteres ex frigida, vaginae, vel ano injectum, non minora aegrotis beneficia praestabit.

Primorum vero Medicorum consilio, *lactis*, in gonorrhoea et tabe dorsali, usus non immerito commendatur. Hoc igitur tam ad victum; quam alia ratione, qua copia debili et in acidum coagulum proelivi a stomacho perfertur, inprimis cum latens *acredo* genitalia exstimulet, concedi, ac *humanum*, ex ipsis, nisi stimulus, apud viros timendus, hoc vetet, uberibus sugi, vel mulsum recenter ex capris, aut vaccis, quod magis lacte asinino, tenuiori, hoc nutriat, praebere cum fructu potest. Si flatus, pondus ad ventriculum, ructusve acidi sequantur: *lac* illico suspendi, ac post sedatas cum magnesia calcinata, et rhabarbari pauxillo, turbas, iterum, cum aqua calcis, vel *spadana* remistum, tentari, — si

vero facilius ab aegroto perferri non queat, in totum seponi meretur.

Si forsitan *mechanicam* gonorrhoea, ex calculo, fistula, tumore, ulcere cancroso, agnoscat originem; nisi aliquod interdum *Chirurgia* hic offerat, — nullum *Medicina* hic suggerit consilium.

O R D. II. G E N. IV.

GALACTIRRHOEA.

Secretio
lactis.

§. 523. **D**uplicem vitae fontem natura pusioni humano maternum ad pectus aperiut, et magna *chyli*, haud plurimum mutati, copia has vastas per glandulas quotidie, genitricis sine damno, in filium transfunditur. Per longam annorum seriem, vix alia, quam ipso *virili* in sexu, hujus mirae scaturiginis vestigia comparent; ac puellis non magis, quam pueris, vix utero exclusis, mamillae hinc inde rubent, calent, dolent, ac tumidae, serosum liquorem profundunt. Quod si *virgines* intactas, vel ex morbo, vel uberrum suctione praemissa, *lac verum* dedisse, experientia aliquando docuerit; id et pinguibus laxisque *viris*, quin *vetulis*, et mulieri, quae *ulcus*, aut *molam* in utero gerebat, aut cui *menstrua suppressa* fuerunt, ex mammis sat abunde stillasse, docet eadem rerum Magistra. Sed ab aetatis *duodecimo* fere

anno, in quibusdam celerius, sepultae hucusque glandulae ex virginis thorace assurgunt, protuberant, et globosam firmamque in molem adauctae, tardioris uteri cruentum tributum expectant. Hoc tandem soluto, per *triginta* vix non annos, functionis subeundae promptitudinem in virgine, perpetuo *arentes*, mirifice conservant, ac suum cum utero consensum *periodice* non modo, turgentes, dolentes, ostendunt; sed et sanguinem hinc inde, cui transitus per uterum, forte morbo correptum, negatur, easdem ad leges transmittunt.

Sed utero, vix humano ac foecundo a *In gravidis.* semine irrigato, mammae, post *primos* jam menses, in aliis, a quinto ad sextum, a sero, vel sat denso interdum a lacte, duriores volumine increscunt, tenduntur ac dolent, vel in illis, quae partum jam expertae sunt, secretum non raro liquorem sponte effundunt. Est tamen, ubi aliter res accidit, et vidimus mulierem, cui mammae, cum gravida *non* esset, continuo, ad novam usque conceptionem, lac multum fundebant; quando primum vero utero conceperat; lac omne disparere solebat. Quo partui vicinior est gravida, eo moles mamma-

rum, et serosi humoris secretio magis magisque augentur.

In puerper.

Excluso foetu, natura foecundi curam uteri gerit, vasa prius extensa dilatata, retrahit, coarctat, exprimit, emungit; affluxum sanguinis superflui avertit, ac minores, vasorum hujus torrenti, diametros opponit; unde, excreto, qui *lochiorum* sub nomine venit, sanguinolento, partusque reliquiis remisto humore, *tertia* fere, aut *quarta* etiam die, magnum jam opus quodammodo absolvit, uterumque, ad illum saltem, statum, quo major arteriis praepotentibus resistentia opponatur, reduxit. Novae hinc sanguini leges imponuntur; neque sine omni, tum uteri, tum universi systematis turba, hoc opus absolvitur. In illo scilicet, excretio saniosi liquidi per breve tempus quodammodo languet tensionis, plenitudinis sensus in pelvi percipitur; — in hoc, motus febriles insurgunt: levis, et sub cute quasi repens, aut per columnam vertebralem descendens horripilatio puerperam, corripit; hanc sequitur calor auctus, facies accenditur, caput dolet, sitis accedit, pulsus frequentia, plenitudine augentur, inquietudo cum insomniis turbulentis, pectoris

quaedam angustia, dolor glandularum axillarium, brachiorum movendorum difficultas, molestant mulierem: cujus ubera magis nunc assurgunt, tenduntur, dolent, ac serialbescentis majori secretioni indulgent. Sudores, accrescentem spirantes odorem, copiosi erumpunt; et post unam alteramve diem, his motibus a natura impensam, *lochia* demum quidquam augentur; sed serosa, mucosa magis, et albida, et puriformia sistuntur, continuantque in illis, quae mammas puero sugendas praebeant, per *quindecim fere dies*; in illis vero, quae hoc fungi officio aut non possunt, aut fungi, in filium crudeles, recusant, per *sex aliquando, et ultra, hebdomades*. Hanc igitur *febrim*, ex solo mammarum turgentium, dolentium, ac lactis nunc aucti phoenomeno, *lacteam* Medici dixerunt. Interim hanc ipsam uberum, jam prius ac febris illa accedat, lacteo humore plenorum, affectionem, *symptoma* potius laborantis adhuc, vulnerati quasi, ac sese depurantis uteri sistere, ex statu *virginum*, quibus menstrua parantur, et quibus tunc ubera turgere, sororiari, dolere, ac febrilia interdum symptomata subnasci observamus, manifeste docemur. Nec

enim ad solam *lactis secretionem* tot motus excitari dicemus: cum nulla sit, quae febrim, tantasque turbas sibi exigat, secretio. Certe, quod in gravidis ad mammas *aperitur* — id sine stimulo insigni perficitur, secretionis sat amplae in multis negotium; nec sub ipsa mammarum sat magnâ, alio foeminae sub statu exorta, inflammatio, aequalia per universum systema, symptomata, quam in puerpera *ex utero* succedunt, inducit. Quod si, febris quam *lacteam* vocarunt, majorem ad gradum ascendat, neque lochia restituantur; non adeo in *mammarum* aegritudinem, quam in *metritidem* (§. 223.), aut in *puerperalem peritonitidem* (§. 217.), illa mutatur; ac saepe, vano *febris lacteae* sub titulo, utriusque morbi primordia, a medicis neglecta, in funestam puerperis febrim converti cernuntur. Si major *febris lactea* in illis esse dicatur, quae robusto ac bene nutrito corpore incedunt: hoc non adeo ex lactis copia majore, quam haec ipsa major secretio, ex fortiori uteri in mammas actione, et ex lege stimuli intensioris repetendum est.

Utero humano a suis post partum recrementis, par superficialem quasi phlogosin ac febrem, quam *uterinam ephemeram*

dicere, quam *lacteam*, mallemus, repurgato; et ubera, modo puero ad sugendum porrecta, tensionem, sensibilitatem majorem deponunt, atque lactis in dies copia, albedo, dulcedo, augentur. Manifestus primae, suctionis ex mammis est in uterum depurandum, ut alibi (§. 467.) jam monuimus, effectus, atque sub quavis papillae sensilissimae tractatione, reliquas ex partu materno in sinu materias abundantius fluxisse, a foeminis percepimus. Hoc etiam beneficio, quae integrassese filiis matres non sistunt, aut quae suos lactitare non possunt, genitricēs privantur; sed quamvis post paucas jam dies, chyli ad mammas torrentem, sub variis, et alibi dicendis, periculis, divertant; per longos tamen menses, vel etiam plurimos per annos, lactis portio aliqua in uberibus detegitur. Quae vero mammas puero sugendas offert, vel mater, vel nutrix: ea, modo satis nutriatur, nec totius, aut organi secernentis, vitio laboret, lactis quantitatem quae proli, etiam *gemellae*, aliis sine cibis, donec dentes, his quodammodo subigendis idonei, proruperint, nutriendae sufficiat, quotidie suppeditat. Non paucae adeo nutrices, praeter illam, quam pueri,

ad plenam usque satietatem, suxerunt, lactis portionem, aliam, sat magnam, sponte ex uberibus pluentem, deperdunt; sunt aliae quae, alteram jam prolem in utero gerentes, primam, saepe sine damno illius, plures per menses, lactitarunt; aliae, quae, forti sub febre constitutae, dilectum tamen filium tenero a sinu repellere nolentes, lac, a morbo nequaquam infectum, aridas sitientis in fauces, cum insigni charitate, continuo stillarunt. Nec paucas certe matres, quibus ubera primo a partu, ad secundum, vel tertium, lacte interdum sat multo, nunquam caruerint, conspeximus; et sic per annos in multis tam copiosa nutrientis principii ex uberibus, quin morbum inducat, excretio continuat.

Morbosa
secretio.

§. 554. Sed aliter in aliis res utique succedit. Vel enim longiori temporis, quam par est, intervallo lactatio protrahatur; — vel plures nutrix pueros simul alendos assumat; — vel a natura, nimio labore, necessariae nutritionis defectu, jam debilis et viribus exhausta, vel aetate nimis tenera, et proprii incrementi necessario sub opere, hoc sibi onus imponat; — vel modo diuturno, ac certa in phthisin pulmonalem dis-

positione affecta, huic se officio accingat; — vel partus partum nimis rapide, quin lactatio celeriolem, ut solet, conceptionem retardet, sequatur; — vel demum maior, quam par est, chyli, nutrientis principii copia quotidie per ubera praecipitet; in quovis certe casu, lactatio lentum materno corpori ex inanitate interitum praeparabit.

§. 555. Morbum vero ex lactis redundantia et profusione, cum tabe, seu corporis materni atrophia, productum *galactirrhoeam* vocamus. Definitio.

§. 556. Latiori tamen sensu hoc nomine, quam scholae quidem solent, hic utemur: nec modo consuetâ maiorem ex uberibus secretionem, et sequentem ex ista, nutritionis jacturam, — sed quodvis lacteum ex mammis, quod corpus nutricis, propriarum sine virium notabili consumptione, perferre haud possit, profluvium *galactirrhoeam*, — illinc *completam*, — hic *incompletam*, dicemus. *Lac verum* aliis interdum ex partibus, quam per uberum papillas profluxisse, nisi *chylum*, sine quavis in corpore mammarum praeparatione, pro lacte, sine magno rationis fundamento, declarare velimus, quod genus profluvii *galactirrhoeam* Divisio.

erroneam vocarunt, non facile admittimus. *Chylum* per horas in sanguine, haud multum sua ab indole mutatum, fluxisse, frequenter nos ipsi intelleximus. Sanguinem emissum fere *album*, prae rubro, colorem habuisse, — similem humorem, ptyalismis sub forma, per salivam, sub specie sudoris, ex oculis, umbilico, aliisque ex partibus distillasse, medicorum non paucae observationes testantur. Sed quamvis *lac* e mammis resorptum, donec in sanguinem convertatur, hoc nomine venire, nil obsit; vix tamen ex solo effluentis materiae colore, vel ex aliqua in coeteris cum *lacte* similitudine, *lac* verum stillasse, aut *lacteam* in parte *metastasin* subesse, cum aliqua certitudine asseritur (§. 219.). Interim non exiguam, *galactirrhoeam veram* inter ac ipsum *diabetem*, affinitatem agnoscimus; ac forsitan non tam *lactis* ipsius, quam *principii nutrientis* major, quam par est, contenta in lacte mulierum quarundam, copia, *atrophiae*, ex moderata licet pueri suctione venientis, est causa. Quem alii viderunt, *diabetes chylosus* (§. 480.), aut *fluxus per renes coeliacus*, ut varii dixerunt; is certe cum ipsa *galactirrhoea* haud parum conspirat; in hoc tamen, praeter locum origi-

nis, diversus: quod particulae nutrientes, ex lege naturae, gravidarum puerperarumque mammas pertranseant, et ex causis plerumque minus obscuris, earum copia naturalem excedat.

§. 557. Non *humana* modo foemina, sed Symptoma.
universa animalium classis *mammalium*, huic morbo subjecta esse videtur. Frequenter *vaccae*, ob summam lactis, quam, sub victu eodem, prae sociis, quotidie largiuntur, quantitatem, *atrophicae* redduntur; ac talem nuper vidimus, quae, in coeteris sanissima, et pabulo permulto nutrita, vel hoc solo, quod omnes ejusdem stabuli vaccas fere tertia lactis optimi parte superaret, ad insignem prorsus maciem reducta fuit.

Galactirrhoeae symptomata, ab illis, quae tabem, ex humorum jactura lenta, quamcunque aliam (§§. 475. 483. 516. 546. 552.) circumdant, haud differunt. Si vera lactis redundantia hunc morbum producat: tunc niveus hic, et nutriens prae aliis liquor, vel sine praemissa papillarum suctione, copiose ex uberibus, post paucas a pastu horas, effunditur sponte, ac plurima, quae mammis apponit mulier, lintea perenni hoc fonte profundius humectat. Vel, sub

lactis non tam insigni profluvio, cum nutritis in corpore materiae defectus nutriticem premat, aut alia, ex dictis (§. 554), ratio praecesserit, majorem foemina ex qua vis pueri suctione debilitatem persentit. Sub ciborum desiderio, et victu majoribus. macies quotidie increscit, debilitas a quovis corporis exercitio major, cordis palpitatio, dispnoea, tussis sicca, facies pallida, ad genas rubella, comparent. Hucusque febris a pulsu non proditur; sed aliquam temporis post moram, appetitus ciborum deletur: accedunt nauseae, symptomata nervosa, cephalaea insignis, tussis increscit, ac meridianas ad horas, praevio subinde horrore, calor levis excitatur, et sitis major, dolent artus ac dorsum, debilitas quotidie augetur: quam sudor succedens nocturnus graviores mox reddit. Jam dolor thoracis, vel sterni, sub tussi, dispnoea, vel brachiorum sub motu, punctorius; — pulsusque duriores, celeres, sed parvi, haemoptysis ipsa, ac plurima affecti pulmonis indicia, sputum purulentum, tabes aperta, colliquativi sudores, vel alvi fluxus, lipothymiae, sequuntur. Sanguinis copiose ex mammis ruentis, ac liquidi assumpti nec

quidquam mutati, ex uberibus profusi, descripta aliis, exempla non vidimus.

§. 558. *Galactirrhoeae completæ (§. 556.) causæ.* Causæ.
 sa, vel ex ipsa, profluentis principii nutritis jactura pernoscitur. Sed quid omnem quasi *chylum* mulieris e sanguine, ad ubera, quasi sola, perducatur; id, nisi fortior pueri avidioris, et jam nimis adulti *suctio* illustret, non facile videmus. Nimia forsitan mammarum sensibilitas, debilitas localis, aliquid contribuit; sed novimus plures, ex *vacca* bonae indolis, filias, lac aequè copiosum, ac pingue dedisse; alias, non absimili *haereditate*, sub optimo licet pabulo, nec dimidiam quidem lactis, non optimi, quantitatem concessisse. Nec in foemina *humana*, id aliter succedere, sed, familiae quasi jure, mammae lac paucum, aut multum secernere videntur. Ipsa forsitan matrum, proles ab uberibus arcendi, aut singulas lacte proprio nutriendi, *consuetudo*, in filias actionem exercet. Nullius fere partis, tanta, diversos inter Populos, quam *uberum*, occurrit diversitas; et quamvis ipsius ratio *vestitus* quamplurimum huc faciat; sunt tamen integrae, in quibus ubera foeminas vix mul-

tum exornent, — aliae, in quibus mammae, sub vestitu licet iniquo, insignem ob molem, deformes has reddant, provinciae. Sed cum *pinguiora*, lactis non plurimum secretioni favere, ubera sciamus; forsitan uno eodemque istorum sub volumine, non minus, quam ex pabuli diversitate apud *vaccas*, meliorem, pro lactis copia, nutriendi virtute majori, certae regiones, quam aliae, cibum largiuntur, nec omnia, quae coeterum satis nutriunt, — sed certa inprimis fercula, quod *nutrices* bene, — sed medici, has in res parum attenti, oscitanter nimis, distinguunt, augendo vel maxime lacti conducunt. Istorum hinc defectus, — crescentes, sub aucto indies labore, matrum rusticarum inediae, — protractum apud istas, ex novae prolis metu, aut praesentis amore, lactationis, ad pueri jam loquentis aetatem, officium, — lucri; apud *nutrices* pretio conductas, vel plures, vel diutius quam possint, filios, nutrientes, cupido, potissimas tabis, ex lactei humoris iactura oriundae, causas nobis offerunt. *Incompletae causas galactirrhoeae*, morbi praesentes, praegressi, ac nota corporis dispositio, interdum satis indicant; sed frequentius ratio-

rationem, cur paucò a lacte pueris concessò, tam magna in multis debilitas ac macies sequantur, — hanc, ut alias morborum causas permultas, nimis ignoramus.

§. 559. Omissis *prognoseos*, quae ex dictis Cura (§§. 554. 557. 558.) jam satis elucent, momentis, ad ea, quae galactirrhoeam sanent, accedimus. Nec tamen magna circa methodum huic malo opportunam dubia nos prement; sed quivis, prolem ab uberibus quantocyus removendam esse, vel sponte concludet. Est tamen, et hoc in consilio, ne tam largam secretionem praecipitanter suppressimus, prupentis cautelae, et alicujus in separando a matre alumno cunctationis necessitas. Major quidem exhaustae nutricis debilitas, ut aliâ in tabe, alimenta nutriente principio ditiora expetere videtur; sed vix talibus mulieri concessis: qui sanguinem intravit, mox per ubera chylus praecipitat; atque hinc aliquam prius remoram huic poni, atque largiores cibos, donec profluvium per mammas moderari potuerit, suspendi necesse est. Nimium has ad glandulas affluxum varia infringunt; sed ne plenis, et a lacte turgentibus mammis indiscriminatim admoveantur, vetat faci-

lis contenti lactis has ad partes stagnatio, ac in coagulum proclivitas; vetant varia, ex cohibita celerius tam insigni secretione, timenda incommoda. Vidimus puerperam, quae, puerum lactitare recusans ob insignem, a lacte, mammarum tumorem, vaporem aromaticum iisdem adhibuit. Jam altera die, ubera collapsu, — sed cruris dextri simul enormem, albissimumque tumorem, dolores atroces, per mensem et ultra extensos, observavimus. Hinc uberibus prius ab alumno depletis, ac tempore a cibis assumtis magis remoto, externa, quae chyli affluxum infringant, adhibenda sunt remedia. Tunc scilicet, cum tepido vini spiritu mammae lavari, mox vero panno ex lana, vel emplastro diachylo obtegi, et per fasciam, ne pendeant, ex collo, firmari queunt. Interea omnis brachiorum motus a muliere evitandus, pedes aliquoties in die tepidae immittendi, ac aliae, quae minus debilitent, secretiones moderate augendae sunt. Huc *urinae* inprimis, ac *sudoris* pertinet excretio: quam potu infusi salviae, sambuci aquoso, ac tepido, vel haustu salino, vel sale medio, ad eam quantitatem, ne alvum nimis moveat porrectis, impetramus.

Postquam sic et puerum gradatim ab uberibus removimus, et nimium chyli ex cibis ingestis ad mammas impulsum, et lactis spontaneum ex istis dispendium fraenavimus; ad ea, quae vires nutricis restarent, nutrientia, corroborantia remedia, sensim sensimque, secundum repulas jam alibi (§§. 475. 483. 516. 546. 552.) expositas, ascendimus. Hinc peruviani inprimis corticis decoctum, infusum frigidum, martialia medicamenta, — sub febris vero lentae praesentia, elixir vitrioli, aer purus, serenus, potissimum auxilium suppeditant. A venaesectionibus, licet tussis, dispnoea ac dolor punctorius accedant, hic prorsus, nisi *verae* inflammationis signa compareant, abstinendum, et ad aquas *selteranas*, aut similes, cum lacte remistas, ad emulsionem arabicam, ad vesicans emplastrum loco dolenti, quin suppurationem hic inducat applicandum, ad opium, noctis tempore, nisi maximus hoc sudor impediatur, porrigendum, veniendum est. Interdum gummi myrrhae, cum sale martis et cortice chinae (N. LXXI.) porrectum hic profuit. Si ulcus pulmonis his pectoris symptomatis, et tabi, ut causa, simul subfuerit; nec ista,

nec alia quaecunque, vitam servabunt remedia.

De profluviis *purulentis* loquendi, hic locus esse, videri quidem posset; sed, praeter illud, quod pars plurima eorum ad chirurgicae magis forum scientiae pertineat, aliorum, *pyorrhoeae* praemittenda, cognitio morborum, ne ordini Naturae, cum *Nosologis*, violentiam faceremus, nos, pauca, quae his de fluxibus dicenda sunt, alia in loca transferre induxit.

FORMULAE MEDICAE

IN §§. PRAECEDENTIBUS CITATAS.

N. LIX.

Pulvis aluminosus.

RECIPE Aluminis, drachmam unam,
Gummi arabici, drachmam dimid;
Misce, fiat pulvis, dividatur in quatuor partes aequales.

N. LX.

Serum lactis aluminosum.

R. Lactis vaccini, libram unam.
Ebulliat in vase terreo, dein adde
Aluminis, drachmam unam.
Lac coagulatum coletur per chartam emporeticam.

N. LXI.

Tinctura cantharidum.

R. Cantharidum contusarum, unciam dimid.
Spiritus vini rectificati, libram unam.
Digere per triduum, et filtra.

N. LXII.

Tinctura thebaica.

Vid. Formul. Medic. N, XVIII. NB. *per errorem, nova hic numero indica est.*

N. LXIII.

Solutio opii.

℞. Opii puri, grana quindecim,
Solve in
Aquae distillatae unciis decem.
Cola.

N. LXIV.

Solutii opii saturnina.

℞. Opii puri, grana quindecim,
Solve in
Aquae distillatae unciis decem; adde
Sachari saturni, grana decem.
M.

N. LXV.

Injectio mercurialis.

℞. Mercurii sublimati corrosivi, gran.
unum.
Solve in
Aquae distillatae fervidae uncia una.
Detur pro usu externo.

L. LXVI.

Vitrioli solutio.

℞. Vitrioli albi, granum unum,
Solve in
Aquae distillatae uncia una.
Cola.

N. LXVII.

Lapidis caustici solutio.

℞. Lapidis caustici chirurgorum, drach-
mam dimidiam,
Solve in
Aquae distillate unciis sex.
Cola per chartam emporeticam.
Detur pro usu externo.

N. LXVIII.

Solutio myrrhae.

℞. Sachari saturni, drachmam unam,
Solve in
Aquae distillatae unciis sex; adde
Liquaminis myrrhae, uncias duas,
Tincturae thebaicae, unciam unam.

M.

N. LXIX.

Injectio vaginalis alumin.

- ℞. Aluminis,
Vitrioli albi, *ana* drachmam unam,
Solve in
Aquae ebullientis, pinta una.
Frigida colentur per chartam.

N. LXX.

Injectio vagin mercur.

- ℞. Mercurii dulcis,
Gummi arabici, *ana* drachmam unam.
Aquae calcis,
Fontis, *ana* uncias duas.

M.

N. LXXI.

Mistura corroborans.

- ℞. Myrrhae electae, drachmam unam,
Solve terendo in mortario cum
Infusi chamomillae, unciis sex,
Aquae cinamomi, uncia una; adde
Salis martis, grana quindecim,
Syrupi corticum aurantiorum, unc.
unam.

M.

*Finis Lib. V.*

